


B
5310
.R851845
2008
cop.1



ARAUT ITUNGANAN YEN KO AFRIKA

Angicun bobo iwaitin luka Unhu-Ubuntu-
Botho luka Eitunganane

(ATESO)

Mandivamba Rukuni

BOOK SERIES NO. 54

UNIVERSITY OF IOWA



3 1858 057 714 705

ARAUT ITUNGANAN YEN KO AFRIKA

Mandivamba Rukuni

BOOK SERIES NO. 54

Iitaboi luka CASAS lu kesi itolomunit e
Centre loka Advanced Studies ko Africa.

Ejaas iikirora luka litaboi Lu itolomunitai
kau naka eitaabo kalo.

ARAUT ITUNGANAN YEN KO AFRIKA

Mandivamba Rukuni

Centre for Advanced Studies of Africa Society
P.O Box 359
Rondebosch, 7700
Cape Town
South Africa

© 2008 Mandivamba Rukuni
Aitolomunet na sodit okaru 2008 CASAS
Afrika na Ngalakimak

ISBN 978-01-920294-53-3

Apedorosio kere nu eitabo kalo mam ekoras. Mam
ecamakinitai idio itunganai arai erionget ainomun,
aikopun arai aitot adio kirosit kane komam
edumunit apedor kama ejai elope ewadikan.

Erai aitolomunet na eitaabo kalo na igangakit W.K.
Kellogg, Norad kede OSISA

Inomunitai kede aibur erionget loka Mega Digital
Afrika na Ngalakimak

Ejulakinan toma angajep na Ateso nesi
Simon Peter Ongodia

B

5310

.R851845

2008

*Erai eitaabo lo lo ayinaikinitor eong aibuses ne
ejaas iwuriar ka, ekale ka, ateker ka naka
Rozvi, kasodi aiyyinakin aibuses koipone
loitegelikina ne ejaas ipolok luka Afrika, lu
ipuda lolo oni noi akes acoa kede apirianut,
tetera kipedori adukun bobo akwap wok na
minat, Afrika.*

ACAMUNUNETA

Ipu itunga kotoma aijar ka lu engarakinitos eong agear apolun toni etumunane ka toni lolo lu apotu kasubutu eong koipone lo kwana ajaar eong, akes apolou ebe kesi egangete eipone lo acoa na asubuni awomisio nu. Eyalama eong yesi kere luipu noi mam eong apedori aimarimar/arai alimunun idiope diopen kede ekiror. Eyalama eong kanu Reinhild Niebuhr na abu engarak eong aiwadik kede aisiom eitaabo lo aingic ailamanareta nuka angajep.

Mandivamba Rukuni

AKIROT NA IKENYUNA

Erai Ekoc Mandivamba Rukuni lo epolokinit Erionget loka W.K. Kellogg Foundation ko Afrika, kosodi eroko nesi epolokino ne, arai nesi Ekoc lo Aisisia naka Akerianut na Akoru arai Agrikaca kotoma Oyunivasiti loka Zimbabwe. Akiro kere kede awomisio nu ejaas toma oitaabo lo eraas awomomoun naka ewadikan elopet kanuke.

AATENAK

Erai eitaabo loka Ekoc Mandivamba Rukuni lo *Araut Itunganan Yen ko Afrika* loitoduunit eipone lo iworounere itunga kere luka Afrika akwenyun, aisikwaruun einono kec kosodete aitoswam nesi adukunio apolou kede aiteteun. Eroko ber eong edumunia eitaabo lo etereuni einer, komam edai akiro nuipu titai, kanu alimun nu ikamunitos ican luka Afrika.

Mam awomisio nu inera i kane eraas ebe kanu aisijarun bon, konye epolok nukec noi. Edeparitos nen, ijaiknete abongonokineta toma aingiseta nu ipu nu ikamunitos itunga luka Afrika.

Kwana ne eteyio eong eitaabo lo ajeni eong ebe kotoma akiro nu *Aiteteunio naka Afrika*, arai bo nat *Awurio bobo naka Afrika*, iteyi kwana oni angetakinet na amuton koyapiyei aica. Ebala Mandivamba Rukuni ebe ekot oni kere abongor toma aliyas wok, kenyakutu iboro ngul lu ejokuka ido koroko ibulubula, kasodete aitoswam kes kanu apolou ingaren. Eraas nu kotoma oiswamae loka akirot naka Afrika na *Sankofa* (*Sanfoka* kotoma angajep naka Akan akes apolou ebe, "icorakinitai oni kere abongor airigaun akirot na einono wok tetere ipedori alosit ingaren; tetere ipedori amisiikin kanu inyo ido koipone bo ani kiraunor oni itunga kwape lu kirai oni kwana.")

Ejai eitaabo lo toma loesipokina toma awomisiot naka *Unhu-Ubuntu-Botho* na ecamunit ebe eitunganane kotoma akwap kere era i emoyo lo imorikikit. Etunakinit itunga kere kwape idiopé, kosodi adumun alibunet na kotoma araut itunganan yen ko Afrika yen ejai aijen,

kinumunumei kere, komam kitidisiarit atan naka Afrika na aijar.

Aitolomunio na eitaabo kalo nesi erai toma apak na edolit cut naarai kwana kotoma oyisitori, enyami itunga luka Afrika adeka na aipal aijar bala emamei bobo adumunet ke kwape kwana epolor abuwonokin. Inerasi ikwamin luka Rozvi kama Rukuni, kosodi erai akirot kec na idelelei ido koruo noi.

Ebuni eitaabo lo araun, kotoma apak na esupaana, lo ecamunitai kwape eporoto lo iworoi itunga kere luka Afrika abongokin oinono katupakin iboro ngul lu ejokuka, kanu apaarasia wok. Eteyi eong bala erai na agumaret na sodit na emal loka einono (*Elose loka Sankofa*) loka itunga luka Afrika apolou kede aitetus.

Kwesi Kwaa Prah

Cape Town

Olap Loikanyet kaongon 2007

Nu Ejaas Toma

NU EGEETE	1
1. ETELEPAT LOKA SHONA	9
2. IBORO LU ABAR LUKA AFRIKA LU EMUROKIN	27
3. AIDUK ETOGO EKAUKAU	41
4. IROTIN LUK A FRIKA LU EITUNGANANE	49
5. KOJENU NE ILIBUNITOR IJO	53
6. KOJENU NE ILOSI IJO	57
7. KIPITY EWOMOOMOE KON	61
8. KIRAIK KINYOM LU AMINA KON	71
9. KOYINANAK LUCE EJOK, KIJAUUNUN KEDE AIYALAMA	75
10. KOMINU AISISIA	79
11. KINUMUNUM & AYONGIT ISUBAN LUK EDEKE	87
12. KOKWENE, KOBOLIA IDO KIYALAI	95
13. KINERATA KEDE IDO KOPUPI IJO DA LUCE	103
14. KOJARI KOTOMA EISWAMAE LO UNHU UBUNTU BOTHO	113
15. KALOSETE TONI AITETEUNIO NA ABEIT NAKA AFRIKA	121
ITABOI LU ITOLOMUNIT CASAS	147

Nu egeete

Mam eporoto ka erai nesi ediope bon: karai mam oni itunga luka Afrika kibongori toma ajenun aijar wok, alibunet na aliyas wok, kasodete amisiikin kede ajenun, kede da amina iboro kere lu kejaiknete ipolok wok ejarete ikar kede ikar imilionin, karai mam oni kijenuni eipone lo kepedoriatar ipolok adukun ateker na asipo kolo, mam oni kipedori adukun ateker na itetet, naka Afrika naka kwana.

Erai Afrika aibois na eluwolorotor icomio kede imabworia araun itunga. Ebe kerai lo eipone lo kelominiatar itunga. Aso ne ebalatar itunga luka Shona arai imoo luka Bantu ebe *Unhu* arai *Ubuntu* arai *Botho*- akes apolou ebe 'araut' arai 'eitunganane' - akes apolou ebe kejenete ipolok wok sek ebe aijulakin aluwor kama araut ityang toni 'ajenun eitunganane' nesi erai alosikinet na edolere amisiikinet.

Arai amisiikinet nako kuju na etepedorit ipolok wok ajenun ebe mam ijo ipedori araun itunganan karai emamete ice itunga kede ka ijo. Kotoma asubunet wok iroko oni kirai ityang. Abu Edeke kitulwo oni kotoma k' otyang. Akes apolou ebe iroko oni kirai ityang, kirucokina oni noi ne ejaas isuban ka Edeke. Atyaket adiope bon nesi na ebe kisirerengit oni Edeke kwape isuban ke lu itegelikina naarai kabu nesi kopedo aijaikin oni eipone lo iswamanaret kede ka luce ejok. Arai emamei itunganan yen iswamanara kede ka ijo arai angolenikin ijo, mam ijo irai itunganan obe. Epedorete do ityang ice aite ijo kwape ityang ice: irai ijo yen asurup arai yen inyaman. Kowomoom eipone lo iteyio ijo engatuny lo ka ais!

Ewadikai eong eitaabo lo kanu itunga kere luka Afrika kede itunga lu elibunitos kotoma Afrika, lu ejaiki einono kec akwap kere aijen na epol. Kwape nat, eipone lo iswamanarotor itunga kotoma ateker alibuni kotoma Afrika. Konye karai da kijaikinit oni itunga luka akwap kere amisiikina na naka aiswamanar kede ka luce, kwana oni ikulepek kikurokinit ajenun ajokis naka aiswamanar, kikurokinit aitoswam nesi kanu aitopolo akwap kede ateker naka Afrika na itetet.

Ibore bobo ice yen awomitor eong ebe ejokuna eitaabo lo nesi aijaikin itunga luka Afrika ajenun ebe etwakiaritos kesi nu ipu noi kotoma aisac einono kec. Ejenete kesi ebe ngin einono ece ejokuna adepar lokec, iswamai adepar lo wok ko oiponesio lu aswam apiyai, konye epedoritos kesi ayangaun aipuc, kede eirian kotoma ateker? Mam. Ejenete itunga luka Afrika kere ebe kwapin nu ebalai ebe 'epolok adepar' na wok emamei aipuc kama kec. Arai da akwap na epol agogong noi lolo, United States nuka America, da atwania aipuc. Mam ijo iseseni ne elwana

Adepar etelelevision awanyun eipone lo emoromoroyere apedorosio kede ejie komamei apuponoro naka idiinin.

Ibore ice yen epolor eitaabo lo kotoma oyisitori wok erai ebe, ipedori ijo alemar itunganan kotoma ocaalo konye mam ijo ilemari ecaalo kotoma otunganan loka Afrika kangin! Aso ejenete itunga luka Afrika ebe kija oni kede eiswamae lo epedorit ayuwarit atekerin: ekal locici kede ekal lo elal. Eipone lo eswamaunatar ipolok wok eipone lo ekal kede etekerene lo ikalia, ebe ationo adumun itunganan yen ajai eipud yen amamei ejautene lo ajar, ebe amamei ere arai ekal. Eiswamae lo ekal lo

elal nesi iriamit akwap naka Afrika kere ido korai einono lo ejok adepar luce kere.

Konye elosete itunga luka Afrika etwakiarete eiswamae lo apiriana kwana kosodete atupakin eiswamae lo Ilongwau. Mam oni lu Afrika ikoto ebe araun Imusugun, konye ikoto oni aitateun ateker wok.

Arai ejai eiswamae lo ekal lo elal eridakina naarai iboro luka akwana, nesi bo do oni itunga luka Afrika aipepeun bobo eiswamae lo, aibois na aisac nesi, arai bo nat aibwaikin einono ece aibois ke. Mere bere eong ketetem ejok: arai kijaatatar ijo bala Imusugun kede 'ekale lo cici', konye ko mam akerianut na ijatatar ijo erai na Imusugun, ate mam apugasinei wok eputosi kede ngun nu Imusugun, iroko ijo iwanyunit ican lu kos.

Kejenete kolo ipolok wok sek eroko akiro nuka asayans kepona, ebe onace kon, inaci kon nepepe kede ka ijo kiraas 'idiope ipei'. Kejenete ebe onace ke ka papa kon erai papa kon; inaci ke ka toto kon erai toto kon. Abeit kejenete kesi ebe ainacan kere nuka toto kon – kingolik ijo esayans lo aokot – eraas nuka toto okon. Aso arai awomisiot kec ebe, ko oipone bo ali kipedoru ijo ainyekikin ikoku yen k'inaci kon ewanyunit ican koraas ijo kede ka awurian ke ipei: naarai, inaci kon nesi ijo! Kipedori ijo ainyekikin ikoku kon ilwarittoi orotin luka etaun?

Aso ne kepeleuniatar ipolok wok eiswamae loka ekal lo elal apotu kesi kiswamautu eipone lo ejarere, lo itodolikini toma otunga kere aipuc, amina nepepe kede akerianut na ejok ko kale, ko kale lo elal kede kotoma ateker kere aimoriarit ngin pak kere... Enamei bobo eiswamae ece loka Imusugun lo eyuwari nu.

Akirot na iwongonet na epolor eitaabo lo kilomari oni okar luka ilukumin 2 kede akwatat 1 erai ebe oni itunga luka Afrika, karai da ebalai ebe icana oni, irai itunga lu ibarit noi kotoma Akwap kere kacut ko oipone lo aijara naka emoyo. Aso iboro lu itwakiarit oni kotoma abar naka akwap kana, inyangaritari kede abar naka emoyo. Ne kwana asaciatar inonosinei ice ikwamin kec kongerete aitopol eipone lo erucokinit oni kede Edeke, kosodete amēja abar naka akwap arai bo nat eismamae lo emorere abar kede aitopol nuka acoa na adamai kec, oni itunga luka Afrika kijeni ebe ibore yen epol noi ko otunganen nes ejautene wok kede

Ikwamin wok. Kijeni oni ebe ne esangakina awate wok nu aijar epote imoyoi wok aiyatakin aijar.

Konye do nu ican, abar wok da na elosi eleliari, naarai itunga lu ipu luka Afrika mam ejenete ebe ediini nesi ingarakinit einono aijar. Kosodi bobo ebe ediini nesi kijaikini itunga eipone lo aijar kowaitin lu ipu – arai kotoma akerianut, arai bo nat kotoma adyeketa, arai kiwomoom ijo akiro nuka ateker, aijen kere aimoriarit nepepe kede eipone lo itopolo ijo aijen. Aso ediini kede einono elibunitos kama aibois adiope. Erai einono lo ikamunit eipone lo ejariatar itunga, eipone lo ejaatar iponesio kec, inyo nu ecamunitai kotoma otalia kwape eipone lo aijar kede ka luce, lo aswam, lo awomoom nepepe lo aineranar kede ka luce.

Erai ediini, kwape einono da, lo idulokina toma aiyuuneta kede awomisio nu aitumuneta. Nu ipu ka kesi emamei eipone lo itogogongoret ajakus kec. Abeit, nu ipu ka kesi mam epedorio ‘aingic’: mam ijo ipedori ebe aitoswam esayans kanu ajenuna abeit arai esabet. Aso erai ediini lo aiyuun iboro lu

mam ijo ipedori aitogogongoor nu kec. Konye kanu ayuun na edukit etau kon iyuunit ijo nu kere. Erai aiyuun na nesi irucokinit oni mama ejai Edeke. Kotoma kangun kere, mam ediini – kwape arucokinet naka itunga nepepe ka Edeke – epedori aijaikin oni lo awomoom kodoco arai bo nat araut eipone lo ejokuna lo edukunit ace aswamisinei nuka einono. Konye mam ace da: ediini kere, korai lo erucokinit itunganan ne ejai Edeke, itolomunit

Aswamisinei nu ejokuka. Ne egeuna ediini ediope ebe nesi bon nesi ediini lo abeit, ebe luce idiinin mam ebeit ajaut karai da apedori na ajaut nen, inyek akiro kopro. Ne iteere ediini ediope bon ebe nesi lo abeit kosodete aicawaarit luce ebe esabete, kolomuni arorwa.

Kanu kere, kejenete itunga luka Afrika ageun apengo kosodete aiyunit ebe ejai Edeke lo epol. Kosodete itunga luka Afrika ameun apengo aijen kede aiyunit ebe ipolok kec kesi erucokinitos kesi mama ejai Edeke.

Nu nesi ibusakinitor aitemitem nuka ediini kotoma oitaabo lo: apugan na kolo naka ilongwau, igurupun luka isiriamun lu alibunitos kotoma Nyakoi kede Kide naka Afrika nepepe kede Ikiristayon ekaulo lu apote ko Ngalakimak, nesi ejaikini itunga luka Afrika esacete ipolok kec kede ediini kec, kogeunete ainap ediini ece lo icorakina. Abalasi icorakina lu isisianakinete oni ebe mam ijo ipedori aiyunit ipolok kosodi bobo aiyuun Edeke, ido korai isiriamut arai ikristayot. Ebalasi idiinin lu ebe eipone ediope bon lo erucokini itunga ne ejai Edeke nesi aitor ne ejai Yesu Kristo arai Mohamed.

Erai na aromait na epol noi na aponi kimusungere, oni itunga luka Afrika, amudiar ediini wok, lo ejena kwape aicaset naka einono wok, abu kocalaa aiyuun, na sek edik, wok kotoma

oitunganane wok kwape itunga. Kejenete ido kitunitos Iyarabun nepepe ka Imusugun ebe kedit acoa naka Afrika, ejai kau kitiriani kede ka na kec. Kanu kangun, aponi itunga luka Afrika kitingaikinai aseun einono loitetet kede eipone lo acoa nepepe ka ediini lo itetet. Erai yen ibore yen ican noi – karai da lolo: kitwakia oni, arai kijai toma owai lo atwaniar einono wok kwape itunga luka Afrika.

Akoto eong oni bobo kwape itunga luka Afrika amisiikin ebe ipoga oni kanu ipolok wok kede abar na epol na acoa na edukunete ipolok wok kan wok adaun ikar imilionin. Ekot oni acamun ebe kijai oni ne lolo kanu ipolok wok. Kosodi da ebe kiminasi oni ipolok wok. Kerai kanu kec nesi kijaikina oni Edeke ajaut ne lolo. Kipedori oni aite ipolok wok kwape arucokinet na eriyoro, akuan kede emoyo, mama ejai Edeke kede ka oni.

Akoto eong atereun ebe, adiope apaarit ebuni esayans acamun ebe keraas ipolok luka Afrika lu enerasi abeit ageun apengo, ebe ipolok kon, arai ngul lu itolomunete ijo toma akwap na, kesi eraasi arucokinet ijo kede Edeke. Epatana amisiikin nu, karai itupak ijo toto kon kede ka papa kon toni luka papa kon kede nuka toto kon kede iwuriak kec kere lu etolomunete kesi toma akwap na, kede ka ngul lu kolo sek eroko kesi esubuna, kidolokini ijo toni ne ejai Edeke.

Kotoma aiyuun naka Afrika, mam ijo isiomuni nu arucokina kede Edeke kotoma oitaabo. Keyuunitos ipolok wok ebe, mam itunganan ice abeit aitolomikin ice toma odiini ke arai abuikin ice aijulakin aisac ediini kec arai aiyuun naka Edeke. Keyuunitos itunga luka Afrika sek ebe ipolok kec nesi arai arucokinet mama ejai Edeke, ido kalelete kesi ice itunga da ajaut kede eipone ece lo

agelakina lo arucokina mama Edeke. Eipone lo ecamakinit ngin tunganan aiboi kotoma aipuc kidunyanara kede idiopediopen.

Konye do kwana kwape anapakinatar itunga luka Afrika idiinin luka aicoreta, ejaas kesi kere ebosete kotoma omoyoi, ibore yen epedori bobo ayangaun ejie loka akwap kere lo iuniet, arai bo nat lo iwongonet, naarai ecamakinitos idiinin lu itunga aiar, aikisanar luce lu asurup tetere kesi bon esalakinete akwap.

Kingetakini, abu eong aseu aiwadik eitaabo lo naarai ejaas akiro akoto eong alimokin itunga kere luka Afrika kotoma obore yen awomit eong ebe erai ibore idiope yen epol noi kanu aitogogong ateker naka akwana aisikwarun kede aiteteun kowaitin luipu luka ateker. Epedori awomisiot na adukun, kotoma otunga kere luka Afrika, eiteteune kotoma akiro nuka politks kede eismamae loka ipatei, apugan, aipuc, ayuwara, abar, akerianut, agwelanar, aisisia nepepe kede einono. Awomit eong ebe epedori aitetem kanu inyo iyatakinitotor itunga atiakatiaka kede ateker aibiror. Epedori bobo awomisiot na aingarakin oni ajenun eipone lo itikokinet aibos na kede eipone lo ipedoria oni adukun bobo akwap wok naka Afrika na minat.

Esuula 1

Etelepat loka Shona

Awurunitai eong okaru luka 1950 kwape etelepat Aloka Afrika loka Shona, kotoma o Distrikt loka Bikita ko Zimbabwe. Ika iwuriak kere araas lu etutworitai aswam naka adekis kwape inasin. Ne awurunere eong, adaunitos kesi aiyengun kotoma aswam na adekis kogearitos aisubus ebisines lo adit. Aso keraasi kesi lu ajarete ko mam ebaritos noi, konye bobo da ko mam icanas noi. Araas iwuriak ka Ikristayon kede imeeban luka ekanisa loka Dutch Reformed Church, lo da ejul ekiror ke ebe Reformed Church ko Zimbabwe. Keraas bobo iwuriak ka lu eyuunitos kotoma oinono loka Afrika nepepe kede ka ekal lo elal/itojaaritai.

Abu eong kwape atumunan, kawanyunite iboro lu epu. Kwape nat, karai da arai eong ikoku abu eong amisiiki ebe ebalai oni itunga luka Afrika ebe kijai kau, konye kajaas oni kede einono lo apol noi. Kotoma awaragasia nu itatamio ateker ka, ateker naka Rozvi kotoma ogurupu loka Shona, abu eong kesisiau ebe epol abar kotoma oyistori loka Afrika lo itatamio kede aituk ageun otunga idiope toni lu itaiati kec. Itodunitos awaragasia nu aswamisinei nu kos nuka ipolok ka luka kolo.

Awomit eong ebe ibore yen epol kakere yen iswamaunit ateker ka, nesi aswam kede agogong aitolomun Akwap Napolon nako Zimbabwe, na da anyaritai Monomotapa. Ewomitai ebe abu akwap na kodau ikar lu adeparitos akwat akany kapei ageun okaru 900 toni 1600, apotu bobo itunga

luka ateker naka Rozvi kojiyot noi aitekerar ilongwau luka Portuguese anyoun atutubet kec kokaru luka 1600. Abu do ateker na kosalaki ipugai atutubet na toni okar luka 1800, ne do ekamaratar ajiok luka Ndebele ameun ko ngakakimak-too naka akwap kec.

Kotoma apak na ajaar apugan abu eiswamae loka Monomotapa konyanyari kotoma aibois na epugat nesi toni ayangar atutubet nako Zimbabwe, atutubena nuka Mozambique, South Afrika ka Botswana. Adukit nesi eibuga ke eiduny kede Zimbabwe Napolon aibois na Masvingo ko ngalakimak-kide nako Zimbabwe. Abu do na kitarau eiswamae lo lo agelakina lo imorikikinit ediini kede akiro nuka politks toni do ngin eiswamae loka apugan arai lo eteorit toma oinono loka Afrika kede nu akotosi ipolok. Bobo da abu eiswamae lo kingarak apolou naka ateker kede akerianut naka itunga ke, koyangaunite aiswamanar kede Iyarabun luka Nyakoi naka Afrika kede ka Middle East, nepepe ka itunga luka China ko Kide.

Ne do keponiatar lu angicete akwap ko Bulaya apotu kesi kodumutu iboro lu epu lu etodunitos eipone lo kejaar eiswamae loka eibuga kalo, eiswamae lo ajokuna, abu do koyangak Imusugun ikaru lu adeparitos 50 acamun ebe kerai itunga luka Afrika kesi kedukete eibuga lo etegelikina kwape ka lo! Kesiomete lem kesi ebe, acobeu kwape kana mam arai naka Afrika arai einono loka Shona, kowomitos kesi ebe acepak kerai Iyarabun arai Ilugai lu abwotunete Afrika kesi kedukete. Nu ajokus lolo, akwap kere ejeni ebe kerai acoa naka itunga luka Afrika luka Shona. Kosodi bobo kerai acoa na kede eiswamae lo lo apol noi kwape nat

inonosinei luce da lu akwapisinei, kwape nat loka itunga luka Incas luko Latin America.

Ejaas ijenuneta lu ipu lu itodunitos ebe Zimbabwe Napolon kerai na acobe noi kotoma oiswamae kec loka ediini, apolou naka akerianut, toni aipuc kede abar, nepepe ka eipone lo ikeyara lo einono kitoritete toma aboliasio nepepe ka aibit iboro.

Ilolo ejenas nuka ekepe loka amor naka itunga luka Shona na ejena kotoma akwap kere. Ikar lu adepasi akaisauni lu atuboros elimilimitai itunga luipu luka Zimbabwe kwape lu ekepete noi amor kotoma akwap kere. Mam na erai akangas: erai aikep amor aswam naka itunga kalu na idulokina aokot kec toma oinono kede eyistori kec da, eroko imusugun kepona ne.

Kwape aitetemet, ne keponiatar ilongwau luko Bulaya aingic eibuga loka Zimbabwe Napolon, kepotu kodumutu amor akany kapei nu esubunitos Akweny naka Zimbabwe ebwoyi ikesesei eiduny kede etepelo arai aiboisio nu etukumunokinere. Erai Akweny naka Zimbabwe na ejaas apedorosio nu ikwamin kosodete amor nu aikeses kwape atutubet naka etepelo, kowoj adepar etunganan lo ebwoi. Eraas iboro lu abar lu lu edeparitos ikar 1000 emojongitos.

Kanu epolor agogong naka eiswamae kalo, edumunio itogoi luipu lu itupusitai kede akepeta nu kotoma akwap naka ngalakimak naka Afrika, toni Mozambique kede South Afrika. Abuwa na edumakinio iboro lu itupusitere nu kesi ejaas Ocor loka Limpopo, ne adumunio okaru 1932 kotoma aro naka Mapungubwe ko South Afrika. Erai na aibois na erucokinitai kede acoa naka Zimbabwe Napolon nepepe kede abituneta nu elaete, amosing na edukunitai kede esaabu, kere edumakinio ne.

Ewomitai ebe kebu Mapungubwe kodol otekit ke lo apolou toma okaru luka elukumit ediope kede akwat auni.

Ibore bobo ice yen esekunit ateker naka Rozvi kotoma oipugae nesi eipugae loka demokrasi, lo ejai einer kede ainerun toma, apuponor kede abeyanakin naka ayayitok apugan kotoma ainapaara. Kotoma ateker kec ayayiton nesi epol amin itunga lu eyayit nes kede aitolomuun iboro lu itopoloete itunga kec.

Kotoma okar luipu lu atuboros kesisiau eong ebe etapit noi itunga luka Afrika ajaut kede awaragasia nu apolok nu itatamete eyistori kec. Mam epoget lo esalakinit bobo ne ejaas itunga luka Shona. Kepotu atekerin da ace kitolomutu iponesio lu egelegela luka acoa naka itunga luka Afrika. Kanu eraar Afrika akwap na emojongit ka kere, ibusakinit atumunak luka Afrika aseun araun lu isisiaete nu ikamunitos nuka kolo. Kotoma oipone kalo ipedori oni angicun acoasinei ace nu kitopolooto itunga luka Afrika akwap kec ikar ngul imilionion kede adepar.

Konye eong kwape etunganan lo adit, mam kabu esisiau nu ko oyistori bon, abu eong da ketoswam akonye ka asesenia. Kwape nat, naarai keraas iwuriak ka ikristayon kilosenenei iso Okanisa. Konye kejaas ngun da, mam itunga kotoma atutubet kosi lu epu aloseneneite okanisa lo. Eyuunitos kesi ediini lo einono loka ipolok. Kerai na akirosit na apol noi kotoma okal ka. Arai bala atemar ebe mam ijo ipedori araut

Itunganan yen kapaarasia nu, kosiomite ido kojai ejok kotoma akerianut arai iroko ijo iyuunit nuka ipolok. Aibois ke, arai awomisiot ebe arai ikoto ijo ajar ne ejokuna na aibar kotoma akwap kana ekoto ijo aijulakin toma odiini loka

Ikristasyon kosodi alosit asioman osomero loka Imusugun aisisia nu ikamunitos Edeke kitorite toma Obaibuli kosodi aisisia nuka ajar kitoswamai angajep na longwau. Aso keteyi eong eipone lo ajaatatar iwuriak ka ejok nepepe kede isisianakinak naarai abisete kwi Amusugun ido kosiomitos osomeroi luka Imusugun.

Konye abu eong kasesen ebe ketiono ajar adepar nen. Eteyi eong ebe kejaasi itunga lu arokok koraasi imeeban luka Ekanisa, kosodi kejaas lu ajokuka kede lu arokok ateker kosi da, lu eyuunitos ediini loka ipolok. Abu eong ekaulo kasesen ajar naka papa ka kede ejautene ke. Abu eong kawumok ebe kanu inyo araar nesi, papa ka, etunganan lo ayongitai noi ido komina ipajan kede ipapero ke noi. Arai bo naarai kerai nesi Ekristayot? Konye mere ngun; ajokuna nesi naarai kerai nesi etunganan loka Afrika obe; kara ida erai nesi ekristayot, alibunit obe kotoma oiswamae loka *Unhu-Buntu-Botho*.

Ibore bobo ice yen abu eong kawanyu kede awumokin nesi yen ebe toma okanis ne ilosenenei eong kede iwuriak ka ailipenen, apiaka akiro tai. Eyitunit eong ebe ne ilosio iso ailip acepak, keraasi elipak itomon arai akais aarei kotoma okanisa. Ationo noi aipup nu edumai ekimat. Akiro kere nu edumai epasita asubitos bala kerai nu ekamunitos akwap na alwanan amairon bala 10 adepar. Inyo elosikinit nesi aiduma? Amamei ibore idiopie da yen ekamunit eong. Aso ajeni do eong ebe apianus bon apol.

Konye kejaas ngun da, kejai Ekanis ece, lo alosenenei papa ka lo didi. Amaikitai Zionist Christian Church (ZCC) kotoma ke ajokuka akiro nuka ailip. Kanu kangun, eong kede ipapero ka ilipi kotoma okanisa kalo, ne elipere kotoma osawa

ediope toni ediope kede atutubet - kojaas itaon okanisa je loka ZCC. Lailo kidumuni ijo itunga elipak 200 - 300, kere kowoete, kibinaete ido kituritos kede aima Edeke apaaran kere. Kotoma okanisa lo elipete itunga cut kotoma oipone lo elipere kotoma odiini loka ipolok luka Afrika kanu arucokina mama ejai Edeke, konye do kesi eswamaete nu kitoritos ne ejai Yesu Kristo aibois na ipolok kec. Apotu kesi kolototo aitukumunokin ediini loka Imusugun konye kepotu koyangasi kede ka kesi eipone lo ailip naka ipolok na einono kec. Abu eong kawany ebe kepol ekanisa lo noi, kejaas kede imeeban ilukumin. Keyunakina nesi noi ne ejaas itunga kacut ngul lu ican. Aso abu do eong kwape atumunan kengitanakin noi nu ikamunitos ediini.

Abu bobo eong kwape atumunan kengitanakin noi nu ekamunitos angajep. Abu angajep na longwau naka Imusugun koraun do angajep na isisianakinere, angajep na kalu esiomitos lu 'etocoun'. Arai do eong aijen ebe kore inera iso angajep na wurunet Shona kasodete aikut Amusugun kotoma osomero. Mam acamakinitai iso einer angajep na wurunet kotoma osomero.

Abu eong da kajenu ebe kerai aisisia ibore yen ketolomuni angaran einono loka Afrika kosodete aisisiaun aijar kotoma oinono loka Imusugun. Etoswamao isomeroi kanu aikisara einono wok kotoma aisisianakin ebe einono loka Imusugun nesi aijar 'naitetet' ido kopol Ka kere. Ilolo da, atumunak imilionin lu inerasi angajep naka Afrika kesi icorakinitai aisac eiswamae loka einono kec kosodete alosit osomeroi aisisiaun aijar naitetet. Aso kanen, ageun erai ikoku ikar ikany koremokinete osomero lo nasari, kogeuni ikoku ngin ailolitoi kiding nu elimokino nesi kore kede nu

inerasi imwalimun kotoma osomero, kede nu iteyi akongu kede akit aipup.

Ewadikai eong eitaabo lo, kajeni kotau ka ebe aroko eong da adakit ailolitoi na kede ka eong. Mam eong abala ebe eroko nu isisia oni kotoma osomero, naarai mam eari acoa naka Afrika! Ejai acoa na isisia oni na ingarakinit oni, konye enyunget lo ejai kiding acoasinei nu aarei nesi erono. Aibois na oni aisisiaun ebe ekot oni aseun iboro lu ajokak kotoma acoa naka akwapisinei nu kere, kasodete aitoswam nesi adukunio einono wok esipo, kisisianakino oni ebe einono wok nesi 'ejai kau' ebe einono bon loka Imusugun nesi aijar naka kokaru kalu.

Ne eyata eong apoloor kasodi eong alosit atutuben nu ipu nuka akwap, nesi eyatakini eong da ajenuni ebe kejai ibore yen arono noi kotoma oipone lu ejaikinere eong angajep na longwau kede ediini lo etingaikino eong. Abu eong kapolou karai etunganan lo eyuunit ebe einono kede atagooro ka nuka Afrika mam kejaas ejok ebe da ican lu ipu eyangaunit ajaut odiini kede oinono loka Afrika! Ijeni ijo ebe kipolou ijo kede awomisiot kwape kangin, erai do ijo awomit ebe nu ejai aswam nes aisac nu ijo araut 'Etunganan loka Afrika' kosodi anapakin iboro kere luka Imusugun.

Abu bobo eong kajenu ebe aiboisio nu abu eong kepejonok, araas nu kolo kikamaritos Imusugun ikar 200-300 kwape ka oni da kane Afrika, konye bala ajai eipone lo apedoritotor kesi aitiiji 'engasit loka Imusugun' kotoma oipone lo ajokuna. Kwape nat, apotu ice itunga luka Asia kojenuutu aitiak einono loka Imusugun kede etekinoloji loka Imusugun. Kanu angun, kwape aitetemet, apotu itunga luko Japan kiliputu acoa kede etekinoloji loka Imusugun kosodete aijulakin nesi toma oinono

kec, komam atwaniar ediini arai einono kec lu wurunet. Kotoma abeit, apotu kesi kikopiyata kede apirianut na apol noi ko Musugun, ebe abu do einono kede ediini kec kingarak aitojiokiyar etekinologiya lo longwau. Kwape nat, kotoma odiini kede oinono loka itunga luko Japan, ngin ibore yen iswamai itunganan ebeit nesi aiyatakin ajokus ke. Itoswamaete kesi eismamae lo kotoma otekinoloji lo edumununete kesi kama Imusugun. Kotoma oipone kalo itolomunete kesi ibore yen do ejok adepar.

Abu bobo eong kawany ebe eong kwape etunganan loka Afrika lo arai epiriot, arai lo atatayi iboro mam ajaas kede aikeunit akou aikopiya acoa na longwau kwape epedoritotor itunga luka Asia, lu epedoritos aikopun acoa kede apirianut ayangaun ore, aitolomikin toma oinono loka itunga ka. Ejai iso eyala lo ebalala ebe, karai elot etunganan loka Asia Bulaya, 'ilipunete' kesi acoa kede etekinoloji lo ajokan ka kere, kobongorete bukec Asia, aitolominikin nesi toma oinono kec adepar Imusugun ikulepek. Ijuka ijo epiriot loka Afrika kwape nat eong, ibore yen ajokan yen elipuni eong kangina eraun iponesio lu ainyam naka Imusugun! Adau do eong ajenun ebe, kwape etunganan loka Afrika lo adumunit asioman na epol noi kede acoa naka okinga naka Afrika, mam eong apedorit aijulakin acoa ngin kanu aitarau na ingarakini itunga ka luka ore.

Arai kirereo oni itunga luko Japan ejok, iwanyuni oni ebe kepotu kesi ikaru 150 lu atuboros, kogeutu ailipunun kede apirianut acoa naka Imusugun. Arai na apak na ageuniatar Imusugun abunere aicolong Afrika kere. Apotu itunga luko Japan koyangautu acoa naka Imusugun toma osomerioi kec kede ocuuman lu

etatai, konye kijulitos acoa ngin toma angajep kec naka Japanese tetere kesi epedorete aisisianakin idwe kec acoa na kotoma angajepkec na wurunet. Apotu itunga luko China da iswamautu kwape kwangin. Kanu kangun ngin ikoku yen ko Japan kede yen ko China esisia acoa na abunit kotoma akwap ace kotoma angajep ke na wurunet.

Konye eong kwape etunganan loka Afrika ajeni eong ebe apedorit eong arucokina kede itunga ke kotoma oboro ice kotoma angajep na wurunet. Arai akoto aidulokin einer nu ikamunitos etekinoloji, kwape aitetemet, mam eong apedori aitoswam angajep ka cut. Kwape eraar etekinoloji ibore yen epol noi apakio nu, akes apolou ebe angajep na itolosere nuke nes erai angajep na ejai apedor kede agogong. Kotoma okar akwat adis lu atuboros keraas angajepesinei nu Amusugun, Apalasa, German kede naka Japanese. Kwape ipuwatar itunga luka o China lu inerasi angajep naka China kotoma akwap, abu do akerianut nako China kopoloor noi kotoma okaru idis lu atuboros, iteyi do ebe angajep naka Mandarin nesi kotoma oingaren ebuni araun angajep na apedor kede agogong. Kotoma Afrika, kwape ka akwapisinei nui pu kotoma akwap, Amusugun – angajep naka akerianut naka Imusugun – nesi erai angajep naka apedor kede agogong. Itunga lu ipu lu mam epedoritos aibit angajep na emamei eipone lo ikewunatar eporoto kec kotoma akiro nuka politiks, sayans, etekinoloji kede ediini.

Apak edit na atubor, kinera eong kede opapero ka loko Ghana, Ekoc Kwesi Prah, ediope kotoma otunga luka Afrika lu eraas ipiriotin kotoma angajepesinei nuka akwap lolo. Ebala nesi alimokoni eong ebe emamei ateker na epedori apoloor kitoswamai angajep na longwau. Emamei

ateker na iswamaunit nu. Karai ka akwapisinei nu cicik kwape nat, Iceland, nu apoloros kotoma akerianut iswamunitos nu naarai isisiaanakinio itunga ke kotoma angajep na wurunet. Aso atumunak kere inerasi angajep kec na wurunet kore, kotoma osomero kede kotoma oyunivasiti. Akes apolou ebe isisiaunete kesi aijul acoa kede apirianut naka okinga kotoma oipone kede oinono kec. Nu ebeit oni itunga luka Afrika aisiaun kanu nes nu ebe ekot oni adumun eipone lo ijulakinet acoa kere na ebuni kokinga naka einono wok toma angajepesinei adiope arai nuipu nuka Afrika nu epedoritos itunga lu ipu luka Afrika aitoswam kede amisiikin. Ekot oni aiyatakin toma acoa wok ajokus kede apirianut na aijulakin acoasinei nuce toma angajepesinei nuka Afrika, ne mam oni kiswama nu mam nu epedoros.

Abu bobo opaperoka Kwesi kamorata kede ka eong eyala kec lo kolo lo Ghana lo etoduunit agogong naka ediin kede naka angajep. Naarai kiridakinitai oni noi kitoswamaete angajep kede ediini, iyengarit do oni itunganan yen musugut bala idunyasi kede Lokasuban adepar oni itunga luka Afrika aimoriarit: iyuunit oni ebe emusugut nesi kebu koyinu oni Edeke. Aso ebalala eyala ebe, apaarit na Esabiiti karai iliso ijo ailip kosodi ijo airiamun kede emusugut korot, edolit ijo do abongor ore naarai iramakinok kede Edeke elope orot!

Awuta eong aidany akiro nu naarai akoto eong oni ajenun ebe oni itunga luka Afrika ekot aiyuunit ipolok woklu da irucokinitos oni mama ejai Edeke. Mam kesi akotosi ice itunganan bobo arucokin kes ne ejai Edeke. Kanu kangun, mam ekotoi oni awomoom ebe 'idisiak' oni kijai kau, kacut kotoma akiro nuka ajenar kede Edeke. Kejenete ipolok

wok Edeke eroko Imusugun kepona aicak alupok nuka Afrika!

Ilo, itunga luka Afrika kede luce luisiarakina akwapisiinei konye kolibunitos kotoma Afrika, igurokina tai kotoma awomisiot naka ediini kede nu emoyo. Mam eong abuni einer nu noi kotoma oitaabo lo. Kotoma awurianut, kejaas ngun da, erai apolou naka emoyo na idulokina oni amisiikin wok aruconokina kede ka luce tunga, eidiopene kotoma asubunet naka Edeke, agogong na ejai aiboisio kere na imorikikinit akwap kere. Erai ediini, kotoma oipone ece, eipone lo aiyuun, acaminit ikisila kede ainumunum kede aitukumunokin Edeke. Ka kere, kanu kangun, erai ejautene loka emoyo eipone lo ewanyunitor itunganan ilope ajar ke kosodi do ediini aitolomuun aswamisinei nu ikamunitos aiyuun ngin kotoma ogurupu. Ejautene loka emoyo nesi imorikikinit kere; ediini elemanari ice awai - ejenunet kalu iyunitos.

Kanu inyo awutar eong noi einer akiro nu? Erai eitaabo lokanu aiyuun ilope bon kede ajaut kede ka ejenunet loka araut itunga luka Afrika. Eipone lo kwana itwakiara oni einono wok kede ijenuneta luka atekerin wok, nesi do kwana irimaa oni okanisan lu iponesio lu egelegela amoot ejenunet. Ate kerek, kirai oni itunga lu edulokina ejautene lo emoyo lo etoduuna kotoma oiswamae loka *Unhu-Ubuntu-Botho*. Ne kwana itwakiara oni arucokinet na, kawomoomete do ebe ekanisa nes abongokinet. Kawomoomata bobo ber.

Karai da ageunit eong aingitanar karai atumunan loka Shona, erai do kwana apoloor eong kwape eswaman epiriot kotoma aswam ka nesi ajenuna eong ebe adyakarit eong noi aicawaarit einono kede ediini ka. Abu do ajenunet na kobu ne ajai eong kede awumokinet na apol noi, naarai arai

ber eong lo eyuunit toni apak na, ebe ediini kede einono ka kwape etunganan loka Afrika, ejai 'kau' kacut kirwanar kede ngol loka Imusugun. Ne do ageuna eong amisiikin abanganut ka, kadaunite eong aiwadik itaabon lu ipu kede isiometa ice lu epu, kotoma do abanganut na! Karai eong epiriot lo eturitai kotoma akwap kere kwape lo ajeni nu ipu ku owaitin iuni: ayuwara naka inyamat kotoma Afrika, akerianut na aicokicok akipi aiboisio nu edit edou kotoma Afrika, kede akiro nuka ajaut kede alupok. Ne adaunia eong araun eisisianakinan kotoma Oyunivasiti loka Zimbabwe ageun 1980, aponi eong kejaikin adoketait naka araun ekoc kobe. Kotoma okaru lo atupakini, abu e President Robert Mugabe kaseku eong apolokin eicolong kanu aingic Napolon naka Iponesio luka Ajaut kede Alupok kotoma akwap kosi. Abu eong kageu korai ber aswam na apak edit, na abu eong kadau kotoma olapio 14, keyuunite cut ebe eraas akiro nu ejautene loka ajaut kede alupok naka akwap nu erono, naarai alimokinit eong aisiom ka Imusugun kwangin. Eyuunit eong cut ebe ekot iso aijulakin eipone lo ajaut kede alupok kwape iswamatar Imusugun, itunga ajaut kede apamitin kede ibaluwan lu ajaut alupok ngun. Eyuunit eong ebe eipone lo kolo lo ajaut kede alupok kwape kebalatar ipolok mam bobo eswamai.

Kotoma olapio ikany kapei lu eswama eong nu alupok abu eong kajenu eipone lo aroniar awomoom ka! Ne adauna eong aswam na, abu eong kepejokinite idistrikta 44 kotoma 56 luko Zimbabwe. Ido kotoma ngin distrikt abu eong kenerata kede itunga lu agelegela igurupun luka akoriok, lu apolok kede kalu didik, akoriok lu musugun kede ngul lu eriokok, lu akorakinit apugan alupok, angor kede ikiliok. Angetakini eong

abu eong kawumok eipone lo ekimingingar eong kanu ikamunitos itunga ka kede einono ka.

Nu awumokin ka kere nes nu ebe toni kwana aroko eong keyuunit ebe kerai einono loka Afrika kede aiyununeta ke kere iboro luka kolo sek lu mam ingarakinete lolo. Abu eong kawumok ajenun ebe eroko iboro lu ejarete noi, kede da ebe itunga lu ipu luka Afrika kacut toma ocaaloi eroko iyuunitos noi nu eingarenone lo kolo naarai lo ka kwana lo aseu abu kimojumoju.

Ice ibore boboyen kobu awumok eong arai ebe kadau eong einer kede itunga nepepe ka iriongeta luka atekerin ka angor nu ajaas oriengeta loka otaunin, ne lem awomitor eong ebe eiswamae loka ipolok mam apodokinitos nuka ayongit angor, ebe einono loka Afrika mam apodokinit angor, nu eirian kede edemokrasi. Abu eong kawumok noi ebe ikiliok, angor, nepepe kede atumunak kere lu ajaas ocaaloi akotosi eingarenikine lo kolo karaida ejaas aibucanareta, naarai kejaikinit kesi eiswamae lo abeit, mere kwape kalo 'apaarasia nu' lo apugan na okau kede iboro lu igangit apugan lu mam ingarakinitos itunganan yen kokau.

Ne nesi kajenuna eong ebe ageun ne araar eong atumunan loka Shona toni eong apoloor araun epiriot lo itumunat loka Afrika, kerumit eong eiswamae kede acoa naka Imusugun, ebe mam bobo eong ajokus kanu aigang akwap ka. Apotu akiro nu kanyamata eong etau noi. Erumitos eong ileic noi, awomit eong do da ebe adoketai na araut ekoc na ejaikino eong ilapio 18 lu atuboros kerai eciwani arai ebicupuli.

Erumitos eong ileic noi ariengun ebe eong lo ayongitai ebe asiomit noi, ayongitai kotoma ateker ka kere kede kotoma akwap kere, lo ewadikat itaabon ngul kere etiya nen, lu ajokuka noi, konye

kibiroro awomoom. Toni kwana ajai eong toma awomisiot na itumudukat na mam engarakini akwap ka na.

Abu aswam na kitogogongo eipud ka lo lem adun apak epol. Erai ebe, na sodit, erai einono loka Afrika lo itelekarit inonosio luce lu ipu lu awanyunit eong kotoma akwap. Kosodi da eismamae loka *Unhu-Ubuntu-Botho*, kede eipone lo eswamaunutotor ipolok ejautene lo ekale kede ateker, arai ediope kalu agogong ido kosipo kotoma oitunganane.

Kotoma awurianut, keponi kedukun ateker naka Afrika adaun ikar akwat lu ipu, tetere erai lo ejaikina bon kotoma oboro luipu kocaaloi kede kakwap kere ka airiamunit. Akes apolou ebe akiro kere kede ingungeta kedaununio aipur kotoma okale kede ateker. Kanu kangun, akiro kere nu ateker kwape nat ediini, aisisia, politiks kede eipugae, aipuc kede aipur ingungeta, kere kedununo kotoma ber kokale kosodi do kotoma ateker. Kedaun kesi asesen ber kotoma adoketa nu nesi konye kewomoomoere nu apugan kede adoketa ace nuko kuju.

Aso ageun okar 1993 toni 1994 abu eong kajenu ebe aibos naka ateker naka Afrika, nesi epedori aiwopiar ne ejai aibos naka ekale kede ateker kotoma oismamae lo kolo enyekikinitor einono lo ipolok oni ikar ngul ipu noi.

Kwape aitetemet, ilolo kilot ijo atekerin nuka Afrika nu ocaaloi, idumuni ijo ikokiok lu emamei ejautene lo aijar, emameete ireria arai ikalia lu idarete kesi. Idumuni ijo ebe ice ka kesi idarete itunga kede iriongeta luka ojokotau, iriongeta luka apugan, arai idarete iwuriak lu apotu do ikulepek koyunakinos aidar idwe ngul bala luka papa kec

kede nuka toto kec. Ka kere, idarete kesi iriongeta lu mam esipokina.

Abu do eong kengitakin ebe: kotoma oipone bo ali kedukuniotor ipolok wok eiswamae loka ekal lo elal kotoma okaru akwat, lo amamiatar idwe arai bo nat ipolok, imojongai lu ajai eipud, eiswamae do lo abu – kotoma okaru akais auni bon – lo abu do kibiror erono kwana? Arai bo nat ESILIM nesi ayangauni nu arai bo kerai adek da na alope na edopi ibore yen atwanit sek, egura lo ekale lo elal/lo itoojaritai?

Idelelei abongokinet: erai naarai ikaru akwatat kede adepar lu atuboros, apotu itunga luka Afrika kogeutu aila ipolok kec kogeete atupakin akiro nuka Imusugun nu ‘ekal locici’, lo ejai ebit kede aigwagwaara bonik.

Kotoma abeit, abu ibore yen kanyam eong etau noi, toni adiope apaarit – olap Loiuniet 2006 – abu eong kanyunyurikin! Eboyei eong ooteeri ediope ko Bulawayo kotoma Zimbabwe, edarite airiamun na abeit aitatam akiro nuepu nuikamunitos atekerin nuka Afrika. Kakweny eong tipuruc, abu eong kadum apapula na iyemuto irupunitai kwap naka ekek loka agoola ka. Alem eong apapula na, abu eong karasak awanyun aputo na esunyurikini eong noi. Ajai apapula na kotoma oingaren. Arai aput na ajai okalai – kitodunite emusugut lo arai apolon eicolong erionget ediope loka ojokotau loka akwap kere, iboyei kotma oicolong kolokunitos ikiliok kede angor bala akany kapei iboyete kesi da kotoma oicolongo kec kodakitos ngin diope ka kesi ikoki. Arai eyemut ebe etudonitos itunga luka Afrika lu aiyalama kec mama ejai erionget loka akwap loko ojokotau lo ingarakinit kesi aidar ikokiok lu. Ibore yen kabu esunyurik eong noi erai ebe, ipolok ka, adaun ikaru lu epu noi, apotu kodukutu eipone lo

ayuwarit ikokiok kwape kalu da arai ikoni ecanit ai, ti emamei ikoku arai ikoki yen ejai eipud ailipilipitoi. Karai da kotoma ocan, kemorete ikokiok iboro lu ajaas kere kede iinacan ke ainacan kec nuka ekal lo elal. Kwana, kwap naka ikaru akais auni, ijai oni itunga luka Afrika ojauntene lo ekot emusugut aporun ko Bulaya aigang oni aidar ikokiok wok! Arai do na ebe aibois na alosit ingaren kede eiswamae loka Imusugun, elosi do einono ebongori kau ikar akwat lu ilapara!

Iroko eong kijaas kede aputo na. Adakit eong nes kede ka eong kwape aisituunet na ariengun na tetere kipedori amorun kede itunga ka luka Afrika.

Kingolek ijo ican lu angimingim Afrika, ipedori ijo atemar ebe nu kolo ketakanunete ameun apakio nu epugatare akwap wok ikar akwatat ka adepar, eroko nu iswamas aitobos eiswamae loka ikalia kede atekerin aisimik kesi iponesio lu ingarakinet bonik kede akiro nu esinapanakino kotoma okalia, ikalia lo alalak kede atekerin. Arai ekal, ekal lo elal kede ateker iboro iuni lu edaret kojokan einono, aisisia, ediini, aipur ingungeta, aidyek imusaagon, aiku acoa kede aimor kede ka luce, nuka politiks, eipugae bonik – nu kere ajaas toma oiswamae loka iboro lu iuni.

Ilolo, ebiroros iboro ngul iuni kotoma ne ebakare ebe adukun atekerin kotoma oiswamae loka Imusugun. Akwapin nu edukunitai nu itetiak – kere ejaatat kere ikorion lu egirunete Imusugun – emamiatar kede awomisiot na ajaut kede ikalia lu esipos. Kotoma abeit, erono noi aiboisio ace nuka Afrika, ekotosi erionok da lu Afrika ebe kwape kwangin. Ejenete kesi ebe karai emamei ijo ekal lo elal lo esipo, amamuun ateker na egogong, kane do emamuunos itunga

Lu esiposi kotoma angajep arai kotoma otale lu ipu lu epote aingitanar nu elosete erono kotoma apugan naka okiding!

Ne ibirorotor ikalia kede atekerin aswam kotoma akwapin nuka Imusugun, kijaari apugan aswamisio kec kere. Kanu kangun idumuni ijo ebe apugasinei nuka Imusugun kesi epodokinitos aitodolinikin nu lem kerai ti ekal arai ateker kanu itunganan, ekal kede ateker. Konye emamiatar Afrika kede apiyai nu adukun kangol caalo itesenin luka polis kede adyeketa. Ican lu Afrika epedoros bon arai kedukun bobo ekal, ekal lo elal, kede ateker kede aiteteun eiswamae loka *Unhu-Ubuntu-Botho* kotoma ogurupun kere. Nen bon, nesi konyet bobo, epedorere aitiji nuka etengei kede enyame lo aronon, abilibil itogoi akoko kede ijiisio lukore, kede adekasinei kere nuka lolo. Erai do aswam naka apugan naka okiding na ayangaun iriongeta lu iganget apoloo naka akwap.

Ati ijeni ijo, ibore idiope yen epol kane ejaas itunga luka Afrika, yen mam ice ejaatatar noi, nesi aijen ebe ajananara kede eitunganane nesi ingarakinit oni kere.

Kwape etunganan loka Afrika, akoto eong alimokin ika tunga luka Afrika ebe mam oni toma apak na ewuriana ipedori aitelekaar akwapin nuka Imusugun kede etekinoloji – ekot oni aikopiya kede apirianut. Mam eong awomit ebe ipedori oni aitelekaar itunga luka Asia, kacut ngul luku China, kotoma etatai kede aitolomunun iboro, ipedori oni da aikopunun kama kec kede apirianut. Konye ne ipedoria oni da kwape itunga luka Afrika, aingarenikin akwap, nesi eiswamae wok lo aijenamar naka itunga.

Oni kwape itunga luka Afrika, ebeit aiyatakinit aitodikinit akwap apolou naka eitunganane –

apolou naka alakara kotoma aijar. Ipedori oni aswam nu ketoritos iruman wok, eiswamae loka *Unhu* arai *Ubuntu*: amina Edeke, aminanar idiopediopen, kasodete ayangaun mama wok kede akwap kere, ekosio, aboliasinei, aila kede iboro lu eyangaunete ailel toma oitunganane lo erucokinit itunga kere kotoma ojautene kec lu egelegela luka aijar. Iboro wok lu abar, lu edeparitos einono kede angajep – ne nes ejai agogong wok kwape itunga luka Afrika.

Esuula 2

Iboro lu abar luka Afrika lu emurokin

Mam eong eyituunit apaarit ejok konye bala Marai okaru 2003 ne ajaar eong odege aporun anyoun ko United States nuka America toni Afrika. Kidol iso Osawe lo idege loka Heathrow abu eong kepagis agoola na iyengunet edari arucokin aporor toni South Afrika. Aseseni eong etelelevision kawuta bodo aiyengun mot. Ajai epuroguram lo eminas itunga loka Oprah. Kotoma ke abu Oprah kiworou Billy Crystal kwape epejonon lo angosibib kotoma opuroguram ke lo alosi einer nu ekamunitos akal ke kede nu ajenandar. Nu apolok kotoma akiro ke araas ebe eipone lo edumunia nesi papake lo didi lo asalit ejaari – kedau papake atwanare. Mam nesi ajenunit etunganan lo ejok epolouni nesi kosodi papa ke da abu kotwana eroko etunganan lo kwana eturitai kwape etalakaaran edit noi.

Enera Billy Crystal nu ailel na amoun onace ke ka papa ke, kosodi adumun nesi. Enera nesi eipone lo etataminikina nesi papa ke lo didi awaragasia nuka akal kec, aimorikikit nu ekamunitos papa ke. Awutasi Billy Crystal kede Oprah aimor nuka apolou na arucokina naka akal nepepe ka lu minan. Amorete kesi akiro nu iyituno, nu ekamunitos airum abar na epedori ayangaun arucokina naka ikalia na egogong.

Abu eong aminak aitup einer itunga kalu naarai amina eong noi Billy Crystal kwape etunganan lo

aminakit aitalakanar kotoma o TV. Konye kejaas ngun da, eboyei eong kawoongit akituk komam eyunit nu eteyi eong – awumokinit eong ebe ewuta Billy Crystal alimonokin itunga imilionin lu iteete epuroguram lo eipone lo kedumunia nesi papa ke lo didi korai do nesi epolon! Kerai Oprah ebuni Afrika, ti oni kere kikwamar toma osoo ke, kacut eong, naarai ipu eong luka papa, nuka toto, luka mamai kede nuka ija nu ipu nu itatama nu kec!

Apolounit eong kotoma aibois na epuwatatar ipajan noi. Inacan luka papavka kere eraas luka papa, ipajan luka papavka kere eraas luka papa. Kowaika, ngin diope ka kesi ajai aswam ke toma aijar ka. Arai akoto eong alosit ameja, ajeni eong papa ali arai aamejan. Karai ketipasete eong angor, ajeni eong papa lo ecori eong kowai kangol. Arai ejai ibore arai acoa kere na akoto eong, ajeni eong papa lo apiriana kowai kangol lo asubuni eong.

Aso eong ngol awuta aiboi apupi Billy Crystal kede Oprah, inerasi nuka papa ediope bon kede ailel na adumuni nesi kemojong kwana! Aso, abu do eong kawomoom ebe inyo ajokus eong etunganan loka Afrika aibar noi kasodi aiyalongongo nu ikamunitos ekal ka, inyek akiro kopro. Kanuka, eraas akiro nu ekal nu iswamao konye mere awomoom arai airuja.

Mam ne erai ebe kanu egeune lo ka kolo, ejautene lo asubunete ipolok wok, konye eroko erai eipone ediope bon lo ipedoro oni kwape itunga luka Afrika, adukun ateker na itetet naka akwana naka Afrika. Apedorite adukun ajenamar naegogong kede ikalia lu esiposi, aso kitorite nen, kopedorite adukun atekerin nu esiposi, ngin nesi ibore yen apolon 'Abar na ibu Kimurik' itunga luka Afrika. Iburai oni aibok aidulor toma aiyitununete nuak ipolok wok kanu abokun arai akutun abar naka

ipolok na kinyekinitere oni aingarakin oni alosit ingaren aitarauun akwap wok na apolon na na egogong kotubite.

Oni itunga luka Afrika eikor kiding ekal lo cici kede kangol ekal lo elal erai ibore yen ejai awomisiot konye mere aswam wok. Ne ilimuno oni nu ikamunitos ekal ejena ebe inera oni nuka ekal lo elal/itoojaritai. Acepak kinaera oni nu ekek, arai ikoto oni agitun itunga idis ko ogurupu kec lu iboyete nepepe. Konye ikekia eraas itogoi arai ikalia lututuben naka ekal lo iriamunit kere.

Ekal nesi epol noi naarai nesi aibois ne ijaria ijo kede ne igeuna ijo ajenun ejautene kede asipo kon kwape itunganan.

Emamei ibore epipil adeparit itunganan atwaniar ejenunet ke. Ekotosi itunga kojenete kesi da kane ejaas ebe erai lu kanen. Ekotosi kesi noi kojenete ebe ejaas kes ido ejenanara kede ka luce. Ejautene lo ajenamar kede aruconokina egeun kotoma okal. Karai etwania itunganan ejenunet lo araut yen ko okal ke, kogeuni do moolo kotoma ajar aitiikin aimo ejenunet lo arucokinet na, ecicing itunganan ngin araut yen eleli. Etapit kes aiku ne gongakina arai ogurupu ece, okanisa arai yen epol eipud.

Nu nesi abalar eong alimokin ika tunga luko Afrika kede ika tunga kere kane ijaas, ebe kijai oni ejok noi arai kirucokina oni kede ikalia wok ageun iroko idisiak, itiya ageun ber aisiom adumun aswam kageunete do ebe aimo esusut arai ataagorot wok. Ibore yen nesi kiyari oni ido koroko iyatakinin amudiar oni ateker wok.

Erai ekal aibois na esubunata itunga luka Afrika awomisiot naka ajenanara. Kapotu do kiyatakisi aitojokiar nu eloste ikar iwosete ingaren.

Egeunos ikalia na sodit ka kere kotoma ajen na aokot. Kiyajakini do ijo arucokin itunga lu ejenasi kede ipajan kon kotoma aokot. Aso kapote do aimorikin amurak, ipapero kede idunyeta lu kere iswamaunete ateker na iminaikina ido kosipo.

Ibore ice yen apolon yen 'Abar na Imurik' yen ebeit itunga luka Afrika aisikwaruun nesi eiswamae loka italia kede ikiroria luka aipule. Eroko eong kiriamuna kede itunganan yen Afrika yen mam epoga kanu etale ke arai aiworoo kede ekiror loka aipule. Kwape nat eong, erai etale ka lo '*Moyo-Moyo*' erai na akirot naka Shona akes apolou ebe 'etau' erai na itoswamao kanu itunga lu 'ewojak itau', ibore yen ejokuna kotoma aijar. Erai ekiror ka lo aipule '*Moyondizvo*'. Elibunit ekiror lo kama *Moyo* kosodi nesi ake apolou ebe 'itunga obe luka *Moyo*' kanu atyakun kesi kede ice lu ateker na alalan naka *Moyo*.

Kingolek lolo ijo akiro nu apaarasia nu, etale kede ekiror lo aipule eraas iboro lu epolok noi kotoma aijar naka ateker na Afrika. Kwape nat, arai ikoto ijo ajenun apolou na etale kede ekiror loka aipule lolo nesi aitirian '*Moyondizvo*' kede ekiror '*Coca-Cola*'. Amina eong e *Coca-Cola* kosodi erai nesi ediope kotoma okiroria lu egogong noi kotoma akwap lolo. Konye arai ijo aingit eong aseun idiope kotoma okiroria lu *Moyondizvo* kede *Coca-Cola*, mam eong abuwonokin ne aseuni eong: *Moyondizvo* obe! Ekiror loka *Coca-Cola* erailo imilionin luka ikapun luka America. Kwape itunga luka Afrika, ekot oni ajenun apolou naka italia kede ikiroria luka aipule wok.

Ajenete itunga luka Afrika ajokus naka aima ikiroria – aima ikiroria kotoma oinono – sek eroko oni kipuuga kede ilongwau. Apolou naka etale kede ekiror loka aipule lo ijaikini itunganan airumun

abar naka ipolok wok. Erai na eong aijen ebe eroko eong kedumuna iboro yen abar, adumunit eong kama ejai ipolok wok. Enumunumi eong ajokusio kere nuka ipolok lu kede akiro kere nu isisianakinete kesi oni. Ajai eong ne kanu aiyatakin aswamisinei nu apolok nuka ipolok wok. Mam eong ajai ne 'kanu akangas naka einono', lo eraikitai akwap na asalakin arai ibonipei yen emamei adumunet. Arai eong itunganan yen eswamaunit ejautene lo arucokina lo emojongit noi – ameun apengo – apedoritos ipolok ka aiku atyokusio ikote bo ai kotoma ajar naka akwap kana. Akes apolou ebe kijai eong kede atan na mam ewonikini, na abar – kwape acoa arai apirianut – na mam itunganan epedori ademar eong. Adakit eong kede ka eong ejenunet lo ejaikinit eong agogong naarai ajai toma ne asipokina.

Ejautene lo agongakina egeun kotoma okal. Erai kwape kwangin da arucokina kede Edeke. Nu kere edukete emusiigi loka kangin tunganan ajaut kede alosikinet: erai alosikinet wok ber kwape itunga luka Afrika na sodit, aiyatakin agogong kanu ajenandar kede Edeke, kosodi na iareit, aiduk toma aswamisinei nuka ipolok wok.

Kosodi da, erai ekal egurupu loka itunga lu ejenas, lu iteminokinete oni kere ageun idit toni apoloun jik. Kisisiauni oni kotoma okalia wok nu ajenandar kede kaluce, eipone lo amorun awomisiot kede aiswamanaar kede kaluce. Kede da bobo, eipone lo aimor eipone lo epupio yenice ailel, ican, aitelekaar arai bo nat aitelekaaro. Edolit adumunun nu kere kojai toma okal. Acoa kede apirianut na ekotoi aingarakina ateker naka Afrika apolo ejok kogeuni okale loka Afrika nesi egeuni kane idokingarakini ateker kotoma akerianut, aisubus arai ebisines, ayayit akwap kere aimoriarit.

Kotoma okal kede odiini loka Afrika epolok aswamisinei nuka kangin tunganan noi. Kijeni kere ebe, nu ikamunitos aswam naka ngin tunganan erai eiswamae lo einono: kisisiauni oni aswam iboro lu egelegela kede oni aswam aswamisinei nu ice itunga ageun iroko idisiak. Akes apolou ebe oni kere ipedori aswam aswamisinei nuka ice itunganan kotoma okal kotoma apakio nu egelegela. Iponesio nu iswamaere nu egelegela ageun ateker adiope toni adiope naka einono ko Afrika, konye kojai aswam nu ekal lo elal ibore yen iswama kotoma akwap naka Afrika aimoriarit.

Kwape nat, eong kwape emeeba loka ateker na Shona, karai da arai eong ekilokit, eswamai eong aswamisinei nu kotoma okale lo elal. Kwape ekilokit arai eong okilenike aberu. Arai eong da papa ko odwe ka lu awurit eong kede kangul luka inacan ka. Konye kowai idwe luka ainacan ka, arai eong mamai, toto kec na kilokit. Ejai eong alomar akeje ka nuka toto kec ngin pak na ejaunor eipud.

Kane ejaas ainacan kede aipajan ka toto ka, arai eong ikoku kec. Mam ace karai da erai idiope ko apajan ke na ikar itom aarei, karai eong lo apolou naka ikar 53. ejai eong ayangarit ikoku yen ikar itomon aarei kwape totoka na ejai eong ayunakina neke kwape ikoku ke - karai da ebwangitos eong akoruo akou. Ejai nesi da asubit bala toto ka kosodi ayangaar eong kwape ikoku ke apak na emamiatar nuka toto ace arai bo nat ketwakata.

Ibore ice yen erucokinit itunga luka Afrika nesi eiswamae ebe toto nesi erai epir kotoma ore. Erai nu abeit arai erai ekal lo edukokina ekilokit aberu arai bo nat ne emanyia aberu ekile ke. Toto nesi epol kotoma okal. Emamei ekal lo emamei toto. Kotoma Afrika naka kolo, mam etunganan

akorakino alupok arai agitakin ere, arai mam emanyit aberu. Ebakasi itunga luka Afrika ebe, idunyasi nuka toto noi kede Lokasuban adepar luka papa, kanu aijaanakin oni aijar.

Nu nesi iwanyuna ijo ebe, amoromor angor mam erai eiswamae loka einono arai iponesio luka itunga luko Afrika. Kotoma abeit, apolounit eong aroko adit ebe amoromor aberu itodunit akurianut kede araut ebang loti. Kanu kangun acamakinitai ijo aidyek arai idum ijo ekilokit emoromoro aberu. Apedori ber eong aitikokin papa ka da, arai iteceli totoka arai akote aitijii. Konye mam eong apedori aitikokin toto ka, mam acamunitai kwangin, naarai idunyasi nesi kede ka Edeke, epedori anyunyurikin kosodi abeit aitim karai da edyaka.

Ice ibore yen idumuni ijo kotoma Afrika kere kotoma oiswamae loka einono, nesi eipone lo etubere nu iswama kitoritete toma aingitanar kede apuponor. Eiswamae lo apuponor nesi ejai Kotoma oiponesio lu egelegela, kotoma ngin akirot na epurio. Kwape nat, akiro ace ejaun apuponor kede iwuriak bon, akiro ace erai apuponor kede idwe. Acepak erai iwuriak ainerun kede idwe kec lu apolooros.

Erai duc ekilokit lo epolokinit ekal, aso ebeit nesi aingarenikin ekal. Konye kotoma okalia lu ipu luka Afrika, mam erai ebe nesi bon edauni kere. Kotoma abeit, mam itunga luka Afrika ecamakinitos ekilokit araut lo mam itepegio nuke arai bo nat ebe neke bon nu tupan. Ne ejaar ibore arai akirot nautemokino, erai eporoto loka toto nesi epupo adepar loka papa, naarai nesi ejeni nu kore. Konye ne ecamunere ibore yen itutubio, ebuni papa kwape loingarenikit ekal einer bala nesi itutubit ibore ngin kacut kama ejaas itunga ice lu awai. Aswam naka ekilokit nesi alimonor akiro nu

itemonokini ekal kanu aidar ejautene kede ekiror loka ekal.

Mere ber eong ketoswam aitetemet naka eiditeu ka. Eboyinikinos toto kede ka papa kanu akorokor iboro luka okal. Ajai toto eporoto noi, epu nesi nu inera naarai nesi ngipengin abeit aitodolokin nu itutubete kesi. Konye karai ikamunit akirot ngin itunganan yen kawai, kedautu kesi aitutub ibore, abuni papa alimun ibore ngin bala nesi kanuke etutub ngun kanu aidar ekiror loka ekal esipokina tetere lu awai mam itepegete ngun.

Etapit irwan na ipu ikiliok, lu iswamaete kinga na ekal, ayangaunun akiro nuko okinga toni ore kanu aimor awomisiot. Kane naarai kesi kes ejenete nukokinga, apol do kes einer. Konye enerai akiro ngun kotoma oipone lo aimorokikit aberu kanu adumun acoa kede etube ke. Kotoma oipone lo aimor akiro nuko kinga kede itunga lukolokal, ingarakini ne luce da ajenun nu ebeit aswam karai moolo ketakanikisi kesi akiro kwape kangun.

Aso karai iswamai ekilokit kinga, arai elosi ameja ityang,arai ageu ebisines, iboro kere luikamunitos aswam ke ayangaununo ore kanu amorun awomisiot kede ekal ido abeit aberu aigangit nesi awomoom nu edolit aswam. Kotoma oipone kalo, lo aimor akiro nuka aswam kede ekal ngin tunganan da imorikikina toma oiswamae loka papa ido koingaren ebuni aswam ejok.

Karai lolo itunga lu edukokina koreria kec kiswamaununete nu, ti epatana kesi aitiji atyokusio nuipu nuegelegela kwape nat ESILIM, nu aelo awai, kede ace.

Kanu kere, karaida erai ajaut kede angor nuipu, arai eirotane,ibore yen acamunitai kotoma Afrika naepol, ilolo, naarai engerit eiswamae loka Imusugun, mam do ecamunitai atereun. Kanu

kangun mam do elimununio nu ikamunitos aberu ace na awai, ne da itolomununei atyokusio nuipu kwape adek naka ESILIM. Ikolo, karai ekoto etunganan aimany aberu arai angor ace, ajai ekal acamun konye eyangaunio. Ajai aberu na ajai napolon acamun ebe koyangaunai akainike, naarai nesi na abeit aimor ere kede ekilokit kede aberu ngin. Mam acamunitai ekilokit ajaut kede ikaidu awai!

Kanu egitakinar eipone kotoma akwap Imusugun kede nu etijenikinit ebaibuli loka Ikristsyon, akiro do nu eirotane epiyikino kwapepar. Mam ijo ilosi ne elwana da kanu ajenun ebe eiswamae lo edukone da kotoma akwap naka Imusugun ejai icikakitai noi. Kwape nat, ko United States nuka America, lu edeparitos atutubet kalu edukokinos etyakasi kotoma ogirone. Akes apolou ebe apak da na aiwen epeta ekoto ij mkojeni ebe nuineraiu ebe 'toni atwanare aityak oni' mam itodolikinos.

Kotoma United States nuka America, karai da ilayirete itunga kotoma olutaari koingaren ka Edeke, ecaminitai egirone, kotoma okisila lu apugan kede lu ediini, adukonokin irwan lu ipu kwape ikotor itunganan, konye kotupanakina mere aimori. Awomit eong ebe erai lo da eirotane lo acoa. Erai aingalingal akuan ebe kidau ijo agirokin kede aberu na imanyit ijo, adaunos do ngun kogeuni ijo edukone ece! Arai ikoto ijo arai mam ejai ijo ajaanakin kede aberu arai ekilokit lo edukokit ijo sek, naarai ejaas idwe nen, iboro kus kede ateker na ajen. Itelekaarit eirotane etenat. Kotoma oiswamae lo kolo lo eirotane, apedorosio nuka aberu, idwe kesi idaritai ejok adepar na Imusugun na alacanakin kede adukonokin bala ijuli igoen.

Karai kingit ijo eong ebe ani kotoma oiponesio luka eirotane ejokuna, atemari eong ebe emamei lo ejokuna arai lo erono adepar loce naarai ngin eiswamae erai lo ibecokina apak ke. Mam iboro lu kakwap kana epatana aitirian kede iboro luka emoyo kacut adiope tiryanel! Kotoma omoyo, emamei eitiriane lo esawa kede nuka akwap ka ya. Kanu kangun, emamei do ajokus aicanican apak epeget nuka iponesio luka imanyito arai ebe aisianakin ice eipone lo emanyit ediope adeparit ece. Ejai edukone lo itemokinet iwuriak, ainyekin lo isupakinotor lu ekotosi adukokin lu eminanara. Ejai do bobo eirotane lo abeyanakin kede eirotane lo atenak. Kede iponesio ice da. Eraas nu kere nu inonosio kede eitutube akiro kangol ateker, konye kejaas ngun da ijeni ebe ngin edukone ejaas kede ailel kede apakio nu ican lu kos.

Konye nu etakanete kes nuta ebe, einono lo ecamakinit aineranar mere aibwaibwait akiro kotomo oiswamae kec kede ikisila, ediini kede aswamisinei nu einono loka ateker nesi itelekaarit kede ajokus. Nesi iteyo ijo ebe atekerin nuka Isiriamun, nu ecamunitos nu eirotane etenak, kede Nyakoi nako Bulaya, ne ikenyere iboro inera, epatanikit kesi aitiji atyokusio kwape nat ESILIM adepar akwap naka Afrika, Ngalakimak naka Asia arai Ngalakimak naka America, ne mam akiro inerare etenak.

Kabongutu bere bobo osusut loka akiro: iboro kere lu ajar ejaas toma oipone lo iswama ekal. Kotoma ateker, nu iswamai oni eraas iboro luiswamas kotoma okalia. Nuka politiks, ediini kede eipugae wok kere eraas nu iswamanara nepepe.

Eiswamae loka Afrika lo itemonokinet akiro, lo egeuni kotoma okale, ejena kotoma angajep naka

Shona kwape 'dare'. Kotoma angajepesinei ace nuka ngalakimak nakao Afrika, enyaritai 'tinkundla', 'lekotla', 'imbizo', arai 'indaba' kere nu ebakasi ebe eipone lo ecamunitai lo aimor acoa kede aitutuben akiro kotoma acamanar kotunga kere nu ikamunitos ngun. Ejokuna aitoswam akirot na 'dare' arai 'indaba' kotoma okalia kede ateker da aimoriarit. Epolok noi bobo kotoma ateker na elal, naarai ipu ikalia kane kede ikalia lu elalak, lu edit ajena naka aokot. Konye eroko eiswamae loka ajenamar egogong kotoma ateker.


Kotoma Afrika na akolo, 'Dare' nesi arai eiswamae lo acamunitai akwap kere kwape lo isisiaunet acoa, aimor apirianut, kanu aitemonokino nuiswama, kanu aitemonokino akiro nu etakanunete kotoma ateker, aipur ingungeta, kede aswamisinei kere nu itolosete nuka aipuc kede ajokunar naka akerianut.

Arai eswamae loka *Dare* lo emorikikit itunga kere, ngul nu ikamimitos akiro ngun. Na iyareit, ajai amorunun einer kede ka luce. Amamei akirot, naedit arai na epol, naitutubio karai mam ainerun kede amorun awomisiot kede ka luce iswamauna kotoma ateker. Ibore yen iuniet arai apuponokin nu inera yenice da. Apotu ipolok wok kitojiokiaritos ainerunun noi, amamei ibore yen etutubio, arai edit arai apol komam ainerun ebe naarai emamei itunga apak na ipup nu kayenice. Etolosio einer kede apuponokin nu enerasi itunga, ace pak adaun apak na ewoj toni konye adumun nuitutubete itunga kotoma ateker.

Eiswamae ece nesi lo aimorikin kere itutubete akirosit. Akiro nu itutubio kere kotoma atekerin kotoma Afrika na kolo eraas nu imorikikina itunga kere toma ke. Ne itoswamaere ainerun, amorun akirot kede aibwaikin itunga lu ipu, ice lo ejai

apirianut na epol, ice lu ejokuka kede aitub akiro, ice epol acoa, ineruno ibore toni adumun nu ebeit aswam nepepe ngin itunganan kocaunite. Erai na naarai ne edolere aitutub akirot, ngin itunganan kijaikite ewomoomoe loka ateker lo epatana atupakin ejok.

Aso kotoma Afrika nakolo akiro nuka politks, adolonokino akiro, kacut nu ecamunit ngin tunganan, kotoma aseunet naka itunga kalu ipu noi.



Aputo 1 : Amatapalin nu Edukete Ekal luka Afrika ejok, Ateker, Akwap kede Akwap kaimoriarit.

Atyonus kwana na ijai kede ka oni kotoma ateker wok erai ebe eiswamae lo kere lo aishwamanaan kede apuponoro, epiyaritai awai kosodete aibwaikin nuka aseongaren. Kosodi, kwape ijenia oni itunga luka Afrika, irimite akiro kotoma akwap na kokwap akolong. Amaranikin duc aseong mam ingarakini iboro lu ipu aitetenio. Kejenete ipolok wok ngun. Irwan na ipu, ibiroro itunga lu ipu itutubete ibore . aso, kanu inyo ageun

ber ainyam akirot ejok, toni itunga kere aimonkin kosodete amorun acamunet? Ne nesi edolere aitemokinet na iboro na iboyei adaun apak kotoma aitemonokin akiro nuka atekerin.

Idiope ibore yen epol kotoma aitoswam eiswamae loka *dare* kotoma aitemonokin akiro nuka politiks kede ayayit luce, akes apolou ebe mam eengarenok ipugaete kede aburacu! Ingarenikinitos ayayitok eiswamae loka akiro. Eengarenikinok kes idarete ebe itodolikino eiswamae loka ateker kec ejok. Kesi kes edukunete apuponor kede ayinakina naka itunga aiswamanar akiro kec kere nuka politiks. Mam kes ejaas ngina kanu aitutub ngin akirot aipuga luce.

Atyonus na kija kede ka oni lolo kotoma ateker wok, apugasinei nuka Afrika ekotosi noi eiswamae loka ase o adepar adukunun atekerin nu esiposi. Ekotosi kesi adukun aiboisio nu ase o aiwadik aseak, aibois na adukun ateker na esipokin kotoma apuponor, amorunun acamanaret itutubete akiro nu ikamunitos kesi. Kanu kangun, idumuni ijo ebe, edit apugan agogong, mam iswamai kwape ti ebeitor mam epedorit aingarakin itunga ke lu ipu.

Aso ekot do oni aiteteun eiswamae loka ikalia kede itunga lo edukuni eiswamae lo kakolo lo itemonokinet nuka politks nuka okwap kede eipugae lo ajokan.

Ikalia lu esiposi kaimorikikina nesi Abar Naimurok itunga luka Afrika ebe ekot bobo aidotun nu akolo, aitemun aiteteun kesi kanu ajar na kalolo tetere ipedori adukun ateker naesipokina.

Esuula 3

Aiduk Etogo Ekaukau

Karai ejai eong arereng na einer kede ayayitok Kapugasinei nuka Afrika kotolim lo kokwap ekitoi kocaalo ka, ti eong alimok kesi: "Kitimete yesi eong, ipapero ka, eipone lo eteyio eong iwutasi yesi aiduk etogo ekaukau". Ewutasi apugasinei nuka Afrika aibubu atunyuru toma togo lo enonok arwatat ke, lo ebosit arwatat ekot aibiror. Aibois na aiyatakin agogong aiteteun arwatat komusiingi, mam kes epodokinitos aitigogong nu ikalia kede ateker. Ebukete kesi apiyai etiya nen toma oboro lu ko kuju lu mam ajokus kec edolokin itunga lu ko kwap idiopediopen arai ateker. Kotoma abeit, etolomun do itungasinei iarei: itunga lu ejaas kwap na etogo lo ekot aibiror iteete kwi ewutasi aibubu atunyuru togo lo edoi adio apak kere akwes kec kwape 'Ibore akwes kec kwape 'Ibore Yen Longwau', e UFO, lo ileleba itunga lu ikeyitos akwes komam epodokinitos arai ejenete nu ipudas itunga ateker.

Kotoma abeit, mamatyonus na ejai bon ne ejaiapugan naka Afrika. Iriamit akwap kere na edek asesen okume bon mere ingaren. Kongolik ber ijo Erionget loka Apiyai. Itunga lu ipu kanen ijaanakinete itunga idis Lu eseuna erai idisilong kotoma otunga lu epol eipud. Karai da mam oni kilimuni, apoloor kwana akurian naikamunit iriongeta luipu luiswamate kotoma akwapisinei nu ipu. Kiteete kesi eipone lu enyanyarar ecanit

kotoma otunga lu ejai eipud kede amengerikit ikisila lu kwana itukurianete ingaren. Konye arai kesi da kijesunos kwap abunere kodowon awnyun nu ejaas kwap ejok, ti kes ewanyutu ebe ejai ti eipone ece lo ingarakinet itunga lu noi!

Acamunit eong ebe karai ikoto oni awanyun bobo Afrika Iteteun aiten, ekoto oni agear aiswamaun bobo ekal kede ateker na esipokina toma alosikinetu nu imarunit oni kotoma osuula lo atubor. Kotoma oipone ediope, alosikinetu kede aswamisio ngun kesi ebeit aitot kotoma oingaren toma akwap wok kere. Nesi atemar ebe apugan naka okau, apugan naka okiding, opatei, oriongeta lu ijanakinete itunga aswamisio, aswamisinei nuka ebisines nu kere ekot kolosete kotoma alosikinetu nuka *dare* tetere ateker kere ikwaruni. Mam epate lo ecamakino aingarenikin Afrika arai mam nesi edukit alosikinet na aipuga kimorikikinite kere (acamunit ebe ipu ido kagelegela konye karai ipei), na itolosio kotoma ainerunun, apuponoro, aitutubenen akiro kede itunga kere ka acamanara aitimonor. Nu kesi alosikinetu nu ebeit adukokin toma oiswamae kere loka politks akede eipugae, toni kuju airabet kede okabinet, kimoriarite polis nepepe ka ajore na akwap, tetere oni ipedori bobo adukun aswmisio nu edukete ateker adepar ne itoswamaere aimar na mam kere iyuunitosi naka aseu kede enaaba aseta.

Nuican noi kotoma oyisitoria wok loka Afrika nesi alosikinetu nu agelegela nu ayuwarete itunga kec kama ajaas ilongwau kede apugan kec aiswamun nu adumakin itunga kec aipugaikin bon, konye atipet kimurokini ne ibunio 'ataagoro wok'. Aibois ke, kominakini kesi adukun ibore yen abalai *national government*, apugan na imorikikit kere kotoma akwap, arai kanu apedorosio nu eteyo ebe

epu, arai kanu adyakarit ebe ekot ' eipone lo ayuwaro' korai lo imorikiknit itunga wok lu eriokek kere kotoma owaitin luka ajaut kede itogoi, aswamisinei arai asioman. ne do ketootor kesi ebe emamei itunga lu aicatunet kes ikulepk bon adukun ireria kec, aitolomunun apiyai ocowen kec arai apedor aitosiom idwe kec!

Kotoma aitegelikina na ican, elosete kesi do aisswamaun iriongeta lu eputos cut kede lu etoswamaete luka asurup kec lu erutasi kesi: Bulaya. Kiyatakinete bobo kesi ayangaun toma Afrika einono loka America nako Nyakoi, kipudaete 'abar wok naengopit' naka einono wok akeje kec. Koipone kalo eraun do kesi abongokin aishwamanar kede kalu araas lu asurup lu ecikakinitos kes aiyatakin koipone lo itegelikina aipugat oni kotoma awomisio kisikakinitos oni awomisio nu longwau kede iponesio lu iswamaet iboro. Kanen do kiyatakinete luka ayuwarak oni ainyikakan oni toma akerianut na igongakinar oni toma oiswamae kede eionono loka Imusugun. Ationus nesi na ebe kwape ejulakinotor kwi araun ipatei luka politks lu egogong aibois na araut ipatei lu iyuwarete oni, emamei bobo yen epedorit aikeun akou ebe aingit, engarenok wok lu itetiek lu epol agogong.

Ationus ace nesi na ebe apotu /alosikinet a wok nu iyuwarete oni kotoma apugan naka ilongwau kosalakisi kede ikorio lu egirunitos ilongwau ngul apakio nu epugaatar kesi oni, ikorio lu egirunutos kwu kede akwara ebe amaapu naka Afrika, aibois na ti kwana oni aishwamanar kalemaritos nu ikorio kalu lu etyakitos ikalia kede atekerin wok. Ikorio luipu emamete kede acoa kec. Etyakatyakatos atekerin, kede

aisilwanaar itunga lu arai ipei kotoma oboro luepu, kwape nat aijaikin kesi einer kitoswamate angajepesinei nuka ilongwau, iyata do alwaniar!

Kwape nat, itunga lukw Shona lu inerasi angajep naka Manica kojaas toma Manica Province loka Mozambique, kesi etyakaritai kane ejaas nuka inacikec kede luka onacekec luka Manica kosiep je lo Zimbabwe. Angajep nautoswamao kanu aisisia kowai je erai Portuguese, kasodete iso ka lailo ko Zimbabwe aitoswam Amusugun, *English*. Eipone lo atyakatyak itunga kotoma oikorio lu mam ajokus kec kede aijaikinit kesi einer angajepesinei nu egelegela nesi idumuni ijo kotoma aiboisio nu ipu nuka Afrika kere.

Aingisete naepol nesi na ebe, nu kere iriamara kede politiks luka akwap wok kede adukun ateker naka akwap?

Kwape nat elimokinitor eong yes, atyonus wok kotoma Afrika wok, nesi ngin akwap kane komamei yen elemara, ageun aiduk etog ekaukau: ageun kokuju atunyuru kobongi arwatat toni omisigi!

Kimunari oni awomoom wok naka Afrika, kosodete kwi aiyat amunarit oni kede awomit ebe, eipone bon lu edoloit nesi adukon ateker naegogong na mam epodokinit eipone lo ekotor eismamae lo ikalia aibiror. Kotoma abeit, ngin pугan ewuta noi abilar ejautene loka ikalia kede atekerin kotoma obukusio kec, ayaranar atekerin, alemanar atyakityaketa nuajokuka kama wok, ebe ewutasi kesi aiteteun akwap na esipokina naka *nation-state*, ibore yen mam epedor kama wok.

Mam aigiruneta nuka ejografi epedorete ayangaun aimorikikina otunga. Ngol eikor kotoma akwapisinei nu Afrika arai ekokor lu egirunio aipwak aipwak toma amaapu apakio nu amariatar ilongwau ngul Afrika bala ibuin emariaete akiring.

Ebeit engarenok wok lolo aiyitun ebe ikorio lu inyekinitos luasurup wok, lu da iyatakinitos alosikinet na atyakatyak itunga tetere epatanar aipuga kesi. Kite oni lolo eipone lo iyatar atyakatyaka na kotoma akwap kere kane ejaas engarenok luka Afrika kotoma oiponesio lu akerianut kede agwelanar kotoma akwap kere, iwanyuni ijo ebe teni epedoros nu elosikinitos kwil! Ate ebuni asalakin iswamai kwangin karai mam oni kwape itunga luka Afrika kinyoun aibwo nepepe, kasodete aimorikikin itiya ngin diope akote adumun owai ke nesi bon iboro lu mam ingarakinete Afrika nepe cep.

Itunga lu ipu luka Afrika, atekerin kec, atekeresinei, italia, ikalia kede igurupun luegelegela luka einono ejarate adeparie ikorio luka akwapin. Erai nu ican ebe ekot Afrikan Union bobo aipepeun nuka eiswamae lo *nationhood*, erai yen ibore yen ebuni aiyatakin atyakatyak itunga wok, naarai ecalaari emina loimorikiknit oni kwape Afrika. Awumokinit eong noi, kwape etunganan lo apaarasia nu loka Afrika eipone lo esibababngare engarenok wok kede ipatei kede eipugae komam bobo epedoritos asesin iboro lu ti edukete ateker naka Afrika, ne ti ijaar oni ejok kede iponesio wok luegelegela luka einono, akerianut kede isuban luka Edeke luimori oni. Kibongo oni kau ikar bala akwatat apakio nu asonya ne emamiar oni apolo naka akwap wok. Karai da luka papaa ka kolo apedoritos alosit kede aibwot aiboisio kere nu akotosi kesi kacut k'otunga kec kotoma akwap kana, ikaru akwatat luatuboros!

Eipone lo apedoritotor ipolok wok ailajaara elosete akwap wok na Afrika komamei aitikitiketa nesi etepedorit itunga apolou adepar lolo: kotoma oinono, owai loka politks kede kwape ateker.

Arai eong etunganan loka Afrika nako Ngalakimak, ilolo apedorit eong alost aiboisio nu ejaas itunga lu iputo kede ka eong kotoma akuan kede inerasi angajepesinei nu eputosi kede ka naka. Ewomit kesi ebe arai eong ediope ka kesi! Konye iboyete kesi kotoma akwap na ejai apugan na ebalala ebe ejai eong adumun apamit naka e *visa* eroko kelomara toma akwap kec aipejokin ipajan ka.

Erai eipone ediope apakio nu alosio eong Kide kede Too naka Afrika. Akes apolou ebe abar naka einono loka Afrika ilolo kede emina lo imorikikinitoni kwape ipei nesi epol ka kere. Kotoma abeit, apaarasi nu, ne ilosio ijo kotoma Afrika kere, iwanyun ijo ebe kelosete ipolok wok ilajaara ilatos kotoma akwap kana kosodete awosikin eiswamae lo ateker na egogong ido kosipo, ibore yen ti kwana epedo aimorikin oni lolo. Ejaas iboro lu egelegela, konye kere epedorete aimorikin oni kwape itunga ipei luka ateker adioep naemoritai.

Ibore yen nesi ijaikin awomisiot naka engarenok lu alolo ebe adukun ateker naka e *nation-state* ibore yen esil noi! Ayau eiswamae lo longwau aitananget naka itunga aibwot aiboi ne ekotosi kesi kede ipajan kec, ibore yen kolo aminas itunga luka Afrika aswam. Mam cut Edeke akoto akwap ke kotyakatyaka toma *states* lu mam itunga ice ecamakinitai alosit toma kwape ekototor? Eraas nu kere nu eyangunitos engarenok lu epol ebit kede adisie naka awomisio kimorikinite ewula loka politks kotoma akwap kere.

Itunga luka akwap kana kere eraas abwotunak ne ejaas kesi. Oni kere kibwotunit ka nenice. Mam eong awomit ebe aimikit itunga aibwot ne ekotosi nesi ebuni aingarakin akwap na kacut aitikokinit

kede agogong kojai aitoswam atorob aimikit itunga lu erucokina aipejonokin kede aiswamanar kotoma ogurupun lu oinono, akwapisinei kede ikorio luka politiks.

Apedorit eong atereun kwape etunganan loka Afrika ebe, kwape ebalare ebe apotu itunga kijualkinos ne araatar kwape icomio toni ojautene lo kalolo, ngin tunganan ewuta aimo ne alibunia nesi ko Afrika. Kwape keraar aiswamaunet naka Edeke ebe itunga alibun kotoma ocomio, kosodete aileleb akwap kere elosete adaun ikaru ilukumin kede adepar, mam eong awomit ebe erai alosikinet naka Edeke arai bo nat akote naka ipolok wok ebe itunga aibwaikino otujai, asadukun. Eiswamae loka apugasinei nuka lolo nesi iyatakint ican lu aisimik itunga adumun aipuc kotoma akwap kere, apolou kede ailajaara. Kotoma abeit, erai ikorio lu mam ajokus kec kede ilongilongia kanu etekerene nepepe ka ikerep luka ediini, kesi eyangaunits ijiisinei luka akwap kosodete aiyat ingungeta kotoma akwap kere.

Angetakini, eyunit eong cut ebe etiono noi adumun aipuc, apolou kede ailajaara kotoma akwap na, ne ejaas aitikitiketa nuipu. Karai ecalaaros ikorio lu luka akiro nuka politks, kipedori oni adumun aipuc, apolou naka akwap kede ailajaara naka itunga luka Afrika, kede aimorikikinit akwap kere.

Esuula 4

Irotin luka Afrika lu Eitunganane

Kotoma osuula lo atubor, awuta eong atemar kebe epol oni kwape itunga luka Afrika abar noi, konye - kwape asaanin nu tesek nuingadao okabadi toni apakio nuitegelikina bon - iboyei oni kotoma abar aibois na oni aitoswam nesi kanu adukunio awate wok ngin paarit.

Atamit eong aitoron apugasinei wok nuka Afrika, kanu aiduk etogo ageun ko kuju atunyuru toni kwap. Konye ngin idiope ka oni da ikamunitos nu, ikoto oni adukun eka loegogong kimurokinite ebe ekal erai itunga idiope diopen iswamunete. Nu nesi akotor eong kotoma atutubet na eitaabo lo, aimor awomisiot ebe ipolok wok luka Afrika apotu kodukunitos itunganan idiope diopen, ikalia kede atekerin nu egogong, nuiswamaete ejok.

Epedorete ikalia agogong kwape egogongotor itunga ke idiope diopen. Iswamauni ekal itunganan kosodi itunganan da aishwamaun ekal. Eishwamanare lo nesi kiding naka eswamae loka *Unhu-Ubuntu-Botho* arai 'eitunganane' lo ejare loka itunga luka Afrika. 'Arai eong naarai kirai oni.' Irai ngin diope kotoma oni itunga lu iswamaunutos luce toma ajar wok. Eitunganane nesi ajaut kede aruconokina kede ka luce itunga kede eipone lo ekal lo esipo lo epedorit aitopoloun oni araun itunga lu iduki ikalia wok kede ajokusio kere.

Unhu-Ubuntu-Botho nesi ejaas kede irotin lu ipu kwape ejautene loka aijar, kanepe kanen kitoploi ikalia, atekerin kitarauni oni atekerin nuka Afrika nu esipos. Irotin lu lukolo ageun apengo kesi iswamaunitai koiponesio lu aitepedoor itunganan idiopediopen, tetere ngin tunga, ekilokit kede aberu, yen ka Afrika kere itolosi aijar ke, ngin na ekal ke, na ateker kojokan kotoma aswam Afrika na oingaren na esipo.

Kotoma oitaabo kalo, alosi eong aitatam eipone lo iteyotor itunga luka Shona irotin arai iwaitin lu. Kejaas ngun da, alosenen aipejonokin akwapisinei nui pu nuka Afrika nesi etipedo eong einer kede itunga lu egelegela, kasodi eong aitagogongor awomisiot ka ebe alosikineta nu ingarakinete irotin arai iwaitin adumun kesi ejaas idulokina toma oinonosio luka itunga luka Afrika.

Kejaas irotin luka *Unhu-Ubuntu-Botho* ageun apengo sek kasonya. Ibore yen icorakinitai oni aswam nesi aiyatakin aita puta kesi adumun apolou kec, tetere kes esalakinete eraas lu ipedori oni aitoswam apaarasia nu kede ican ke kere. Nesi ibusakinitor ayangar irotin itomon lu kwape eipone lo aijar. Ido da iburai oni aitolot irotin lu kotoma ejautene lo ka kwana.

Ketoritos atupakin irotin lu, ipedori oni ayangaun katipet Aiteteunet naka Afrika obe, na da ewut atakanuun. Egeun ber, epatana awanyun nesi kotoma adoketait na itunganan idiopediopen, ekaulo aidounio na naiyareit nesi etakanuni do eweara toni ateker kere. Konye ber ne gearet nesi: aijulakineta kotoma aipuc, abar naka itunga kere kede ailajaara kotoma Afrika na egeunit kane ejai itunganan idiopediopen.

Esisiau eong ebe mam eong apedori aijulakin akwap karai mam eong elope ejulakin. Ebal a kolo

Mahtma Gandhi ebe, ekot ngin diope ka oni araun 'yen eyangauni aijulakinet' na ikoto oni luce adumun! Kotoma abeit, esisiaunit eong ebe eipone lo atipet lo ijulakinet ejautene ka nesi eong aitolomun eipone lo acamunitor eong aijulakineta kede ageun asesen ejautene ka kotoma oipone lo itetet kotoma akiro kere nu ejaas, ketoswamai iroton itomon kwape aica ka na atupit eong.

Aso karai da ewuta eitaabo lo aimuron akiro nuk' oingaren nuak akwap wok na minat Afrika, konye elosikinitai nesi kanu kon kwape itunganan. Elosikinit nesi aijulakin ewoomoe kon kanu ikamunitos iboro lu ingarakinete oni asubun bobo Afrika na ikoto oni.

Eyangaikini kane ejai itunga idiopediopen adoketait naka ko kuju na amisiikinet na ingarakini oni adumun agogong kede atiting na epol naitepedori oni aijulakin eismamae kotoma okal, ateker kede akwap wok kere. Iyengakini oni adoketait nak' okuju nna amisiikinet ingaren noi adepar ebe akote adumun aipugaikina bon kasodete oni ainumunum aruconokina wok kwape itunga: Arai eong naarai kirai oni.

Esuula 5

Kojenu ne ilibunitor ijo

Erot lo Sodit:
Ziva kwawakabva

**Kojenu ne ilibunitor ijo, kojenu
kosodi ayongit ekal kon, ipajan kede
ipolok kon luka kolo.**

Iteyi bala kecoak ipolok wok adepar oni lolo. Ajenete kesi ebe Emoyo loka Edeke nesi ejari ikaru kere kosodi ajai ageun apengo, eroko akwap na kesubia koroko apak da kesubuna.

Ajenete ipolok wok ebe irimirimi Emoyo loka Edeke aimaniman isuban kere luka Lokasuban. Kane ejaas itunga, imanimani Emoyo loka Edeke ido kijaikinitai oni nesi ketoritos ne ejaas ipolok wok.

Aso eong aijen papaka kede ka totoka, kamina ido kayongite kesi nes aijen, amina kede ayongit Edeke. Ajenete ipolok wok da ebe iwuriak wok nepepe ka iwuriak kec eroko kesi, nesi atemar ebe ipolok wok, nesi arucokinet na erioro kane wok, kwape itunga, kotoma akuan ka emoyo kede ka Edeke.

Eroko ijo kegeuna aitac kede alosit ingaren kede agogong kere, akou kikeyitete kuju kede atiting na ewumokina, ekot ijo ajenun ne ibunio ijo. Ekot ijo

aijen, kosodi aiyatakinit aingisingisitoi, nu ikamunitos ataagoro kon.

Kwape itunganan yen ko Afrika ejai ijo etale kede ekiror lo aipule lo ateker. Ekot ijo ajenun etale kon kede ekiror kon lo ateker tetere igeuni aidulokin amisiikin eyistori loka ekal kede itunga kon. Epatan noi oni atwakiar akiro nu ipu nuikamunitos acoa kede apirianut naka itunga wok naarai itoswamai oni noi awaragasia nu mam iwadikao oitaaboi. Eyunitos ipolok wok noi aitoswam awaragasia nu itatamio kede akituk kwape eipone lo isisianakinet ateker. Icorakinitai oni da lu apaarasia nu aisisianakin bonik kasodete aitatamaenen awaragasia nu ikamunitos ikalia wok kede alimonokin idwe wok eyistori lo itunga wok.

Kotoma abeit, ipu iboro lu ibusakinit oni aswam apakio kere kanu abokun nukiamunitos ekal kon kaijar kana. Kigeuni, ekot ijo aikongokin adam kon kosodi abongobong eibwong kede aitatameta nuka ateker kon. Kotoma oibwong kede aitatameta nu nesi ejai edula loka eyistoria loka ekal kon. Na nes ainumunum aitodolonokineta kede abar naka ipolok wok.

Ibore yen iareit nesi aijen kede amina ipajan kon luegelegela kotoma okale lo elal. Ibusakinit aijen kede aiyatakinit arucokina kede itunga lu egelegela loka okale kon, nepepe kede ipapero ka ipajan.

Eyunitos ipolok wok ebe icorakinitai ijo amina ipajan kon ko mam aibwaikinit ikisila toma. Akes apolou ebe mam ijo kicamakinitai aila arai aisac ipajan kon kede ipaperokon, karai da kikote akiro bia. Kisisianak idwe kon aijen ipajan kere luka okale kon. Ebalasiitunga luka Shona ebe, '*kuziva mbuya huudzwa*' akes apolou ebe, 'aijen Tata nesi ajaut kede acoa'. Apaarasia nu, iwomit oni ebe ejai

idwe ikulepek ajenun ipajan kec kanukec bon. Iwomit oni ebe epote kesi ikulepek adumun kede aseunun itunga lu erucokina kede ka kes kotoma omeeban luka okale.

Mam nu iswamaete nepe cep!

Erai aisiais nuikamunitos ekale kon ibore yen egearo eroko idwe edisiak.ejai kesi aiswamaun ajenanar, kosodete arucokina ejok ne ejaas luka papaa kede nuka tata kec, iinacan kede ainacan ace kec kede ipajan lu egelegela. Ibusakinit nu ajun eroko ikoku edit, naarai idwe wok egeunete eroko edisiak aswam aswamisinei nu egelegela nu ekot ekal lo elal, na araut papa, toto, mamai, ija, kede ajenanareta ace tetere ngin tungan kere ejai eirian kotoma ateker iswamai nesi nu esubakinitai nes. Erai na eipone lo ejokunar aitemonokin kesi araut itunga lu iboyete ateker kec kojenajara ejok kede itunga kere: isisianakini oni aswamisio nu aboliya idwe edisiak ebe luka papa arai nuka toto aitemokino aiswamaun nu ipoloor. Emamei bobo eipone lo ejokuna adepar lo kanu aitemonokin ateker naepodorit aitlot aijar na kotoma oiswamae lo akotos ipolok wok.

Ejai bobo eipone ece lo ipedoria oni aitemonokin atiokusio nu aijar kokau kotoma aijar arai mam igeuni kidisiak?

Komina ido koyongite iwuriak kon komam aibwaikinit ikisila. Epolok nu noi, naarai ijo da kijaas kede ekal, ikoto mwakacet ipoloor arai kimojong idwe kon amin kede ayongit ijo, komam ibwaikinitos ikisila, karaida ikote akiro ai.

Kotoma aijar ka ajenu eong ebe karai mam ijo imina ido koyongite iwuriak kon ageun idite, ne ipolooror ijo, epote luce tunga da, ipapero kon kede ka yen idukotor ijo, amina kede ayongit ijo mot noi kwape iteyoto kesi iwuriak kon kede ka ijo.

Ideleleunete akiro nu apakio nu iceleta kede ipapero arai bon nat kede ka yen idukotor ijo.

Nesi epolor noi, kwape *eitunganane*, aijen ne ilibunitor ijo. Kisitiik akon adam isawan kere ebe, ngin pak kijaas ijo kede ipolok kon nepepe ka Edeke Lokasuban kon. Ngin pak na ijaaria ijo iwuta ijo aitodolikin nu epudas ipolok kon kede Edeke ijo aswam. Kanu kangun, ejai emoyo kec kede ka ijo isawan kere. Ingarakini ijo ibore da yen bobio arucokina isawan ne ejai Edeke. Mam ijo iteyi, ipolok kon idunyasi noi kede Edeke naarai eroko ijo kewuruna kojenete kesi Edeke, ketwakata kidunyakinos do noi kotoma omoyo.

Aso, ipolok wok kanu kangun ijo kede ka eong mam ikoto ibore bobo ice yen egogong kanu arucokin oni ne ejai Edeke. Mam oni ebeit aisiom iitaaboi lu acoa. Mam oni ikoto ice itunganan abunere aiduma mama wok. Itunga kere eirian k'akonye ka Edeke. Mam ijo ipolokinit imodio tunganan. Mam ijo ijai akeje ka modio tunganan. Mam yen ejaas nesi bon kede aijen Edeke. Icorakinitai oni do kwape itunga luka Afrika aijen ebe aisikwarun acoa wok kede aijen nu ikamunitos oni, kede aijen ebe ipolok wok kede Edeke kesi kijaas ka oni ameun apengo mam bobo oni ikoto arucokinet na emoyo ece.

Esuula 6

Kojenu ne ilosi ijo

Erot lo Iareit:

Ziva kwaurikuenda

Kojenu ne ilosi ijo kosodi aitodolikin atalatan nuijaikinit ijo Edeke.

Kwana do ijenu ijo ne ilibunitor ijo, kosodi Kaiyatakinit kotoma alipasinei arucokina ne alibunia aijar kon tetere itepedori ijo adumun atiting, ipedori do kwana ijo ajenun ne ilosi ijo kosodi adumun iboro lu epolok kotoma aijar kon.

Aijar kotoma akwap kana kotoma akwap akolong nesi erai alosit esapali konye mere ne dolot. Edolit ido epol noi kotoma aiajr kan ailel kede aswam iboro luibusakinit kanu aitodolikin nu.

Aingiset na epol nesi na ebe eipone bo ani idumunia oni ailel kede aswam naibuni aitelet? Eipone bo ani kijenuna ijo aswam na edolit atupakin, anyoin aijar na ikoto ijo ajaut kede? Nu ajeni eong nu ikamunitos aijar kon, kesi nu ebe iburai acamun sek koroko apak ebe ijo ilope nes idumuni nu kotoma ajenun ebe ingai ijo. Ipu iboro noi lu ipedori ijo aswam kotoma aijar kon. Mam epatana aseun erot lo ebeit aitup. Ebal acoa naka ipolok wok ebe kiseuni ejaas iwaitin iarei lu ebeit atupakin nepepe:

- Lo sodit nesi aswam kede agogong noi arereng na idumunia ijo aswam, kitoswamai atalantan kon kere nu ejokuka nu ijaikini ijo Edeke kon kede ipolok kon. Kiswamanara ijo kede iwuriak kon ipajan kede idunyeta kede, idum kwana ijo apirianut naepol kowaitin ice. Etapit duc oni aswam iboro lu ejenatar itunga wok noi ebe kesi eperiaka. Ekal kon kede ipolok kon kesi iyalamasi awanyun ebe iswamai ijo ibore yen koinono kec yen inyekikinere ijo. Nu ikoto ijo kede nu ekotosi kesi, erai ebe itoswamai ijo arereng na idumuni ijo kojokan noi aidep ber bobo kesi da.
- Ewai lo iareit nesi ijo ilope ajenun ne ijokunar ijo kojaas atalantan, nu mam ijo kitoswamator. Erai ijo ilope amisiikin ibore yen idulokina etau kon toma. Kotoma aijar ipedori ijo aswam nu ipu noi kede adumun noi kotoma kec arai ipedo ijo ajenun obe ne idulokina etau kon, kacut eroko ijo apak kede agogong ejai na tupakinet amina kon. Epatana ijo ajenun arai ejai etau kon toma aswam na idum ijo. Ne idumunia ijo aswam na idulokina etau kon toma kogeuni ijo aswam nesi, apak abwoun abwoun. Imina ijo aswam na noi, kowanyuni ijo ebe toma kon kijaas ijo kede agogong naepol noi kanu aswam nes. Kanen do kodumuni ijo ebe iswama ijo ejok kodumuni da nuipu, kede da bobo ebe ibuni ijo alakar noi!

Konye ekot ijo aiyitun ebe ipedori ijo ajenun ne eperio etau kon karai *iswamau ijo ibore*, kotoma aswam aswamisinei. Kwape nat alimunitor eong, ayinakina na kede ne eperio etau eraas toma aswamisinei nu ejenar ekal kon, arai nu isisiauni ijo kotoma okal, arai ace pak ibore yen ipwakuni ijo

yen itetet kotoma okal kus, konye korai ne idmunia ijo agogong na epol naitetet.

Kwa ilosio ijo kotoma aijar kana, ekot ijo amisiikin alosikinet kon kotoma aijar kacut kotoma *apak ngin kaijar kon.*

Mam ipodo noi naarai epedori alosikinet kon kotoma aijar aijulakin kilosi ijo ingaren. Nu epolok kes nu ebe kangin pak itolosi ijo aijar kon kotoma alosikinet naibecokina.

Abu eong kesisiau nu kere, aroko adite noi, kama ejai totoka na akukurana noi. Kwape itunga kere lu eroko edisiak, awomit eong ebe ne adauna eong aswam na akorakinitai eong abuni eong do ailajar, kosodi arai mam eong awomoomot ibore ice yen iswama, mam eong nu iswama. Konye ngi pak na adumunia eong toto ebovei komamei ibore yen eswamai, kasodi eong atemar ebe amamei ibore ice abeit eong aswam, arai ebe eong adaun aswam ace ngipengin, kejaikini eong toto aisisianakinet na kos naka aijar: "Icorakinitai ijo adumun ibore yen iswama kanu kon, ibore yen ingarakini aijar kon kangin pak."

Lo nesi emoyo lo eismamae lo itemonokini ijo kanu aswam iboro luepolok kotoma aijar. Erai bobo lo emoyo lo ijaikini ijo ituriakin awomisio kede acoa nepepe ka arerengusio nu ti engopitos. Ewomitos itunga ice ebe arereng eturiaun aturiaun. Konye eong kanuka ajeni ebe arereng erai aitolomunet naka aswam kede agogong, awomoom ingaren kede akapakina angicunun arereng na etakanuna.

Itunga ngul lu etolosoto aijar kec kede aswam kede agogong ido kokapakina apakio kere kesi etapit awanyun arereng ne etakanuna. Ne iswamaatar itunga ngul ejok kotoma aijar, kotemarete itunga lu ekalanyaka ebe keari ngin arereng bon. Erai abeit ebe, arereng imorikikin

kede akapakina aswam kede aitoswam arerengusio
nu eturiaunos owai wok.

Esuula 7

Kipitu Ewomoomoe kon

Erot lo Iuniet:

Iva munhu anozvibata

**Kojaikinos kede etau lo ewoj ido
kopol ailel isawan kere – kipitu
ejautene kon lo amin arai anyunyura
kosalakite kede ewomoomoe lo
ejokuna!**

Nasodit, koraun itunganen yen elakara, arai da
Nikote iboro ai. Ebalacobeu naka frika ebe
ekot ijo aige kede araun itunganen yen eleli, konye
do idumuni iboro luedepara kotoma aijar. Kotoma
akwap naka apaarasia nu irumit oni eibel lo akote
adumun abar, bala ebakai ebe arai mam ibarit
mam idumuni alakara kotoma aijar. Nu nesi
idumuna ijo itunga lu ipu lu ebalai ebe ebaritos
ilubuluba aiyalongongo kede aiturur. Iwanyuni ijo
kesi eroko ewutasi amoot abar na iyatakina. Irwan
na ipu, mam itunganen kwape ka yen ebuni
acamakin ailel alomar akuan ke idimarai kedumu
abar ace.

Ipu lolo kotoma akwap na, itunga luka Afrika lu
ejaas ejok mot ebe *middle-class* lu igurokina akwes
kanu aijar kere, edumuni ijo kes iyunitos ebe ailel

nesi eyangauni adumun iboro lu itingi ijo da. Aronus nes na ebe, karaida mam adumun iboro lu abar erono kotoma ajar wok, konye arai eipone lo edumunere abar na mam epodokinit ajanara ejok kede ka luce, kede ijo ilope bon, kede kana owai kon arai kalo owai kon, itunga luka okal kon, ipajan, ipapero, irwan ipu ne do idumunia ijo nu ikoto ijo, adumun ebe idau ijo atyakatyakaun kotoma akiro kere nu irucunokitos ijo kede nu epolok kotoma ajar! Aso irwan ipu idumuni ijo itunga lu adumutu abar na epol noi konye mam bobo ejenanara kede ka luce itunga, aso do kanen mam do kesi edumunete ailel na awutasi kesi ajiun. Ace apak do koremokinos do aiyatakin aimo abar na edeparit nen, adoketa nuka ko kuju nu abar, kowomitos do ebe acepak nen ebunio ailel. Konye nu kere iyasete ekolo kede ebit.

Eong, kwape etunganan lo asiomit ido karai epiriot kotoma aswam ka, abu eong ekila noi ageun aswam apakio ngun. Awomit do eong duc ebe abuni eong aswam noi kede agogong kasodi agwelun emotoka lo ajokan. Kotoma abeit, epuda eong agwel adioe kangun nu elayete noi nuko German kayunakina alemar ailel akuan ka toni eong adumun amotoka ngin. Konye abu do eong awuny ebe ne eyasi eong agogong kotoma aswam ka, komam apodokinit nuka apolou naka emoyo kede ewomoomoe ka, komamuun do ajokus na adumun abar da.

Aso ne do agweluna eong emotoka e *BMW* lo alayi noi ajeni eong ebe mere nesi ebuni aijaikin eong ailel. Kotoma abeit, mam do bobo eong apododa karai da mam eong agwelit amotoka ngin na apol ebeyi kasodi agwelun na edit etiyai. Ibore yen aiturur kowai ka nesi na ebe, eteyi eong duc itunga luka Afrika lu ejaas ejok mot, ipajan kede

ipapero ka, idwe ka, iinacan kede ainacan ka, kere ejaas arukitor ekwam koiponesio lu aimo ailel. Luipu edumunete ebe atyakatyakasi kede aruconokineta kere nu ekal kede ipapero itunga lu apol ajokus kotoma aijar kec, sek eroko ber kedumuna da ailel na emoyete kesi. Ti mam erai kwangin.

Ejokuna ti noi, adumunun iboro lu abar, arai mam edumune kec egwelari alakara kec. Kotoma abeit, atereuni eong atemar ebe itunga ngul lu ejaas kede 'etau lo ewoj' eroko kesi egeara aimo abar, kesi ne edumunatar kesi abar kec epoloor ido kolakara kesi da. Kosodi irwan na ipu, lu kes itunga lu itoswamaete abar kec kanu aitipoloo ateker kec kede itunga kere.

Kotoma aijar kana ekot ijo ngin paarit alimonokin akuan kon ebe: "Abuni eong araun itunganan yen epol ailel kasodi eong aisurum luce tunga da ailel ka, aparaasia kerel"

Ebala acoa naka Afrika ebe ejokuna abar kosodi nesi epol kanu alemar ibakor kede aiticaneta ace nuka akuan kotoma aijar. Mam ecamunitai, kotoma awomoom naka Afrika, adumun abar kede atukokin nesi idiatun kanu nesi apogar komam itoswamao nesi kanu ajokus naka ateker. Kotoma abeit, eyinakinitos itunga luka Afrika itunganan yen edumuni abar kitorite aswam kede agogong ka akukuranut kede aitolomunun aswamisinei kede agangat na epol adumun ke kotoma ateker. Kejaas ngun da, ameun apengo, ingitanakinos itunga luka Afrika noi arai edumu itunganan abar na mam kesi ejenete ne elibunitor, na eturiakin itunganan akwenyun adumun ebe abar ikalany da, kacut abar na mam elibunit kotoma ateker adumunun aswamisinei arai bo nat agangat.

Eebo, kotoma aijar ne adumunia eong alosikineta ka, abuni eong aiyalamikin, karai da adum eong airebokineta ekot eong ayatakininit arai itunganen yen alakara.

Kanu ijo araun itunganen yen isalakinit koleli ekot ijo ajaut kede "etau lo ewoj", arai "*moyo murefu*" kotoma angajep naka Shona. Etau lo ewoj kotoma Shona, nesi acamunit nu epote kere, atitingu kede anaikinit, nepepe kede amina akuan kon kede ka luce komam aibwaikinit ikisila toma. "Ajaikin kede etau lo itingitor ijo akuan kon" arai "*kuzvibata*" – akes apolou ebe ijo aipitun ewomoomoe kon kede nu ikila etau kon. Apotu kolo ipolok wok kongicutu nu acoa naka adam sek eroko Imusugun luka sayans kelimuna nu acao na adam. Kanu ijo aipitun ewomoomoe kon kede eikila lo etau kon ejok, ekot ijo aijen kede amisiikin ejaytene kon kwape itunganen.

Aso ibore yen sodit kanu ijo ajaun kede "etau lo ewoj" nesi ijo ajenun akon akuan obe. Ne nesi ipedoria ijo aipitun eipone lo ajenanar kede aruconokina kede itunga luce. Eitunganane nesi apedorit aipitun ewomoomoe lo etau kon, tetere konyet ipedori aipitun ajenanar kede ka itunga luce.

Etapit oni duc aremokinit luce akori ebe kesi nesi ijaikinit oni iswamai iboro lu iswamai oni, kede ipupi eipone lo ipipia oni. Edyakara na noi. Ebala acoa naka Afrika ebe mam erai akiro nu ilimokini ijo itunganen, arai ibore yeni kiswamaikini ijo itunganen, nesi ijaikini ijo nu ebeit aswam. Konye erai nu iseuni ijo aswam kedau itunganen ngin arai aiteleb ijo arai bo nat aisunyurikin ijo.

Karai isisiau ijo aipitun kede ajaut ka "etau lo ewoj", ipedori ijo aipitun awomoom kon kede nu ipuda etau kon, tetere ijo isalakinit kwape

itunganan yen aijen ido nu iswwamai ijo koraas nu aijen kangin konye mere kanu itunganan yen kijaas ka ijo apak ngin!

Kotoma apolou ka kotoma okal lo epuwatatar itunga lo inacan iongon kede ainacan da aongon, ipedori ijo araun lo epali kosodi aswam amengerikinit luce ido kopedorite asabanakin luce kanu adyakanareta kon. Atapit iso aswam nu kanu aboliya eipone lo ikotor kere. Nu ican lolo, awanyu eong ebe itunga luipu mam epolounete ailakar eismamae lo awai kosodete adumun aiynakina toma aswamisuneikec kede acamunun adyakanareta kec, karai da epolooros kesi kede akoruo kakwes. Etapit itunga akurokin aipitunun awomisio kede eikila lo itaon kec. Kanu kangun, idumuni ijo kes itoronitos ice kanu adyakanareta kec.

Ne arokor eong adit, atapit eong airengenen amotoka, konye adit eong atitingu noi etoswamai eguudo. Atapit eong amoronor kede iderepan luce lu amayete irengeete amotokan kec. Konye ne esisisiauna eong aipitun awomisio ka kede eikila lo etau ka, eipone lo ajenia eong ebe kepedorototor iwuriak ka nepepe ka itunga ice da eroko kesi da kepolouna. Abu eong kamisiik ebe emamei ajokus naka aremun amori kinga korot amoronor kede ka luce naarai iswamau yi aronus koingaren kon. Mam ebusakinit eong anyunyurikin naarai ewuta yi aisunyurikin eong kede eirengee ke lo aronon. Arai eong elopet nesi aesuni nu ebeit aswam: arai anyunyurikin arai mam!

Irwan ipu abu eong kajenu ebe aoedori eong elopet aseun aisunyurikino arai mam ne ejaar itunganan yen ewuta aitipas eong. Eroko ewomoomoe kede aswamisio kere nu erai aseunet ka. Etapit ne ekotor itunganan aisunyurikin eong

kasodi eong aseun aigir anyunyurikin, idumuni ijo yi enyunyurikin noi ebe kanu inyo angerio eong anyunyurikin! Akes apolou ebe kerai alosikinet kec aisunyurikin eong. Konye ne aseuna eong elope kotoma otau ka eipone lo bongokinet nu, apedo eong aipitun nu ti etakanutu kangeri aitoswamao kotoma oipone lo akotor ice tunganan.

"Etau lo ewoj", kanu kangun, nesi ibore yen epol kakere kwape yen egwetununei nu iswamas kotoma ajar wok – erai eswic loka 'ajaun arai mam' naka ibore. Ibore yen awasia yen ekotokin itunganan nesi ajaut kede ne igwesere ijo kokinga, ne itutubere nu ebeit ijo aswam kede nu mam ijo iswamai korai ice itunga igwesete ijo kwape ekototor.

Icorakinit oni ayitunit nu! Kotoma apaarasia wok nu, ejaas iboro lu ewete iyemuto kwape nat iredion, etelevisiion, apapulai nu iyemuto arai nu agwelanar nu duc etapit aigwet eipone lo ewomoomatar itunga kede lo iswamatar kesi iboro. Siri kicamak iboro lu lu iyemuto aigwet ajar kon: ekot ijo duc kocaete akonye ido kopupete aki kodoco tetere ijo ilope nesi itutubi nu ebeit aswam kede awomoom kangun kere nu ipupi ijo arai nu iseseni ijo. Kacut ka kere, kiyitu ebe.

Itoswamao iboro lu lu iyemuto kanu ekototor ice tunga ijo 'agwel' arai ayangar awomisiot kec, aseun epate kec arai agwel iboro lu egwelanarete kesi. Mam ikes kwi epodokinitos eipone lu abuyikin ijo acamun nukec. Itoswamaete acaosinei kere nu epedorete kanu aijul adam kede etau kon.

Kwape nat, idumunete kesi ijo elope iwuta ebe aiyengun mot kiteyi etelevisiion komam adam kon kecoikinit, kogeunete aitodikin ijo apese na itemelel arai ekilokit lo ilegetet kede ibore yen ekotosi kesi agwelar. Kinyalakitete kede emusik lo ejijim aipup

loka America, mere kikamarete ijo kede edobo kec! Karai mam adam kon ekwenyuni, mam ijo ijenuni ber da ebe kikamar ijo awomoom ebe karai igwel ijo ibore ngin ibuni ijo da araun kwape apese na etemelel arai bo nat ekilokit lo elegetet, arai bo nat adumun aupasia kwape kangin. Aso kogeuni bobo ijo awomoom ebe ekot ijo amisiikin emusik loka Amerika tetere aijar elakar.

Aikamar awomisio kon nu ikamunitos nu kwape aelo nesi ibore idiope epatanikit iboro lu iyemuto aitoswam aikamara eismamae kon kosodete aigwet ijo kokinga. Karai mam ijo kijeni nu ibuni ijo adoere toma amutego na itimudaki adam kede awomoom wok kasodete aswam iboro lu mam oni kebeit aswam. Nu nesi iwanyuna ijo ebe lu ipu ka oni etapit aitoswam apiyai noi adepanar ebajet lo oiriago wok, etapit oni ainyam adepar ne edolit, dimi kito edoo adakai okume, kede apuwoi noi kotoma akiro nu aelo. Konye arai kidum ijo etau lo ewoj kosodi ijo elope aiting esuic kon, emamei eipone lo igwesere ijo kokinga, kotoma awomisio kon arai kotoma akuan kon.

Kiyitu duc ebe etau lo ewoj nesi ibore yen erai ijo obe kede emoyo kon da teni. Mam epotosi kede eibel kon. Erai eibel kon ibore yen kokinga ido kogwesi ijo akuun, kwape ikotor ijo luce aite kede ayongit ijo. Nesi iwanyuna ijo ebe ne etamakina itunganen ice atiror eibel epoget kon, ijo lo idedengar noi naarai ikoto ijo ayuwarit epoget kon.

Akes apolou ebe mam eibel kede epoget kon eraas ijo elope obe. Eraasi lu iboro lu ingalaikinitos ijo. Epoget kede amamus aijen eraas ipajan lu idicas.

Ekot ijo adukunun akuan kon kede eipone lo ejautene kon kangin paarit. Itunga luipu etapit awomit ebe aswamisinei kede iponesio wok kesi

mam ijulas karai da ikote akiro ai. Mam na erai abeit. Kotoma abeit, ibusakinit ijo aisitikin akon akuan duc ebe ilosi lolo ijo aswam kede agogong ejok iboro lu ebeit ijo aswam apaarit ngin, tetere ipedori aiyatakin ajokunar kotoma aijar kon.

Ekot ijo kojaas kede aputo na ecai kotoma akou kon na itunganen yen ikoto ijo araut, tetere ne ilosio ijo aper obong, kede ne ikwenyuna ijo tipuruc nace, kirwanaari ijo kosodi bobo aisitikin akon akuan ne ilosi ijo kede iboro lu ebeit ijo aswam tetere idoli ngina.

Irai ijo itunganen yen iswamaunitos atutubena nu epolok aongon:

- Akuan kon
- Adam kon
- Aipup na etau kon kede
- Emoyo kon

Mere ber eong ketetem nu ikamunitos ijo apoloun ido aiduk akuan kon kotoma atutubena ngun aongon. Erai akuan kon aitoduunet na ejautene kon na epedorio aiting kede akan aitigogongor ebe kijari ijo. Adam kon nesi eijin loka ewomomoe kede eismamae loka akuan kon nepepe ka eibel arai epoget kon. Ingarakinit ijo eipone lo epupio etau kon ajanara kede arucokina ne ejaas itunga ice. Kosodi do emoyo kon araun ijo elope obe lo irucokina ne ejai Edeke Lokasuban kon.

Ngin tutubet kanu ekot duc apolou, kangin paarit. Akuan kon ekot ijo anyamenen inyamata lu ejokuka lu edukete akuan nepepe kede aswam iboro lu ecalaunete einyinyir kinga alemar asiepai nu mam ejokukaakuan, adam kon nesi epoloi kotoma awomisio nu otetiake kede aiyat acoa kangin paarit, ewomomoe lo etau kon kotoma oipone lo ipedoritor ijo aipitun etau kon kowoj tetere aijar

iteyio ejok, kosodi do emoyo kon apolou kotoma ijo aitogogong duc ajaanara kede itunga luce kede araut ipei ka kesi, kede isuban luka Edeke, nepepe ka Edeke.

Kiyitu duc, koricu akuan kon ido kopedo aipitun etau kon tetere kere nu iswamai ijo ejaas oipone lo ikoto ijo lo ejokuna. Kojaunos kede etau lo ewoj, tetere ijo mam igwesio kokinga, korai ijo ilope nesi iseununei nu iswama. Kingetakini, koraun itunganen yen eleli, karai da ikote akiro ai. Kogeu ber kede alakara, kosodi konyet do aitolot aijar kon.

Mam idareuni toni ijo adumun aswam na epol eropit, arai toni ijo adumun apiyai nuipu, ebe nesi konyet idumunia ailel. Mam ikote nen.

Kolakar ber, kolosi do ingaren aiya akwap. Koipone kalo, ibuni ijo araun itunganen yen eleli duc, karaida ikote akiro ai.

Esuula 8

Kiraik kinyom lu Amina kon

Erot lo longonet:

Ita basa nemoyo wako wose

**Kanu iswamai ijo kere, kismama kede
etau kon kere, kede agogong kon kere
nepepe kede atitingu. Lo bon nesi
eipone lo adukun akwap na abeit.**

Emamei ibore yen ejokuna kotoma ajar adepar ne ipupio ijo ebe nu iswamu ijo itodolokinitos alosikinet kon. Aswam iboro kotoma nu ekot etau kon nesi ibore idiopé yen epol kakere. Ejai alimunet adiope kotoma angajep naka Shona ebe: '*kufuma shungu*', akes apolou ebe 'abar na abeit nesi ejai toma amina na etau'. Aso ekot duc aswam iboro lu emina etau kon, kede agogong kon kere.

Ebala bobo alimoret na acoa naka Shona ebe '*sango rinopa vaneta*' arai ebe 'Kijaikinete ijo amagoron inyammat kede igoen arai ipasit ijo'. Akes apolou ebe ekot ijo aswam kede agogong ijo elope, tetere ipolok kon emamei eipone lo giris aijaikin ijo arereng kanu aswam kede agogong!

Erai ajar alosit esapaali konye mere aibois ne adoli. Eipone ece lo limunet nu nesi lo ebe, kotoma ajar mam erai iboro lu idum ijo arai adoketait na idol ijo nesi epolok, konye eb kotoma

oipone bo ani idolio ijo nen. Erai aijar nu ikamunitos nu 'eipone' konye mere 'inyo adumun'.

Ajenete ipolok wok ebe karai kesi aisirereng oni kosodete aibuk oni abar kere na ikoto oni komam oni da ikulepek ainyinyir adumun abar ngin, ti edit arai emamei ailel kotoma. Aso, nesi epolor aswm kede agogong kede alosikinet kanu wok ikulepek. Aswam, ejai alosikinet arai ijeni ijo nu ikoto ijo katenak. Arai ikoto ijo aswam ibore aitodolokin ejok, ekot ijo ayinakina nu iswamai ijo kosodi aibwaikin agogong kon kere toma.

Emamei ibore yen epoloi arai ajokunar arai mam nesi edumuni alosikinet kede ayinakina kama yen iswamai. Kingolik ijo ne ijai ijo, kongolia ere kon, idwe kon, ajenamar kon kede ka luce, aturo kon ni irai ijo, etogo kon, ejautene lo apiyai kon, iwanyuni ijo ebe iboro ngul lu kobu ijo kibwaik agogong toma kesi lu epoloete ejok.

Ebala acoa naka Afrika na Shona ebe '*basa mangwanani*', akes apolou ebe 'aswam nesi atupuruc na ecauni'. Aso karai ikotokin ijo adumun ibore, kodilok akwenyun tipuruc sek kogeu aswam ngin. Lo bon eipone lo ibwaikina ijo agogong kon kere toma kocai akou ejok.

Kiyangauni na oni ne ekotor ijo ajenun eipone lo aijar kon kede agogong na akuan ka eipone lo iswamatar isuban luka Edeke aingarakin ijo. Ekot ijo aitmokin aswamkon tetere ijo ipedori aswam iboro lu epolok kotoma aijar kon eroko agogong kede apak ejai.

Bobo da, ekot ijo aisisiaun aitemokin iboro lu iswamai ijo tetere kesi ecaete kotoma adam kon ido kowupasi. Edolit aijen noi ebe iboro kotoma aijar na ewupanara. Karaida ikote kesi bala elwaninikina bia kotoma aijar arai kotoma awomoom: iboro luipu ejenamar. Aso arai kijaas ijo kede alosikinet

nuipu nu egelegela, aswamisinei nu ipu nu mam eputos, etonio noi aitodolikin kesi naarai ekolosi kanu apak kede agogong kon. Epote iboro ice kede alosikineta ace arinyor kosodete atwakare.

Aso eipone ediope lo pedoret alosikineta kede aswamisinei nu ipu nesi ijo aiboikin kwap kosodi aiko akou kon toni adumun aruconokinete nuka iboro kalu. Ne ipedoria ijo ajenun eipone lo eruconokit iboro lu ipu kotoma ajar kon lu epolok nukec, nen do kopedori ijo aswam iboro lu ipu kotoma apak ngipengin, kopol agogong kede aitodolokineta.

Kwape aitetemet, kwape toto ka kede ka papa, arai eong da etunganan lo eswamai iboro luipu noi kangin pak. Akoto eong aitodolikin ngin ka kesi ejok. Epol eong arereng etodolikinit eong luipu kotoma ajar ka, kwape nat aswam ka, ekal ka, iboro lu kijaar eong, ajenamar kede ipapero kede itunga ice lu minat, kede ice da. Karai da kotoma aswam ka etapit eong aitingit aswamisinei nu ipu. Ewumokinitos itunga ne adumanakini eong agogong ne kere kede apak na aswam toni adumun aitodolokineta apak naepol.

Epatana abongokinet: iboro kere lu epolok kotoma ajar kon eruconokina ido ejenana. Amoyi eong ngin pak aruconokineta nu tetere ne eswama eong idiope ibore yen epol kotoma ajar ka awuta eong apak ngipengin aswam iboro ice lu eruconokineta kede kangin. Ne ewama eong ibore idiope, eyasi eong luce lu erucokina kede kangin.

Aso bobo, mam na erai aitolomunet na awomoom arai apirianut, naarai mam eong aco arai apiriana adepar luce tunga lu ajeni eong. Konye aibois na eong aitoswam acoa ka bon, etoswamai eong acoa na isuban luka Edeke. Eraas isuban luka Edeke iboro lu ingarakinitos oni ajenun

aruconokineta nuka aijar. Kisisia ijo ejautene lo isuban luka Edeke ipedori ijo amisiikin eipone loajenamar kede aruconokineta nu iboro kotoma aijar kana.

Ebala bobo acobeu naka Shona ebe 'chawawana batisa, midzimu hayipi kaviri' akes apolou ebe, 'Kiting kede aburacu ibore kere yen idum ijo. Mam ipolok ijaiknete ijo aitodolokinet ngin irwan aarei.' Ejai akirot na eputos kede ka na kotoma Amusugun ebe, '*a bird in the hand is worth two in the bush,*' ebe idiope ikweny yen kakan edeparit ikweny iarei lu eroko ejaas ais. Apolou ka akiro kanunes na ebe ekot ijo aibwaikin agogong kon kede atalantan kere toma aswam ibore yen ejai ijo, ibore yen idau ijo adumun kotoma obisines arai aswam kon, arai ajena na ejai kwana itiya ijo amoete aibwaikin agogong kon awai. Aso aswam kede agogong kede ayunakina nu iswamai ijo kesi itepedorete ijo ajenun kojokan nu aruconakineta nu ejaas kiding aswamisinei kede arerengusio, adepar ne ikilar ijo aiyat aswamisinei ace akuan. Kibwaik agogong kon kere kede apak toma obisines nepepe ka aswamisinei nu ejai aruconokineta arai nu irucokinete ijo ejok kede ajenamar na ejai, ebuni na aingarakin ijo adumun aitodolonokineta nuipu kotoma aitoswam agogong na edit.

Esuula 9

Koyinanak luce ejok, Kijaunun kede Aiyalama

Erot lo Ikanyet:
Batsira vamwe

**Kingarak luce, koyinak luce tunga,
kijaunun kama kec kosodi
aiyalamikin kotoma aijaanakin kede
aijaunun kama ejaas luce da.**

Emamei aiyinakineta na epol na ipedori ijo ayinakain itunganana ice adepar agangat kede aingarakina. Aingarakinit itunga luka okal, na owaikon arai lo owaikon, ipapero kede itunga lu iswamaete kede ka ijo nesi ingarakini adukun ajenanara.

Epol noi ijo alomar toma ajenanar kere kede ewomomoe ebe, 'abuni eong aswam kere nu apedori aingarakin'. Mam ijo ibusakinit araut eporiot da, arai bo nat yen ibarit noi, arai bo nat yen epol agogong na amori konye ipedori ijo araun itunganana yen ingarakinit noi kotoma ajenanar arai ojaute. Aso, araut itunganana yen ingaranakini luce erai ewomomoe.

Epdori itunganana araun yen ingaranakini luce kotoma oiponesio lu egelagela. Ajeni eong ebe kotoma Afrika na apaarasia kanu nu itetiak,

atwakiasi itunga luipu acobeu na wurunet na oinono naka Afrika, na ebala ebe ejokuna noi ido ilegetet aijanakin kede aingaranakin, kacut arai ijaikini ijo agangat kede aingarakinet kotoma oboro lu mam itingas akanin.

Itunga lu ipu luka Afrika ewomomoete ebe apiyai bon kesi iboro lu epolok kwape aiynakinat na dumuna arai na ijaikina luce. Kosodete atumunak luipu luka Afrika arima kotoma osipan okanisan kede oriongeta luce ajainikin aisumunet na apiyai, kiyunitos ebe erai na aiynakinat na agangat ka aingarakinet na epol, kwabo mam erai kwangin kotoma aijar.

Irwan ipu mam itunga lu ijaikinate agangat kede aingarakinet oreria kec ne ejaas itunga luka okal, ipajan kede ipapero arai bo nat lu iswamaete kede ka kes da, konye kolosete okanisan aibuk apiyai arai bo nat ososayati.

Ejai adyakaret na kotoma awomoom ebe nu nesi ekoto Edeke kosodi nesi erai nu edolit aiswamaikin itunga lu akwap naka lolo. Konye erai na esabet. Iburai ijo aijaikin agangat kede aingarakinet kogeuni kane ejai ekal kon,ipajan, ipapero, naarai kotoma aijar na akiring na kede na emoyo da, lu kesi itunga lu irucokina ne ijai ijo noi. Icorakinit oni ajenun ebe kotoma oinono loka Afrika kede acobeu, aijaunun nesi epol kwape aijaanakin. Kotoma ajenanareta nu ipu ejokuna ijo ayinanakino kwape iyinanakina ijo da luce kacut ngul lu epolok kotoma aijar kon. Kotoma abeit, ejai ne epolor adumun aiynakinat adepar aijaikin. Bobo nu ican, atwakiasi itunga luka Afrika acobeu na kos na naka ipolok wok.

Mere ber eong kejaik ijo atetemet: arai ejai ijo eidunyet lo mam ebarit kwa ibaritor ijo kede iboro, erai ijo nesi ipedorit noi aiynanakin nesi agangat,

adepar ne epedoritor nesi aijaanakin ijo. Konye iwanyun ijo ebe eidunyet kon lo arai erai etunganan loka Afrika obe, epedorit ayinanakin ijo ayinanakineta kotoma oboro ke ikidioko da, kotoma otau lo aitodikin ijo ebe imina nesi ijo ido ipol ijo kakaonye ke. Do kwana ijo, ekot ijo aijaun ayinanakineta ngun kede etau lo amina karaida mam ijo ti ipuda kes naarai ijai ijo ejok sek. Iwanyuni ijo ebe arai kerai ijo bon ijanakini luce kogirite ijo aijaunun kama kec mam ajenandar elosi ejok.

Kotoma omoyo loka Arika lo abeit eipone lo ayinanakin kede ayinanakino nesi ejai oiponesio lu egelegela. Mam agangat kede aingarakineta esalakinete bon toma oboro lu itinga. Epol agangat na mam itingio kede akan. Imoriarit na amalan kede etau lo ejok, aisiyalamakin luce, acamun aitojiokiar luce, karai da apupukin akiro itunganan yen inera nuke, epol noi kotoma ajenandar.

Kotoma oipone ediope, ekot ijo da acamunun ayinanakineta kama itunga luka okal kon, ipapero kede ipajan, naarai ipol ijo kotoma otaon kec.

Kotoma Afrika wok na lolo, ibore yen epol noi kotoma ayinanakin kede ayinanakino nesi amoranar acoa, iyemuto arai akiro ace kede apirianuto nu ingarakinete oni kotoma aswamisinei nu egelegela nu etioko kotoma aitolot ebisines kede aswamisinei ace. Aso, karai ijani ijo ibore ice arai ipiriana ijo kotoma aswam ibore ice, ekot ijo aisisianakin yenice da. Iwanyuni ijo ebe karai oni kesisisanakinos bonik aswamisinei nu ipu kede amoranar acobeu kede apirianut, ti oni kiduku Afrika na ejok noi naka lolo!

Mere ber eong kejaik ijo aitetemet kwape adumunia eong nu kotoma aswam ka. Bala ngin swam kere na eswamator eong, adumuni eong ebe

esisianakini eong ice itunga nu iswama arai epirione lo ajeni eong. Konye ne apolooror eong, abu eong kadum ebe epu atumunak lu iswamai kede ka eong, ice ka kesi mam ber asiomitos noi da, konye ajai duc ibore yen kesisianakinete kesi eong ngin paaran.

Kotoma abeit, kotoma apolokinit luce iswamaete, abu eong keswamanar noi kede itunga ngul lu apedoritos kesi da aisisianakin eong ibore idiope arai iarei, yen ajenete kesi konye komam eong ajenunit. Aso, kotoma aswam da emamei ibore yen iteleli itunganan adepar nesi da aisisianakin ebosi ke ibore yen iswama yen mam nesi kajeni. Arai irai ijo ebosi, ekot ijo duc koyapiyei kane ejaas itunga lu ipolokinit ijo kosodi aisisiaun iboro ice kama kec kede ijo aisuyalamikin kesi duc.

Mam ijo, kotoma aijar kana, ipedori aijaikin luce itunga ibore yen mam ijo kijaatatar. Koipone ediope, siri ijo kilosi aituk iboro lu mam ijo ipuda aitoswam.

Ibore yen itigogongi akirot na nesi yen ebe mam ijo ekoto awomoom irwan ipu ne ijaikina ijo luce ayinanakineta kotoma oiponesio kere. Kijaik ibore yen ejai ijo. Siri kitam aijanakin luce iboro lu emamete ijo. Erai na ijo aingalingal akwap, ibore yen ipedori aidupoikin ijo owupa – kanu apiyai arai iboro ice da!

Kotoma oipone ediope, siri kirimo ailipit itunga iboro arai acoa na mam ijo ipuda aitoswam, kanu aitodiara kane ejaas itunga luce. Kijau arai kilipu iboro lu ikoto ijo kotoma abeit aitoswam, nen bon nesi aitodolokineta nuak ajenandar.

Esuula 10

Kominu Aisisia

Erot lo Ikanyet kapei:
Iva nechidakwadakwa cheruzivo.

**Kitolom eibel lo mam edungei lo
akote aijen naka aijar.**

Erai ibore yen epol adumunet noi kotoma oinono loka Afrika ayongit kede akot duc acoa, kacut, apirianut. Edumun apirianut kotoma aswam ibore irwan ipu noi, ibore yen ingarakini ijo adumun apirianut kede amisiikin aijen nu ebeit aswam eroko apak edolo da. Ijaikinitos itunga luka Afrika adumunet kede eyongit naepol toma amojong naarai eyangauni nesi apirianut kede aijen naepol noi.

Kotoma oipone ediope, kibwaikitos itunga luka Afrika apolou toma otumunane kede ajaut kede akan na etatai. Kotoma kakere, ijaikinitos itunga luka Afrika amojong kede apirianut, kosodete aminakina eitumunane lo epol agogong na etatai kede aitetemonor ka aswam iboro komwaka aokot.

Nu nesi ageun apengo araas iboro lu epolok kotoma okalia kede ocaaloi lu oinono luka Afrika. Kwape nat, kotoma oboro lu ekotosi apirianut, acobeu kede aityaka nu ebeit aswam, itunga lu emojongitos kesi ejai eporoto noi nu inera. Kosiep do kaje, ne ejaunor ationus na ekoto agogong kede

atitingu kotoma ke, itunga lu atumunak kesi ingarakinete, naarai emwaka aokot ido kotiroko aiswamaun iboro.

Ka kere, kejaas ngun da, erai acobeu na emojongit noi naka Afrika na ebala ebe, mam aisisia edaun ageun apak na iwuriere ijo toni ates kon – ngin diope ka oni isisia ngin paarit mam sanget.

Nu nesi epolor oni itunga luka Afrika aipepeun bobo adumun iboro wok lu irumunit oni kane ejaas ipolok wok kasodete aimurokin. Ekot oni aijaikin idwe kede atumunak apak kede arerengusio nuipu tetere kesi itopolorete akote aijen kede aisisia nuipu.

Ibore idiope yen ican yen ejai oni kotoma Afrika wok na nesi aronus na eyangaritere acoa kede apirianut na oinono wok na wurunet kwape acoa na edit nakolo irwanar kede kana Imusugun. Ejai do awomoom ebe emamei bobo ajokus ke lolo. Bobo, naarai kisibabangi oni itunga luka Afrika kede ice da lu mam eraas luka Afrika ebe acoa na abeit nesi na iwadikatai oitaaboi luka Imusugun, arai ebe acoa na isisianakino bon kotoma osomeroy, okoleji arai oyunivasiti, nace kere mam erai acoa nepe cep!

Ne bobo erono adepar, ejai awomisiot ebe acoa na abeit edumunio kotoma osayans bon. Aso bobo, kanu kangun, kotoma akwap naka lolo, Afrika wok naka lolo, epol acoa kede acobeu na aijen na atukunio adaun ikar ipu noi, idanyanyai kanen komam itoswamao, owuta do acalaar aleliar, naarai mam nesi ikopa koiponesio luka Imusugun.

Erai nu aiturur ebe acoa naka Afrika na oinono kere etwaniarit koipone kangol! Kosodi da ngin paarit na etubor iwuta oni atwakiar acoa na kede acobeu. Ngin paarit, etwani aberu arai ekilokit lo

epiriana, etwakete kesi kede acoa kec mam bobo oni idumuni acoa ngin ikaru kede ikaru...

Mam oni itunga luka Afrika iswamat nu ipu kanu aitam aikamun acoa na kotoma aiwadik arai aingarenikin aitopolor naka awaragasia ka aitatameta nuka akituk, tetere itunga lu oingaren edumunete.

Aisisia kede acoa kesi iboro lu ekotoi noi kotoma Afrika naka lolo. Alosi eong aijaikin ijo adoketa auni nu aijen kede aisisia nu ekotoi noi kotoma Afrika wok na lolo.

Adoketait na sodit nesi oni apedorit aisisia kotoma acoa na ejai tetere ingarakini adaunun atiokusio. Nu enera eong kesi nu ebe ejai kwan ejenunet ebe mam bobo itunga luka Afrika epedoritos adaunun atiokusio kec, nuka lolo kitoswamaete acoa na kidum kolo oni ikar ngul kere.

Kotoma adoketait naekot ijo kede ka eong kwape itunga luka Afrika, aibwaikin apak wok kede agogong kere toma atukokin acoa, aitacaun nesi, aiwadik nesi kwape kwape eswama eong kwana, kede aimor acoa na wurunet kede naka itunga wok luk' okau na epedori noi aingarakin oni adaunun atiokusio kede ingungeta luipu luka lolo kotoma okal, kotoma ateker, kotoma aswam, kotoma opatei kede apugan ngin paarit.

Adoketait na iareit nesi oni apedorit ailipun acoa kama ejaas itunga ice, kasodete aiswamun ngun kede acobeu na epol noi. Erai einono loka Afrika lo ijula nesi da noi. Kotama abeit, erai nesi lo ejula noi ageun apengo. Konye kotoma okaru akwatat lu atuboros, atwania nesi eijulujule ke naarai abu acoa ace na edit eipone ke kopedo amudiar ajar ke. Kwana do mam itoswamao nesi kotoma oiponesio lu itetet lu aipuga akwap. Konye

kejaas ngun da, eroko itoswamao nesi kotoma ocaaloi kede otaunin idis, ne erokotor itunga luka Afrika ejeniatar ebe nesi bon nesi alibunet naka acoa na ebeit kesi atupakinit kanu aitolot aijar na.

Erai bobo na da ebe adisiar kwana oni eipone lo ikopaonet acoa kotoma acoasinei. Iburai itungan adumun amisikinet kotoma aijen ke, aiyunit akuan ke, kede ajaut ka einono lo ecaminit aijulujuleta kosodi do alosit toma acoasinei ace kede aikopaun kama kec acobeu na ibuni ijo ayangaun toma otunga kon kede ateker da.

Adoketait na iuniet nesi na ajut kede apedor ngin diopediopen kede aimorikikina aijul ewomomoe wok kotoma oboro luepolok luka aijar. Kwape ononosio kere lu ecamunitos aijulujuleta, ekot itunga luka Afrika aitoswam eipone lo aitutub akiro komisikitete ebe akwap na ijulujula noi, ebe eipone lo iteete iboro da ekot ijulujulete kede ejautene lo akwap kapakio nu. Anyaritai eiswamae ngol 'dare' arai 'imbizo' lu inherit oni nukec kageunet naka eitabo kalo. Eraas iboro lu apuponoru kede aiswamanar kede ka luce iboro luka kolo, kacut koiponesio lu aitetem akiro nu epolok nuka aijar. Kanu kangun atwakiasi do kwana itunga luka Afrika iponesio lu pedoret aigwagwanar atiokusio kwape nat adeka na enyanya naka EISENY kede eipone lo kwana araunor akwap kere ediope ecaalo.

Akoto eong atemar ebe ipedori oni adolore adoketait na sodit na aisisia, kotoma oiponesio lu atukonokin kede aiwadik atanin kere nu acoa, acobeu kede awaragasia, kede einono lo esisianakinere luka papawok lu kere kojaas toma angajepesinei wok nu wurunet. Erai kotoma awaragasia nuka ateker wok, aitatameta, eibwong, akiro nu acoa kede abar na aprianut naka itunga

luka Afrika lu kere ipu ido kidaritos oni aidweny kesi kanu wok.

Nu aiturur lolo nesi na ebe, ipedorit oni alimunun awaragasinei kede aitatameta nuka itunga luko China kede nuka Imusugun, adepar ne kijenia oni nu wok kede acoasinei nuka Afrika.

Kajenet ipolok wok ebe isuban luka Edeke kesi eraasi isisianakinak lu epolok ka kere naarai ipedori oni aisisiaun nu ipu noi kane ejaas ityang ice, ikweny, ikito, iwukono, icorin kede iraan nepepe ka ibore ice kere lu ejarete. Kibuni oni einer nu ikamunitos nu kotoma osuula lo etupakinit.

Ilolo kotoma akwap na isunyt araun ecaalo ediope, erai acoa ibore yen epol itunganan ajaun kede. Acoa da elosiaraun eipone lo epol no apedor kede agogong na aipuga luce. Ipedori ijo awanyun ebe ne iteyo ijo apedor kede eipugae ejaas irotin iongon lu dumunet apedor kede eipone ediope lu icikakitai lo apedor kotoma akwap wok na kalolo. Lo sodit kotoma orotin luka apedor nesi aitoswam atorob airidia luce. Nu ican kesi nuta ebe toni lolo erai lo eipone lo itodunete agogong kede apedor kane ejaas luce. Eraas nu ican, naarai ibala oni ebe irai oni itunga lu ejai aijen mere kwape ityang konye eipone lo iriditor oni luce itoduunit eityangane lo ejai mama wok aitoswam atorob kede adedeng noi.

Ejaas nu da toni okale kede ateker kere. Kanu naarai abos adumunet naka Afrika na ilimunit oni nuke kotoma oisuulai lu atuboros, idumuni ijo ebe kotoma okalia kede ateker itoswamao adedeng kede atorob kanu aitemonokina akiro kopoloor do ejie kokale kede ateker kere aimoriarit, ibore da yen ayangau amoromoro naka apedorosio nuka angor kede nuka atumunak. Erai lo ejenunet loka Afrika na itetet konye mam erai ejenunet loka Afrika na

kolo na ajokuna. Akiro ka nu ajenanut kesi nuta: arai kolo epedoritos ipolok wok aiswamaun eipone lo ekal kede ateker ne emamiatar itunga arai idwe lu ejai eipud ebe emamei kesi ejautene, arai eraas idwe arai ipolok, angor arai ikiliok, naarai ajai ekal lo elal eitekerane lo esipo kotoma akwap kere, keraas nu kere naarai mam aponi kitoswamai atorob arai agogong aridia luce.

Kotoma abeit, eipone ediope bon lo epedorere adukun ejautene lo eitekerene lo esipo kwana kerai kitoritete toma amina, amina na agogong noi ne eminare itunga kere ipajan kere komamei aise ikur kobaale.

Erot lo iareit nesi lo egogong lolo lo itoswamao kotoma akwap kere lo awomisiot na elosikinitoi. Erai na ne itoritete toma politks kede ediini. Kere itoswamaete acoa na aitorit ne ejaas ipaup kede aijulakin ewoomoe loka itunga kokampeins. Nu aiturur, itoswamao kwana apedor naka politks kwape acamakinete naka ikisila itunga aridakino. Erai na naarai ne dumunia itunganan apedor kitorit toma politks, erai do ataraun ipolisin kede ikeyarin kere lu eyuwaritos itunganan ngin kede apugan ke, kitoswamaete atorob.

Agogong na iuniet naka akwap lolo nesi na enusu. Itoswamao apiyai agwelia agangat naka politks kede na ediini, koipone kangol kodumunete iwaitin lu ridakines itunga noi. Konye karai itoswamai isirigin ejok, epedorio adumun aipuc kede apolou naka akwap.

Agogong na iongonet nesi acoa: nepepe kede amina, agogong na ikanyet, erai amina na ejai toma omoyo na epol. Kwape amina da, erai acoa agogong na epedorio aimor komam ecalaar aliar. Kotoma abeit, ne emorere acoa, esalakinete kede lo ejaikini

luce kosodi apoloor. Akes apolou ebe acoa – kwape amina – epoloi ne emorere.

Konye orotin kwi iuni ne emorere agogong kodisiar epedor ngin. Ejaas nu ne ejai aitoswam atorob aridia luce,

ewomoomoe loka ediini kede loka politks arai bo nat apiyai. Akes apolou ebe edit ngul iuni adoketait kec.

Aso arai ilosi ijo kede ka eong araun itunga lu ijulakinete akwap na, ne epolor oni aswam nesi aibwaikin agogong adumun acoa. Na epol kakere nesi acoa naka itunga luka Afrika, nepepe kede acoasinei kede acobeu ka apirianut na asubun acoa na ibecokina Afrika na apaarasia kanu, ne kwana eraunor Afrika ecaalo ediope.

Eyunit eong, kwape ika tunga luce luka Afrika, ebe epol agogong noi kotoma acoa naka Afrika. Ejokuna kwape nat acoa ace kere na epepeunete inonosio ice. Naarai koiponesio lu egelegela ekot nesi kogitakina kede ka nuce naarai nesi itebeikinitai kanu akiro kede aijar naka itunga luka Africa, kosodi da bobo aijaikin abongonokineta toma aingiseta nu itingito itunga luka oinono ece. Keraun kwangin, ejai oni aimor kede ka luce kotoma akwap kere.

Ace pak idumuni ijo ebe acoa na emamei kotoma akwap lolo, tetere eraun aibois na ejai aipuc kede angaleu, nesi acoa na ejai obuwok ne Afrika. Kwape alimunitor eong sek, elwaka Imusugun kotoma acoa naka teknoloji ne mam oni luka Afrika ipedoria aikamun kesi. Karai da akwap naka Kide ejai ingaren wok noi kotoma etatai kede aiswamaunun iboro. Abal eong ebe, kejaas ngun da, edol ne ikamunit acoa na itunga kede eitunganane, kasodete oni einer nu ikamunitos acoa naka itunganan, itunga luka Afrika kesi ejaas

ingaren kotoma ajaut kede iboro lu ipu lu ebeit
aimor kede akwap kere.

Ajeni eong ebe ace pak itemari ijo ebe enera
eong akiro nu mam epedoros, konye acamunit eong
ebe karai acoa na naka Afrika – acoa na ikamunit
eitunganane – na ikoparete itunga kere luka akwap
Kide kede ka Too, ti ne imorikik acoasinei nuka
kwap kede ejautene loka isuban luka Edeke,
kasodete oni adumun akwap na inapaara,
kobaritos itunga kere kede ailaajara. Erai kotoma
amina kede acoa nesi epedorere adumun
'eitunganane epei'. Nu kesi ebeit ageun aswam
kanu aimorikikin itunga luka akwap, kede
aimorikikin isuban luka Edeke kere nepepe.
Ketakanutu nu, iwanyuni ijo ebe emamun bobo
ajokus na ikorion luka politks. Kosodi da bobo,
alosikinet naka Lokasuban ebe itunga kere araun
ipei, imorikikina kede isuban luka Edeke kere, nesi
itodolikin.

Esuula 11

Kinumunum & Ayongit Isuban luka Edeke

Erot lo Ikanyet kaarei:

*Yemura, zvisikwa zvoze zvamwari; zvoze
zvinoera. Kinumunum isuban luka Edeke kede
iboro kere lu asubi nesi. Iboro kere lu asubi
Edeke eraas lu alawunak.*

**Iboro kere lu asubi Edeke eraas lu
egayoko. Kinumunum, koyongite kosodi
aminun isuban luka Edeke kere.**

Ajaas ipolok wok kede acoa adeparit na wok
Anaka lolo. Ajenete kesi, komamwi ber esayans
da, ebe edunyasi isuban luka Edeke kede itunga.
Ilolo ketoritos otekinolojuya loka DNA, kijeni oni
ebe kedolitos itunga luka Afrika ageun apengo.
Kwape nat, e DNA lowok erai kwape loka emwabor
98 kangul 100 kotoma oipone lo kesubunere
isuban lu iarei.

Kanu akiro kere, irai oni ipajan ka ityang
kangul. Ewuta e DNA da ebe, kotoma abeit, iboro lu
emwaka aokot – itomei, ingatunyo, ibuin, kede kice
da – kere ejaas kede e DNA lo edeparit 90 kangul
100 aputo kede loka etunganan. Kanu ewuriaka,
ilolo ewuta esayans aitogogong nu ajenanara na,
ajenete kolo sek itunga luka Afrika ebe kijenanara
oni kede ityang, iraan kede akipi. Ejai ejenunet

nuka akiro nu kere toma awaragasia kede aitatameta nuka itunga luka Afrika. Kotoma awaragasia nu emamei atyaket kiding ityang kede itunga. Kotoma abeit, kejena ebe epedorete ityang ajaun kede ikwamin luka itunganan, arai bo nat itunganan ajaut kede ikwamin luka ityang. Kowanyu ijo adedeng kede eisinye arai arangan.

Mam erai awumokin ebe ikiroria kede italia luka itunga kede atekerin eyangaritos ikiroria luka ityang. Kotoma awaragasia nuka Afrika, itunga, ikito kede ityang kesi ajenanara noi. Eyitunit eong ne arokor eong adite aminakinit eong aipup awaragasia nu etatamete nuka tata kede imakio ice. Aminakinit eong aipup ebe itunga kede ityang enerasi angajep adiope kede oputosi atyokusio kec da. Eyitunit eong adiope awaragat na adukoinar aberu adiope kede apoo. Ejai bobo awaragat ace na ajaar aberu na epaperos kede ajaanakin kede akinyang. Okilenike duc awumokinit eipone lo adumununia aberu ke agaria nu apolok ido kotarioko kangin paarait, dodo ekaulo nesi ariengun ajenun ebe emina aberu ke akinyang toni otul naarai ekamanakin nesi akinyang na agaria nu atarioko kwape aminat ke!

Ajeni eong da bobo ebe ejaas awaragasia nu ipu noi nu ikamunitos nu ebeit oni aisisiaun kane ejaas ityang. Kosodete nu do akamunit iboro kere luka ajar, agear kede apedor, politks, ajenanar naka itunga, kede do kakere iponesio lu ejokuka. Adiope kotoma awaragasia kosi nu eminas itunga nesi na apoo kede emwabor. Kotoma awaragasia nuka Afrika erai apoo etyang lo eco noi ido kopol epal. Kosodi do emwabor araun lo aluron, mam etapit einer konye kojoni noi amina luce. Kotoma awaragasia nuka Shona erai emwabor mamai ke ka apoo. Kosodi kotoma oinono loka Afrika egogong

noi ajenanara na ejai kiding ikoku kede onace ke ka totoke. Kejaas ngun da, etapit apoo akwenar mamaike, Mamai Omwabor, koboliyai aboliasinei kama ke, konye karai da isuruminenei ocenike Opoo nesi ileic, iyatakinit mamaike amina nesi eipone ediope kede eke etau kere.

Akes apolou ebe ipu awaragasia noi, ne isurumere Mamai Omwabor ileic apak na epol, konye epedorit nesi amina kede aitun ocenike, Opoo. Konye iwanyuni ijo ebe, naarai epol nesi ebee, iduponokin Opoo owupa lo akiro nu imusagon konye ito Mamai Omwabor nesi elakuni nesi kawunoi. Erai na atetemet na awaragat na icor itunga eipone lo ejautene kotoma aijar kana. Icori atumunak aitemokin iponesio kec.

Eyitunit bobo eong eipone lo, kotoma awaragasia nuka Shona, ekodakinitai etukuri kede ebu nepepe kede acudak. Erai etukuri akweny na akware, ejotoi apaaran kere konye kiswamai noi kware. Nesi kwi do atemar ebe icorakinitai nesi da kocudi. Kosodi do ebu naarai ewuriaka akeje ke nu kokau adepar nuk' oingaren kosodi nesi da amina amej inyammat kware, ebalala do awaragat ebe ebu lopelo nesi edakenei acudan kware aipyed itunga. Kotoma awaragasia nuka Shona - kede atekerin ace da nuka Afrika - ebu nesi duc edakit acudan kware, aibois na acudan adokikinit ajanit kwape ebalatar awaragasia nuko Bulaya. Mam ijo iteyi, kotoma awaragasia da, epol na Afrika acoa kotoma adepar naka Imusugun?

Aso ekot acudan aikweny kware ne emutonor akwap cuc, ne etyonikinit akonye nuka itunga karai da ingany ijo akonye bia kware, nesi do ariongakin etukuri okeperi ke ibwanenit nesi ebu, tetere itodinikini acudan erot. Ngin acudan kotoma

Afrika iipisit etukuri kanu aingarakinit nesi kware aikweny.

Apolounit eong kakuriana noi itukurin kede ibuin! Kejaas ngun da, ilolo ebala e DNA ebe kijenanara oni kede ibuin adepar ne awomit eong da.

Akirot na epol kanu kere nesi na ebe kotoma ajenanar wok kede isuban luka Edeke nepepe kede ityang, oni kere ijenanara kotoma akwap kere kwape ipei lu esubunit Lokasuban, kasodete da ajenun ebe ebeit oni ajaikinit isuban luka Edeke agaius kede ayongit: eraas kesi lu ijenanara kede ka oni noi.

Karai da mam ityang lu, ikito kede iraan mam epedoritos einer angajep wok, mam nen elemar abeit ebe ejaas kesi kede acoa na epol kede apirianut. Ite ber ijo iraasit epoloi komisiiri, idumuni ijo ebe epoloi nesi kotoma oipone lo esubunitere nesi, ikaru kede ikaru, ejenete iraan eipone lo jares kotoma atyokusio kede nu ajokusio, eipone lo ewuriaror, kede lo eyuwaritor araito ke.

Aso ityei do bala ecoak ikito kede iraan adepar oni. Etyonikinit itunganan apoloun komamete kede iwuriak ke igangitos nesi apoloor. Konye kojenet iraan kede ityang nape ewurunere eipone lo ajar. Emamei yen itodikini itaok nape idounio ne ejai awaketa ka totoke konye idakikan idis idumuni ijo nesi enaki kanu aicatuna aitac alaro. Eipone bo ani kejeniatar icok, ikinyom kede iraan lu didik kwape ebiyat eipone lo ajar, komam acalar ailulu kanu ajar, konye oni itunga ekalalaete kiyar etengei tetere kijenunio ebe kijai ido ipuda!

Kilimokinit oni acoa kede acobeu naka itunga luka Afrika ebe ecoak isuban luka Edeke kanu kangun egaioke. Akas apolou ebe, oni itunga lu etapit aibunga luce kede aitoswam atorbe nepepe

kede adedengu na epol, ekot oni aijen ebe siri kisurok isuban luka Edeke naarai egaioko. Kejenete kolo ipolok wok nu ebe ekot oni aiboi kajenanara ejok kede ityang ka iraan, konye mere agwar kwi amabusu na ejai ewaya, tetere ice idis lu ejaas kede enyadu kesi bon ewanyunete ityang lu kozu. Ajenete ipolok ebe erai aijar na ekot oni ajenanar ejok kede ityang, ikito kede icileta.

Ajenete ipolok wok ido kodedeng ebe eyario etyang arai iraasit kojai akirot na epol na ingarakini aiyar ngin itunga kere. Aso ngin paarit na elosiotor ipolok wok ameja, egeunete ber kesi einer kede ipolok kec kede ikwamin lu idarete ityang ngul kede lu edarete ikito lu amagoron, kanu aingitun apedor arai epedorete kesi amejaun ityang idis kanu aitania ikalia kec. Mam acamunitai aimusung arai ameja ityang kanu abolia nepe cep!

Kwana atwakiasi itunga luka Afrika ajenanara kec kede isuban luka Edeke ka ityang. Awomit eong ebe ican lu ipu oni eraas naarai kimuroki oni eipone lo iswamanaret kede isuban luka Edeke. Icorakinitai nu koraas abeit kane ejaas inonosio ice da lu kwana ejaas otaunin.

Iboro lu kolo ayangaritos ipolok wok ebe ejenasi sek mam bobo oni kwana ijenei kwangin da. Apedoritos ikes kwi aiboikin kwap ekitoi lo ti lo elilim etolim ke kosodete aimor akiro, aitatam nu ikamunitos ateker kilaajara noi ido da kotoma apak kangin korucokina kede isuban luka Edeke. Epejonokinete kesi amagoron, amoniek kede iwukono kanu aidunyakin kede ikwamin lu ajenete kesi ebe kejaas aiboisio ngun, epolok adepar kesi, ido.epedorete arucokin kesi ne ejai Edeke, kosodete kesi da apedor einer kede ayongit ipolok kec. Ilolo, ipu ido eroko iyatasi itunga luka Afrika lu iboyete

kotoma otogoi lu edukitai kede amatapalin ka esimit, kane elwana noi kama isuban luka Edeke. Ipu itunga lu ewutasi airimaar toma otaunin, acamunit aijor acunakina okaabin. Lu ipu ka kesi mam ejenete adumuneta arai arucokina ked amagoron, iwukono akipi nu ocorin kede iboro kere lu egaioko naarai Lokasuban Edeke nesi kasubi kes. Edit do kesi arucokina kede Edeke.

Mam ijo iteyi nu iswamas kotoma otaunin kede atekerin nu ipu nu iboyete kane: itunga lu emamei eitunganane kawokot kec. Kotoma otaunin lu apolok kwape nat Johannesburg, Lagos, Kinshasha kede Kampala, emamei bobo ibore yen egayiono cut.

Mam bobo aijar erai ibore yen alawunan kwape kolo sek. Epedori ikokolan yen ekoto ikapun idis tai aiyar itunganane kanu adumunia ikapun ngul, kanu inyo ejaas ice ejok kawanyunite eong ican. Mam bobo aijar ameda ke kane ejaas ice nepe cep.

Apotu ipolok wok kowosikisi oni kede acobeu ka apirianut ebe ngin aijar kere erai na alawunan naarai Papa Edeke nesi ekori. Ajenete kesi da ebe eipugae kere loka politks nesi ekoto kitorite toma ayuwarit aijar kwape ibore yen kagaion ido korucokinite itunga mama ejai Edeke. Nu aiturur kesi nu ebe kimuroki oni nu acoa kana dala.

Erai aiturur na epol noi ilolo apugasinei nuka Afrika mam eyngaritos aijar naka itunga kec bala ibore yen egayiono kotoma oipone lo ipugaatar kesi luce. Mam yen epodokinit itunga luka akwap kec lu ewanyunitos ican lu kos. Apakio ace idumuni ijo ebe itemokina apugasinei aiyar itunga kec lu ewomitos kesi ebe itokokolitos enyame kec kede kesi asalkinit oicolong. Karai ikoto oni aisisaun kane ejaas ipolok wok ti oni kimisiik ebe mam ti ipolok ngul ecamutu eyarit kwape kalo atakanun.

Akoto eong alimokin ijo ebe kwape itunganan yen ka Afrika na itetet, ekot ijo ageun aipepeun ajenanar kede eidicane ka isuban luka Edeke. Mam eong apodo ne iboyo ijo, arai ediini kon, nu abala eong kesi nu ebe: kogeu ber ijo adumun apak na irwanara ijo kede aidicakin nepepe kede isuban luka Edeke tetere engaleuni emoyo kon kede adam da. Ne idumunia ijo apak adio kere, kolot ber aipejokin ere kon ne ilibunitor ijo. Kolot ngina komou apolokinitok ateker kede ekal kon loko ore. Kisisiau kama kec nu ikamunitos ateker kus, ekale kus kede ajanara ka isuban luka Edeke.

Kolot kinga ngina kipejok isubuneta luka Edeke. Kilatoo ber ijo amagoron kede ais. Arai edaununa amagoron kobukus kolot komou kesi kane eroko ejatatar. Kiriu erongat ido kosodi aidok nesi irwan atipet kangin karu. Konye ekot ijo eroko kidulokina ailom ailat kotoma amagoron kede ka irongeta arai iwukono, ibusakinit ijo aitodunit ayongit isuban lu luka Edeke. Ekot ijo einer kede ipolok nepepe ka Edeke kanu kesi aingarenikin akeje kon, kosodi ijo einer kede amagoron ka iwukono kiyalamikinite kesi kanu aimorikikina kus kede ayuwarit ijo.

Eilate kotoma ais arai amagoron kede aitorit eiduny ne ejaas akipi nu ipu noi kwape nat angolol, nesi erai ediope eipone lo inyakuna ijo emoyo kon aimorikikin kede isuban lu luka Edeke. Erai ne idunyatar ijo kede isuban luka Edeke nesi ijenuna ijo emoyo kon kwape ejaar, kojenuni do da ebe ejai Agogong na epol noi ngina, na epol adeparit ijo itunganan idiope.

Akoto eong da bobo atemar ebe, kwape itunganan yen ko Afrika, kotukoki ber ijo awaragasia nu itatamio kateker kon nuikamunitos ityang. Kiwadik kes kwap arai kijaik idwe aiwadik

kes, kijaik kesi ainom aputosia kede aitatam awaragasia ace nepepe ka itunga ice. Kingadak kesi akompyuta kon kosodi aijukar ace kokwam loka *Internet* tetere imorete ijo kesi kede itunga kacut ngul luka Afrika, kanu aingarakin kesi da, arucokin kede abar wok na einono. Erai lo eipone lo epol lo aijanakin

Kotoma awurianut, kijenanara oni kede ityang kede isuban luce luka Edeke nepepe ka Lokasuban wok. Kotoma abeit, irai oni kede ka kesi ipajan lu idunya noi. Aso karai da imina oni ipajan wok, ebusakinit oni amin kede ayongit isuban luka Edeke, kasodete aisisiaun nu ipu kama kec.

Esuula 12

Kokweni, Kobolia ido Kiyalai

Erot lo Ikanyet kauni:
Tandara nekuita maforo nevamwe.

**Koloma ijo da toma abolia kede eyala
kedekaluce. Kiswamau nu mere irwan atipet
bon konye toma apaarasia nu ipu. Kotoma
oipone lo nesi epedoria akuan kon, emoyo
kon kede adam aimorikikin nepepe.
Aboliasinei kede Eyala nesi ingarakini ijo
adukun emoyo loka 'Unhu-Ubuntu-Botho'.**

Kongolik oni atekerna ocaalo na kolo naka
Kipolok wok, ajai apak na apol na agitaritai awai
kanu itunga aitolot abolisinei kede eyala.
Aboliasinei kede eyala kesi itopoloete eitunganane
lo ileleba.

Etapit irwan na ipu aboliasinei kede eyala
aitolot akiro nu ikamunitos ateker ngin koraun da
eipone lo eyuwara lo ineris arai lo aimonikiner
ejautene loka iboro. Epatana aimor ican arai
akurian kede ka luce. Ibusakinit ijo adumun apak
na ijaikiner ijo da toma aboliasinei kede eyala loka
ateker kon.

Idiope ibore yen aminakinit eong nesi aipup
kede airam iboro luka ikososinei luka ateker ka.
Erai atenus kede *emarimba* irameta lu epolok noi
kotoma ateker naka Shona. Kotoma oiswamae loka
Afrika ngin tunganan ekoto kojai ibore yen iswamai

kotoma: apolok, amakio, atumunak, itelepai, apesur, ikiliok, angor kede idwe kere kojaas toma. Mam apodokinitai ebe ingai bo ngai. Kotoma oinono wok, mam ijo isalakini adamam aiboi aite luce ewoete kede aikosi. Oni kere arai aikac aisom kede acalanar awoere.

Kotoma abeit da bobo, kotoma okososinei luka Afrika, emamei ekoso lo mam ikosiere. Emamei aibina na emamiar ekoso ke lo ewoyo. Mam emusik kede edans erai iboro luka asiom ko yunivasiti. Akoto ngin tungan aijen kede ajaut toma kede akuan ke emoyo ke da kere. Irameta ice luka einono etoswamao kanu asubanisnia kotoma okalia kede ateker. Aso ajaas ikososinei lu emanyit, lu aibworo ne etwania itunganan, nu emaere Edeke nepepe ka ipolok arai bo nat lu ewoyo kanu itunga alakara arai ailakar ican kakuan.

Ne alibunitor eong, etenus bon eramio ne emaere Edeke kede ipolok nepepe ka asuban na erucokinit oni kede ipolok ka Edeke. Kaiboisio ace erai *emarimba* nesi itoswamao kanu arucokina oni kede ikwamin, tetere oni ipedori einer kede ka kes.

Kijaikini ijo ekosio kede aikosi na einono eipone lo itegelikina lo irucokinit ijo ne ejaas itunga kon kede eyistoria kon itiya ijo aiminaikinit aki aipup ikososinei lu akwapisinei nu ilongwau lu emamei apolou kotoma ajar kon. Kotoma abeit, ekot ijo aitup ikososinei lu einono kon. Ijenei ijo mam epodoi ebe ijeni ijo noi aijer angabet konye bob ebe itamanakini ijo da ailakilak ikur akuan. Iyatakinit na 'aimorikikina' kon kede itunga kus.

Idiope ibore yen ijaikini ijo eyala kede aboliya nesi aipup kede aimor awaragasia kede ka luce, kede ayala lo iteleli itunga. Kingarakinit ijo da eipone lo ipedoria ijo akwenar akuan kon kacut nepepe ka luce. Ejokuna da larai ikwenatar luce ijo

ijo aimorikikin kede ka kes ainak akwena! Arai lo eipone ediope lo kepedoritotor ipolok wok aisisianakin itunga ebe mam ibore yen imiki ijo aisisianakino kacut ateker. Awomit eong ebe, engarenok wok luka lolo, enyunyuraka noi naarai emuroki kesi eipone lo eyala kede alakara kede ka luce. Mam kesi ekotosi yen icori kesi kacut yen ewomitos kesi ebe ekwenar kesi. Mam engarenok luka Afrika epedoritos akwenar awate kec. Aso kanu kangun enyunyuraka noi ido mam epupete iporotoi lu egelakina kane ejaas lu kec.

Apaarasia nu kokwap akolong etiono ejautene lo abebeun aijar. Ngin tunganan iswamai isawan lu ipu kotoma acudungung. Aso mam eswamak epedoritos aipitun epuresia, arai bo nat e *stress* lo kwana esurokinit kesi kanu aswam bala ebulesit. Amamus kede eipone lo itikokines epuresia nesi lolo erai adek na enyami kede aiyar eswamak luka Afrika noi. Ationus nes na ebe kotoma oyistori erai adek na na Imusugun. Mam kolo itunga luka Afrika adekanakinos epuresia. Konye kwana naarai ikopiya oni aijar kede ejautene kes ka kwi, ideka do oni adepar kwi da ikulepek.

Erai e *stress* adek na eyari. Ipu itunga luka Afrika lu edekasi ido kotwakete da eroko kesi kejenuna ebe nesi ayar kes. Arai adek na mam oni kijenunit lem nuke. Ekot kwana oni aitiji nesi kasodete aitoswam acoa kede acobeu wok naka Afrika.

Na sodit ka kere, erai e *stress* adek na etakanuni eridaki itunga aswam kede awomisio nu ejaytene lo aijar. Ne ilakaror ijo noi kosodete aokot kon aibuk noi apak na edit, mam nen erono. Kotoma abeit, ejokuna karai ijaik ijo aswam ibore komwana akuan. Konye eraun e *stress* atyonus kama kon, ne do iyatatar awokot eibuk noi kotoma

akuan kon, koderete ijo amori nu akou da. Ejai epoison lo ibukete aokot nuipu lo enyaritai *andrelin* lo ti ajokuna ibuki lo edolit. Ne etakanunia ijo aiyalongongo arai akurian ibukio aokot nu. Konye ingarakinete ijo aiswamaun ibore yen ti atipet. Karai orai ijo ityang lo ais ti mam akiro nepe cep da. Naarai etyang lo ais, ekesa je ne itukuriana nesi ibore kwape nat agat na engatuny, ekakaar atikor akerit ayuwar ajar ke. Kotoma oipone kalo icweari *andrelin* na atipet. Nu iswamai etiko lo ais kesi nu. Ne egipara nesi engatuny ewuta adapadapet kanu aikamun nesi ainyam, ibukakino nesi aokosit na ekakaaror esipid 'lo akeju koyuwarai' atikonor ikuti toni ayuwar kane ejai engatuny. Nu ican kes nu ebe, mam itunga epedoritos atikonor ne eponiatar ican. Ityang lu ais emamiatar kede e *stress* konye kiboiete ais nepepe kede ingatunyo, kasodete oni itunga lu iboiyei kane emamiatar ingatunyo adeka epuresia noi, naarai ngin pak na ibukunere aokot nu emamei eipone lo icweara oni agogong na aitipet. Etapit duc kotoma aswam, ne iridakinere emamei ne kereria arai bo nat eipone lo aitiji. Ijo aiboi kanen eroko bo lolo akiro bia, toni bobo apak na etupakini ne iridakinere bobo ijo kibukunete aokot nu *andrelin* aiyatakin ne ejaas nu lem sek nu mam icweara kidyatun do cut. Nesi icorakinitor oni adumun ne icwearor aisorit na kotoma aboliasinei, eyala kede aswamisinei nu ijaikinete ijo ainyinyirar aisorit ngin kwape aijony.

Mere ber eong kejaiki ijo ajenanut ka. Ne araar eong ikar lu apolou 33 abu eong karaun apolon loka efakalti kotoma Oyunivasti loka Zimbabwe. Akukurana eong noi ido kajeni da ebe apedori eong aswam noi adepar imakio lu lem etumoritos efakalti ngol. Abu eong kebwaik agogong ka kere aswam nu komam ajeni ebe ewuta e *stress* adokar

kuju. Mam ber eong ajen da nu enerasi itunga ebakasi ebe ejai e *stress*. Mam eong awomit ebe epedori etunganan da lo alosi kede akeje loka Afrika kwape nat ka eong adumun adek na Imusugun. Konye kojaas ijenuneta luka epuresia ne ajai eong, do eong elope ngesi mam ajeni ijenuneta lu. Alosi eong agogong edisiar akuan. Atapit eong akwenyun tipuruc do aibois na aipup ebe iyengunit akuan apupi eong epasane bala lo itokorio kware ejotoi. Mam eong ajeni ebe e *stress* nesi ngol. Abala eong ebe ajototo eong erono. Kageuni eong awanyun ebe mam bobo aswam ajijim kwape ne ageara eong. Apakio ace da ne adolio eong alosikineta ka, adumun ebe awolio ajijim wir! Kotoma abeit, acepak ne adumunia eong aitodolikinet ka mam bobo eong apupi ejok. Mam eong ajeni ebe kerai nu kere kanu e *stress*. Dobo ikaponesio, abu do eong kanyunyuranar noi. Ibore yen edit da apedori aisunyurikin eong. Mam bobo eong apuponokini idwe ka arai da na kowaika, naarai abu e *stress* kolema atitingu kere.

Adiope apaarit na tupuruc naka Emukaaga abu eong kakweny kasodi aitutub ebe ajai eong aiyengun apaarit ngin, naarai adaunit eong apak na epol eperonori epasane. Nu awumokin kesi nuta ebe, apak adio tipuruc nepenen, ne ti eyengia eong, kogeuni etau ka aisom noi. Mam eong ajeni ibore yen eswama kotoma ajar ka. Ne egeunia etau aibuk noi adumuni eong ne ekot akakaar akerit nenice. Kerumi eong akurian kasodi aiworoun itunganan ice ayangar eong ne ejai edokita ka. Abu emuron atipet kebwaik eong acuman nu ipimaete epuresia, kosodi alimokin eong edaun apak adio, ebe kemamei ibore yen erono kede ka eong kotoma akuan ka. Abala nesi ebe keraas nu kere naarai

asurokinit eong e *stress*, ibore yen duc ekwanyarit nesi eong kasodi eong aisik aki.

Mam eong eyunit nu alimonokini eong emuron kasodi alimokin nesi aiyatakin aingic ationus ka. Awomit eong ebe ace pak akoik nesi eguro. Kewanyana emuron ebar ka kede aokot da mam ibore yen aronon aponi kodumunai. Kesiboikini eong do emuron ka kwap kalimokin eong, okokuka, arai eong lo apolou naka ikaru akais akany kaarei. Ajeni eong ebe e *stress* nesi iriebi ijo, mam ijo ikoto acamun ngun. Kesisianakini do eong edokita ka nu ikamunitos ationus na kageuni do eong da asisianakin akuan ka nuke.

Mam abu koyangak apak na ewoj eong awanyun aijulakineta ne anyamia eong ejok toma apak, aijony na abu eong keswama duc, kede ajaikin toma aboliasinei nepepe ka iboro lu eyala. Kokuju kanu kere abu eong kepuga eiswamae ka loka aswam kede ajenun iboro lu epolok aswam, tetere eong mam bobo aswam ketulumori toma ationus. Emoriarit na aijen iboro lu epolok kotoma aijar ka kede ngul lu edunyasi kede ka eong noi. Abu eong da kageu aijanakin aswam itunga ice lu apolokinit eong, kacut iboro lu mam lem eong kekopanakini luce aswam. Konye kanu kere, abu aijar ka ijulakin noi. Abu kesitik eong ebe arai eong etunganan mere papa apedorosio kere, ebe ekot eong ailajar tetere araun itunganan yen epatana, ilajaara ido kiyalana. Kotoma apak ngin na araar eong lo apolou naka ikar 33, mam eong apedorit aidok ekalina iuni komam eiyengane ewurianara. Ikaru akais aarei ekaulo, ne araunor eong ikar 53 lu apolou apedorit eong aidok akalina komam apupi aarei da. Akes apolou ebe angaleyi kwana eong noi kotoma okaru luka apolou na 53, adepar ne araar eong etunganan loka ikaru 33, naarai

kwana ajeni eong ajokis na aijony, aiyala kede ka nuce nepepe ka aboliasinei.

Akes apolou ebe aswam na eyengauni einyinyir nesi epol noi kanu aicwear *andrelin* na adepara na mam itoswamatai ne ebukunatar aokot. Eyala kede aboliasinei kesi ingarakinete noi aitangaleun ijo kotoma o *stress*. Naarai ejaikin ijo apak kede arereng na icwearet aisorit kere kotoma akuan kon. Kanen da, ne ibwaikina ijo etau kon toma aswam ace na egitakina kama na oyafesi, ingarakini ijo aimurokin nu iboro lu iridakinitos ijo aitamamaun ailajaar, kanen do kopedori akuan aipepeun agogong na swam ejok tipuruc nace.

Kotoma awurianut, kanu kangun, eyala kede aboliasinei kesi epolok nukec noi kotoma aingarakin ijo adumun akuan na engalei, adam, awomisio kede emoyo lo esipokina. Aso kolot kinga ngina kogeu abolia!

Esuula 13

Kinerata kede ido Kopupi ijo da Luce

Erot lo Ikanyet kaongon

Gara dare nedzimburi nevavakidzani

**Kiboiyinikin kwap kede itunga luko okale kon ,
idunyeta kon kede ipajan kon kosodete
amorunun awomisio. Ne nesi eipone lo
ibecokina loedukunere ajenanara kotoma ajar.**

Dare arai 'amorunun akirot' nesi ediope eipone lo apol noi lo apotu ipolok wok kiswamautu. Enamei ibore arai emusaago lo epol noi arai edit tai yen mam ekotokin ainerun kede ka luce kotolim loka ekitoi. Ajai nu aiswamaunun kotoma adoketa kere - kotoma okal, kanu aimorikin ngul kere lu elibunitos kokek kangol; kosodi do airiamun ipajan da kotoma okal lo elal aimorikikinit apolokinotok luka ateker kede itunga kere lu ikamunitos akiro ngun, kotoma ateker kacut akiro nu eipugae arai politks nu okau.

Eiswamae loka 'dare' loka einono loka Shona, ate ajeni eong ebe eputosi kede atekerin ace kede inonosio luka Afrika, nesi arai eipone lo ingarakinet aipur akiro kede aigwagwanar atyokusio nuka ateker nu epu kotoma ocaalo. Dare nesi etoswamao da kotoma adokete nuko kuju kwape nat adyeket, kanu atubio imusaagon. Etoswamao Dare kotoma airiamununeta nu ejaar aitub imusagon, nu

eseunere akiro nu ikamunitos itunga kere kosodete itungan kere aimorikikina akirosit ngin. Erai *Dare* da aibois na isisianakinere idwe kede atumunak eipone lo ebeitor ateker aitolosio, kiteete kesi kede aipup eipone lo eyayitere ateker. Erai *Dare* eisianakine lo epol noi lo elomunit kotoma oiswamae loka awomisiot naka *Unhu-Buntu-Botho*.

Akadakinit eong aite ebe ewuta kwana eswamae loka *dare* atwanare mot, kacut kotoma okal kede okal lo elal. Amasiki eipone lo itolosere iboro kotoma okal kede okal lo elal ikar akais akany lu atuboros. Lu epolokinitos ikalia kede ikalia lu elalak, kajai eong da toma, mam epodokinitos aiworounin airiamuneta nuka ekal kede ekal lo elal, karai da ajanakin toma asubanasia nuka ateker nu einono.

Epolok nu asuban nuka einono kotoma ajar naka Afrika noi adepar. Ipu asubanasia kotoma oinono loka Afrika kimoriarite edukone, atwanare, asuban yen atwan, aitemokin akiro nu emisikane, asuban nu aima ipolok kede ikwamin luka ipajan, nepepe kede aingarakin aisinapinikin akiro nu enguingui kotoma okal kede ateker. Nu epolok kakere, itoswamao airiamuneta nu ekal kanu aseun nu iswama kotoma akiro nu ikamunitos ateker, kwape ekal ediope kere.

Karai da ejaas itunga luka Afrika kede einono lo esipo ido kogogong kotoma akwap kere, akuroki itunga luka Afrika aitoswam einono lo kanu aitijio ibakor kede aitopoloor agwelanar kede etatai. Konye mere kwape itunga luko China, Ilugai kede Iyudayan, lu apedosi aijulakin atekerin kec araun nu itetet kitoswamaete akiro nu agwelanar, akuroki itunga luka Afrika aitoswam ebisines kede agwelanar tetere aitopolo ateker kec. Kongolik ber ijo eipone lo isipanitatar atekerin ace kelototo

akwapin ace kosodete aimorikikina. Kongolia ijo itunga luko China, Ilugai, Iyudayan kede igurupun ice eipone lo itoswamatar agwelanar kanu aiyat ajenandar kec airimokinit akwap kere. Ejaas ikes kwi toma oibugai kere airimokinit akwap na. Iwanyuni ijo ebe etaun ediope eraun loka itunga luko China, arai Iyudayan kosodete ikes kwi aiswamanar bonik itolosete ebisines kec kotoma o *network* lo ededeng. Ijaikinitos ikes kwi itunga luka atekerin kec lu eroko edumunia apirianut aisisiaun kama kec toni nesi da ajenun nu ipu kosodi do apoloor agitar ebisines ke elope konye korok erucokina ne ejaas luce. Koipone kangolkitopoloete abar kotoma ateker kede okal.

Oni itunga luka Afrika, kowai kaje, kijaar kede ikalia lu esipos konye mam oni itoswamai kesi kanu ebisines, arai bo kanu inyo mam ejena. Kedol akiro nu aisubus mam oni iswamanara kede ipajan wok. Amin erai naarai keponi oni kitapaar ebe aswam ebisines ore mam ipoloor arai aiboror, ebe erono aitoswam ikon ipajan kede ipapero, ibore yen emaikinitos ilongwau ebe *nepotism*. Nu abeit kes nu ebe, kotoma akwap kere ipu aiboisio nu ebisines kotoma akwap na itolosete ikalia, ne ejokunar aswam kede ekale kon. Ne bon mam ejokunar aitolom itunga luko okale kon toma aswam nesi aswamisinei nu apugan ne ipolokinitor ijo ido kokoto ti itunga kere adumun eirian kotoma aswamisinei akorokoro. Konye kotoma obisines, ejok noi aswam kede itunga luko okale kon adepar.

Idiope ibore yen etoswamaete ilongwau lu ipugatosi oni kolo arai aitutuor itunga kanu aswam iboro kwape akototor kesi ido kanu kec bon. Kelot apk ingaren idumuni do ijo ebe itunga lua Afrika icanas noi mam epedoritos adumun arai ageun ebisines kec ikulepek, arai bo nat etetai, kosodete

awomoom ebe aswam bala enyamuret kotoma ofakitori lo apolon kotoma otaun itelekaarit ijo ilope ageun ibisines kon yen cici kocaalo. Kasodete bobo oni da ikulepek aibangibangun ebe ibore yen etataunitai kotoma ofakitore lo apolon lo otaun nesi itelekaarit ngul lu ipedorit ino da ikulepek atataun kocaaloi wok luka Afrika. Etapit oni agwel iboro lu edit ameda kec kacut inyamat lu amukeben, naarai elomunitos ko kinga, kenyekikinitos inyamat wok lu einono luka ore inyamat lu engaleete noi, lu ti itataunenei oni da kasodete aitegwel inacan kede ainacan wok, ipapero kede itunga luka akwap kere.

Ationus bobo ace nes na ebe, kotoma apak na adumuniatar apugasinei nu ipu nuka Afrika aipugaikin bonik, apotu do kesi kibwaikisi agogong kede awomisio kec kere toma aitopolo itaunin, ne asipor agangat kec noi kotoma akiro nuka polotiks, kinyekinitos icaaloi aibos. Kanu kangun, eiswamae lo apugasinei nu ipu mam epodokinit itunganan yen ko kwap yen ko ocaalo konye ejokuna kanu kangin yen ejai otaun kede ebisines lo oibuga. Imoriarit na aitidisiarit ebeyi lo inyamat kanu itunga luka otaun kotoma aimod akoriok egwelio ikorion kec kede atacakin ikapun idis tai. Nu ican da kes nu ebe akwapin kwape nat South Afrika, idumuni ijo iduukai idis lu cicik lu etamitos agwelanar iboro kec konye erimaaros lu abarak toma oiduukai lu apolok lu epol ebei aibois na aigang ikes itunga kede araun ekastoma. Iboro lu egwelio kanen imoriarit inyamat, akima, edia, araoito nu itoonitai, akiring na aonon, awuto kede ice da.

Kotoma awurianyut, amamus kede agogong arai bo nat amajinging wok kotoma nu ikamunitos eiswamae lo ekal, iyyinak do oni kitwakiari eipone lo aiswamanar kede ebisines da, ne do kwana etyonor

oni adukun ekal lo esipo kotoma obisines ibore da yen eminakinit.akwapin ace tetere kesi egwelarete iboro kec aitwegelikin ibangiok, akwapin kwape nat Italy kede kace da.

Aitolomun eismamae loka *dare* kotoma okale kede ateker nesi cut epedori aingarakin oniu adukun bobo ekal kede ateker na egogong. Lo nesi bon eipone lo ipedoria oni adukun agogong na aitiji atiokusio nu itakanikinite oni kotoma okal, kede koriongeta da. Kotoma *dare* ejai eisisianakine lo itegelikina, lo emamei kotoma osomeroi wok. Imorikikinit na aisisiaun eyistori loka ekale, einono nepepe kede apedorosio nu apirianut nu aijar nu ekotoi kotoma akwap kana kalolo.

Erai kotoma o *Dare* nesi adumunia eong iponesio lu egelegela lu irieboikinet ican lu ipu kede aipur akiro arai enguingui. Ikolo apakio nuka ipolok wok esisiauni itunga iwaitin lu aipur akiro kotoma puponoro kede aisanwara kede ka luce, kanu adumun awomisiot na isimaritos itunga kere kotoma ateker ngin. Eismamae lo apuponor kede atitingu nesi apedorit noi aitikitik ican kede elongilong ti lo ketakanu kede aingarakinit itunga kotoma oitunganane lo ejokuna. Akes apolou ebe ekot ngin teker kojaas kede eismamae lo.

Konye karai da kotoma akiro nuka politiks, ejokuna bobo *Dare* noi kanu aitutub nu iswama kotoma aijaanakin ateker. Kitorit ijo toma *Dare*, ipedori ijo da kwape itungana idiope ayayit akiro nu epolok nu okale kon kede nu ateker da koseunenei ijo da nu ebeit aitup kotoma okal kede ateker kon. Karai mam ijo itodolikini nu ikotoi ijo kwape itunganan yen ko kale kangol, mam epatan ijo ajokunar aijaanakin ateker na do elal kotoma akiro nuka politiks nuka akwap kede eipugae ka akerianut.

Erai *Dare* eipone lo itoloset airiamunet na elukunitos itunga emeesa arai bo nat amot kanu anyamun akiro nu ikamunitos ateker kec. Ejaas iboro lu ipu lolo da lu ti ekotos eiswamae lo kalolo kwape kolo kejaar apakio nuka ipolok wok. Nasodit, kanu aitolot e *dare* lo abeit, ekot engarenon aiworoun itunga kere lu ikamunitos akiro nu ebeit aitemokin. Mam e *dare* elosi ingaren karai mam itunga lu ikamunitos akiro nu eponitos arai ikote akiro ai.

Ejaas adoketa nu itolosere e *dare*. Na sodit nesi ageun aitetem akirosit arai emusaago, aipet akiro adiope diopen, tetere itunga kere lu ejaas nen imoinikinos nu ejaas nen. Ekot ngin tunganan kere kojeni nu ekotoi kiswamaunai. Kotoma ateker naka Manyika, adiope kotoma atekerin nuka Shona, epol adoketait na egeari na noi. Ejai ngin itunganan aitetem akirot kwape amisiikina nesi kogeunete kede idwe toni imakio. Erai ti lo eipone lo epalas itunga luka Bulaya ebe aicanincan apak, konye kotoma otunga luka Afrika, ecamunitos itunga luka Manyika ebe esusut aitemokin akirot nesi lo. Icorakinitai ngin tunganan yen ejai toma airiamunete na, kacut atumunak, aitetem akirot kotoma aidules ke kere, tetere kesi itodikinete itunga lu ejaas nen ebe emonikinos kesi da akirot ngin kodoco. Erai kedautu itunga kere acamun ebe ngin tunganan yen ejai airiamun ngin ejeni akirot kotoma abeit ke nesi konye elosio airiamun ingaren, ne ecamakinere do einer lo aipur.

Kolumunite koipone lo akirosit, egeuno do akir aitemitem. Erai atyaket bon arai erai adyeket na ekot ikisila lu apolok, arai bo nat akiro na ekot ainerun ainerun. Kotoma akirot na ikamunit ikisila, itolomuni *Dare* eiswamae lo ekooti lo ekal arai ateker. Kogeun do awosan kodoco. Yeni iwosai

nesi egeuni alimun nu isiriebete nesi kopupi ido kojayi yen itoosatai. Kosodete do aijaikin yen itoosatai da apka alimun abomgokinet ke kotoma omusaago kangol. Kopupokinitos luce konye do egeun einer li imoriarit kere lu ejaas nen.

Kotoma aitolot einer arai ainerun ejaikin engarenon, arai apolon ateker arai bo nat ejakait, itunga lu ipu alimunun nu ewomitos kesi kkotma akiro kangun. Epedorio aiworoun itunga lu eraas ipirion kotma aitub imusaagon. Ace pak eraun itunga lu eyongitai kotoma ateker ngin, kwape lu epiriaka ido kosipokina toma okisila lu einono. Irwan ipu edolokino aitub emusaago korai itunga kere etubete nu iswama, mere idiope itunganan bon. Kolimuni do konyet atubon arai ejakait nu acamu ateker tetere yen ewosai kede yen ewosatai kere eupunete etube.

Ne eraar akirot na ineruna arai amorun awomisiot kanu ebeit aswam komamei yen iwosatai, eiswamae loka *dare* eraun ngin tunganan alimun awomisiot ke kede luce aingit nesi asiopokinet na awomit ke korai apuponokin tetere awomisiot na edolokino eraun na itunga kere.

Kotoma awurian, kijaikinio iporotoi lu ipu lu egelegela apak apupokino eipone lo ewomomototor kesi. Bobo, ice ka kesi eraas ipiriotin kotoma akiro ace, ice epiriaka kanu akoruo nuka akwes kec, ice ejenete nu ipu adepar luce kotoma akiro nu etiroto kes toma, konye kere ijaikino alimun awomisiot. Konye kejaas ngun da, ekot *Dare* ebe aitub akiro kotoma eirian kotoma oipone lo eyongitere isuban luka Edeke nesi lo abeit. Eiswamae lo aitub akiro eirian kotoma ayongit isuban luka Edeke nesi ejaikin kotoma oiponesio lu ipu. Kwape nat, kotoma omusaago lo iwosao kosodi ajenanut adisiar noi ne mam etubokinere yen iwosatai

emusaago ainyam, mam nesi elemar kwape yen ewosatai. Kwape eraar ibore yen kabu kotukok itunga lu ipu kwap ekitoi, akes apolou ebe mam ateker eleli ibore kwape kangin ido eponio nesi aingic kotoma okoona loka akongu.

Ajeni eong ebe kotoma akwap naka Imusugun, ekotoi ebe dimi kito epoloor ajenanut, mam itunganan yen iwosatai enyamit emusaago, konye oni, kotoma oinono loka Afrika imamiatar oni kede iboro lu ipu lu tikanunet ajenanut na epol noi naarai mam etekinologiya wok kede akerianut wok epedori aiswamaun ngun. Kejaas ngun da, iyitosi itunga nu emusaago lo obu ijo kiteleka kosodi ijo adyakar bobo, idyatuno emusaago kon tetere itepesenio ijo kwape yen itipasi itunga luce kotoma ateker.

Akoto eong aijaikin ijo aitetemet na eipone lo iwutar eong kede luka papaka atubenen imusaagon lu ekamunitos akoko naka akituk kotoma ocaalo kosi. Karai ekweny itunganan yen kokale kosi adumun ebe awoliosi akituk ke, arai kowomite ebe akokua ice akituk ke komam iso kijeniu ejik ebe ingai iswamaunit nu, atapit ediope kalu ka papaka lo adit, atukokin isap kosodete kesi alosit asurokin atekerin arai ikalia lu ajenere ebe ewojak itunga kec akanin kacut kowai lo akoko akituk. Karai da mam kes kejenete kodoco ebe ngul kesi akokuaritos akituk, mam na etikokini kesi kede aimanit ikalia ngul ebe ewanyunete kesi da arai mam akituk etakanunitos. Irwan ipu apote do ikalia lu ekokoete akituk ikulepek amejaun ikokolak kotoma opapero kec lu iswamanatatar kesi ebengit lo, kanen kinyakunete akituk nu akokuaritai ainyakakin ilope. Kakere, mam eyangakini ebe aitoduni ajenanut eroko ijo kitinga ekokolan. Mam nu iswamaete kotoma akwap naka

Imusugun konye epedori toni lolo da aswam kotoma akwap naka Afrika ne ejaar amunonut kede aminanara nepepe ka aiswamanar nepepe.

Erai alosikinet naka ajar wok kere aimo aipuc, abar kede ailajaara. Ilolo Afrika nesi atutubet nak akwap kere na epol elongilong adepar, emamei aipuc, idila ecanit kede ibakor kede ne eridakinitere luce arai amoromoro naka

apedorosio nuka eitunganane. Ipedori oni airwanar ebe eponitos nu kere naarai amamun oni agogong naka etekerene kwape ka kolo ne apolor itunga luka Afrika aimorikikina kede aiswamanar kotoma okal kede ateker. Mam eong eteyi eipone lo ipedoria oni adumun aipuc abar kotoma akerianut kede ailajaara kotoma akwap kere, kokurokite oni aitodolikin nu kotoma okalia kede atekerin wok. Mam eong awomit ebe ipedori oni aitolomun engarenok lu eminas ikes itunga, akwap kec ido kokotosi aitopol akerianut, aipuc kede ailajaara kanu itunga kec kere ageun kokalia toni atekerin. Engarenok lu ipu, ijo kede ka eong, ekurokinit aitodolikin nu ipudai kesi kotoma okalia kec kede ateker. Ikurokinit oni aingarenikin ikalia kede atekerin wok, dodo do oipone bo ali ipedoria oni aipuga akwap na ipu atekerin kede ikalia?

Ebakasi Imusugun ebe, 'Egeun amina luce kore'. Kotoma Afrika, mam ijo ipedori araun papa arai toto naka akwap, karai ikurok ijo aipuga ekal kon, ateker kon. Konye engarenok wok luka lolo, epolokinit kesi apog noi naarai akiro kere itorere toma ase o ebe nesi ejenunet loka edemokrasi, ne do idumunia ijo engarenok lu ejijim angajep noi ido kijangete emuebe kanu adumunia aseeta aibois na araun engarenok lu ejokuka lu ewurir kwape itunga luko okale, lu inapaara ido kotiting kwape ejaanakinak ka luce.

Esuula 14

Kojari kotoma Eiswamae lo Unhu-Ubuntu-Botho Erot lo Itomonet

Tevera Unhu, ndiyo zhira huru yeupenyu

Kotupak eiswamae loka Unhu-Ubuntu-Botho. Lo nesi erot lo aijar, lo apipil ipolok kus kosodi aimorikikin yesi ne ejai Edeke.

Erai *Unhu-Ubuntu-Botho*, arai eitunganane, erot loka aijar. Kanu itinga luka Afrika kede itunga lu elibunitos kotoma Afrika, erai *Unhu-Ubuntu-Botho* erot lo edukunitoi adaun ikaru lu ipu kwape lo eraunor itunganane itunganane obe. Kotoma abeit, *Unhu-Ubuntu-Botho* nesi bon erai eipone lo itigogongoritai kanu adukunio ekal kede ateker na esipo. Nesi itoswamao adukunio atekerin nepepe kede itunga lu akwapin. Apotu ipolok wok kodikutu eiswamae loka *Unhu-Ubuntu-Botho* adaun ikaru lu epu kwape erot lo erioro lo edukunere ekal kede atekersinei kotoma akwap, kede ayuwara naka itunga kotoma akwap kere.

Kotoma abeit, abu eipugae lo atyakit itunga kotoma oriagin kopedo aiboi noi kotoma akwap wok naarai abu kitoswam apedor na atiting naka ekale koiswamae loka *Unhu-Ubuntu-Botho*. Mam *Unhu-Ubuntu-Botho* erai bon eipone lo apotu ipolok wok

kiswamautu konye erai lo da erot lo egeari kede lo ejai enange arucokina kede Edeke.

Araut itunganan yen ijokuna ido kotupakinite irotin lu luka aijar lu itogogongooritoi kwape lu abeit, nesi eipone lo aiyalamikin ipolok wok kede arucokina ne ejai Edeke. Epol noi aitup irotin lu luka aijar itiya aricit ediini ece. Mam *Unhu-Ubuntu-Botho* kerai ediin agear nepe cep. Kanu abeitok, arai ediini nesi ebecokina toma oiswamae loka *Unhu-Ubuntu-Botho* ido korai aicorakinet na eirian kanu arucokinit itunga ne ejaas ipolok kec kede Edeke kotoma aswamisinei nuka ngin paaran.

Idiope ibore yen erii kotoma awomom naka itunga kanu ikamunit itunga luka Afrika nesi 'aitukumunokin ipolok' kwape ediini. Kotoma abeit, erai bobo lo eipone ediope lo emunaritere ekiror loka einono loka Afrika kede ediini keyangautu ilongwau einono kede diinikece kosodete aimo eipone lo amudiar lo ajai ne. Arai koipone kalo: kejenete ipolok wok ageun apengo ebe ejai Edeke ediope. Ajenete kesi bobo da ebe ipolok wok kesi araas arucokinet na itunga lu ejarete kede Edeke koipone lo arioro. Apotu do ipolok wok kosubutu ediini lo ijaikini itunga lu ejarete kede kalu atwak ajanakin kede Lokasuban kec apaarasia kere. Mam oni kitukumunokin ipolok wok konye itukumunokin kede aima Edeke. Konye itorit oni ne ejaas ipolok wok kanu arucokin oni ne ejai Edeke. Kakere, kotoma otunga lu ejarete, imakio kesi ejenete noi ngul lu apotu kilanyata oni alosit akwap na ikwamin. Epatanikit kesi einer kede kangul adepar oni lu iwurio pacu.

Kotoma oipone ediope ingaingai oni ipolok wok aisinerikin oni kama ejaas ipolok ice lu mam oni kiwanyunitor lu do idunyasi kede ka Lokasuban kosodete ngul aisinerikin oni kane ejai Edeke. Aso

elosi aimony wok kotoma akitukes ka imakio wok lu iteyi oni, itoni ne ejaas ipolok lu ejenete kesi, kosodete ngul da ainerakin kede lu akolo lu idunyasi kede Edeke.

Kanu abunio ediini loka ikristayon kede loka isiramun amunar eiswamae wok nesi do idumunia ijo ebe apotu akiro nu aisab toma aitolitol arucokinet na ajai kolo. Kanu kangun, ipu do itunga luka Afrika lu ibangubanguna kotoma oipone lo ti kesi arucokin ne ejai Edeke kede ipolok kec, mam do ejenete ebe inyo aswam naka ipolok kotoma ajar wok naka lolo.

Idumuni ijo ice iyunitos ebe itukumunokin oni ipolok. Akiro nu aisab.

Arai kikto ijo aitiryanikinet kede ediini ece, apotu ipolok wok kiswamautu kwape ka Yesu Kristo kotoma Okristayone – kere eraas idwe luka Lokasuban kosodete kesi araun arucokinet erot lo itodoli oni ne ejai Edeke, kanu kangun itori oni mama kec.

Konye kejaas ngun da, ejai bobo apaarasia nu eipone lo itunga lu ejarete akote aitukumunokin ice tunga kwape luka Katoda kec. Erai na adyakaret kwape nat ngul lu ewomitos ebe aitukumunokin ipolok aibois na aitorio ailipa wok mama kec tetere kesi kisinerikinete oni Edeke.

Ejaas bobo itunga ice luka Afrika lu etapaar noi. Lu kesi lu elosete aipejonokin imurok lu atagoron lu asabak kowomitos ebe epedorete lu arucokin kesi kede ipolok lu atwak kede ikwamin lu iticanete kesi nepepe ka Edeke. Erai bobo na eitapare loka ediini loka Afrika lo ipolok wok, naarai awoliosi itunga noi, awoliki erot. Arai ikoto ijo arucokin ne ejaas ipolok kon, kolot ne ejai epolon arai amojong na ajeni kesi kotoma ateker arai otale kus. Siri kilot

ne ejaas itunga lu mam erai ipajan kon lu mam ajenete itunga kon lu atwakata.

Ibore yen erimatar itunga ne ejaas imurok lu atagoron lu eputosi kede ibore yen ijaikinit itunga arima ne ejai emuron loka adekis naka Imusugun, naarai emoete kesi angaleu kede abar naka akwap kana. Ijeni ijo ebe imurok wok loko oinono emukeunete akuan kede emoyo kotoma asubanit adiope konye mere kwape ka imurok lu ekia loka Imusugun. Kanu kangun idumuni ijo ebe itunga luka Afrika lu edekasi kotoma oiponesio lu ipu elosete ne ejai emuron lo atagoron kanu adumun amukean na akuan kede emoyo da kwape nat elosiotor itunga awanyun emuron lo imukei kotoma oiponesio lu Imusugun kotoma aitor adam naka itunganan. Irwan ipu idumuni ijo imurok lu etamitos arucokin itungana yen edek ne ejai alibunet ke kotoma opolok arai bo nat okwamin. Mam lo erai ediini. Arai lo ewai lo aimo angaleu kede ajaut ejok kotoma akwap kana kokwap akolong. Mam na erai aitukumunokin Edeke kon arai ipolok.

Kotoma kanu ewuriaka, kanu kangun do, icorakinitai itnga luka Afrika ajenun kede amisikin eigur lo lo kwana esyarakin toma oinono wok. Aso kiyatakinite do eipone lo aisiom naka Imusugun na ijaikinitai oni, nuko oredion, apapulai nu iyemuto kede, nu aitururu kotoma odiinin. Abu eong kawanyu kede akongu ka ediope egurupu lo esinema loka Afrika iyatakinit akiro nu eigur kalo.

Kwape nat, ne eteyo eong efilim ediope loko Nigeria, erumitos eong ileic noi kede akadakinet awanyun ebe ipu isineman ka kesi lu ikamunitos nu ecudet luka Afrika kede eipone lo eraar ediini loka ilongwau lo ibwaikinit mama wok aijen kede aica. Kowaika, erai na aitapaaret naka adam na

itunga amoromor ediini wok. Ekot ijoaijen ebe erai ediini lo ikamunitos nuka Edeke konye mere ikwamin lu cici lu amuton. Emoyo wok erai eipone lo irucokinar oni ne ejai Edeke kajaas akwap na, ibore yen mam ekot emuron lo atagoron, arai edokita lo adam kanu aiswamaun arucokinet na kanu kon.

Kojaun ijo kwape ijaar. Kosodi ne inangi ijo elope ilajara komam icamakini awomisio nu aitakan ijo, nesi ne inangi ijo ikunyakini eiduny kede Edeke. Mam ekoto ebe kojaikin ijo agola na itegelikina, arai ebe ijo anyoun korekon, kopala ijo ilope. Kidau ijoi arucokin .

Ekot cabo ijo da, ne idumunia apak irwan na adeparit adiope, aimorinikikin kede itunga luka okale kede ateker kon kosodi ijo da ajaun toma asuban na einono, aswamisinei nu irucokinitos ijo kede ekale kon, ipolok kon nepepe kede Edeke. Ejok eipone lo ido arai kipedo aswm ingarakin ijo aiminaikin toma ajenamar na. Konye mere lo bon erot lo irucokini ijo ne ejaas ipolok kede Edeke.

Idiope ibore yen abu koedok adam kede awomoom naka itunga luka Afrika nesi atyakar kotoma ipolok kede Edeke koipone lo wok lo sek. Akirot na abeit ebe kejenete ipolok wok sek ebe ipolok kec emorikikina nepepe kede Edeke kotoma oipone 'ediope' naarai ajaas kesi kede ngin tunganan apakio kere kotoma aiboisio kere, ibore da yen abu kijaik ediini loka Afrika araut lo iswamai. Akes apolou ebe ngin tunganan arai yen arucokina ido koyongite ipolok kede Edeke isawan kere. Ne do kelemarere ediini kotoma ajar naka itunganan yen ko Afrika, kosodete ayangaun ediini lo idumakinia ijo Edeke okanisa apaarit adiope na Esabiiti, aponi koyarai eiswamae wok loka ajar naka itunga.

Aso, karai da elosete itunga luka Afrika kotoma osipanin alomanar toma odiinin lu itetiak lu kede airimokinitor aimo ne ejaas ipapero lu atur kec, kede osentas akuroki ediini aitiji ecanit kede ilongilongia lu irumunitos Afrika kwape ekale.

Kotoma kanu ewuriaka, erai akon aswam kwape itunganen yen ka lolo yen ko Afrika aireroor ajar kon kede aiyun kon. Ekot ijo asipokin awomisio kon kede aswamisio kon tetere ijo bobo kimisikini ajenun ebe ingai ijo kede ekale kon nepepe ka eyistori loka itunga kon. Kisitik akuan kon napakio nu iraar ijo itunganen yen agogong ido kosipo. Kosodi do ijo aipepeun agogong na ejai ijo na itepedori ijo bobo araun itunganen yen ko Afrika yen epoga noi, kanuke, kanu einono ke ido kotoma airumunet kon.

Adol apak ijo awoun imugug lu iringat ijo lu ijaikinitos ijo awomoom ebe einono kon, angajep kon na wurunet kede ka ijo da ilope iraa iboro lu ijaas kwap naka ka luce. Kilaka abanganut na eidisieu ebe ilongwau bon kesi ajenete Edeke adeper ipolok wok, arai bo nat ebe ipolok kec kes ajenete Edeke adepar ipolok kon. Esabet kec.

Adol apak ijo aikeun akou kede epoget lo epol kanu ipolok kon, kanu kere apotu kesi kiswamakisi ateker kon kede ka jo. Karai mam kesi ti ijo da imamei.

Abeit erai ibore yen mam esipo. Kotoma okwap akolong emamei ibore yen eraun abeit kanu itunga kere apakio kere. Abeit kere erai na kangin tunganen. Nu iyunit ijio ngun kes abeit kon. Mam epatana arai ekot da ti adumun abeit na isimonikini itunga kere, kacut kotoma akiro nuka ediini kede einono. Ibore yen epol nesi ijo acamun kede ainumunum einono kon kosodi arucokin ne ejai Edeke kon, ngin paarit, kiswamai nu kitorite

toma odiini kon lo iseunit ijo. Kanepekanen, ekot ijo ayongit kede aima inonosio kaluce tunga. Kicyec awomisio kede eiswamae loka iboro, kinumunum iboro kotoma agelegeleta nuka Edeke, kosodi ijo aijaikin einono kon ebari kojokan.

Aso do konyou kolot kwape itunganan yen ko Afrika kokeyarite akou kaju ido koleli. Kolot kobut ido emuria ailia kama kon, okale kon, kede ateker kus kere. Ekot oni aswam nu kajenete ebe iburai oni adukun bobo Afrika konye adukete ageun 'Komisingi' konye mere bobo agear kotoma 'Atunyuru'. Ekot oni aijen ebe adumun akwap adiope na Afrika kwana eraun na enonok noi ido mam epedor da. Kotoma abeit, mam ibusakinit ajaut kede akwap na elal na egogong ido ikalia kede atekerin ke kigougouna, ne do iridere kesi cut maisa. Konye, adukutu Afrika wok na itetet na epedori asipo kotoma okuar lu ilukumin 2 kede akwat 1 kotoma oipone lo iteteunet inonosio wok kasodete aikopiya kede acoa acobeu naka ka luce kotoma akwp, kwape eipone lo subunet ateker na eyongong.

Mam oni ipedori aitelekar itunga luka America kotam araut itunga luka America. Ikuroki oni araun Ibulayan adepar Ibulayan ikulepek. Emamei cut eipone lo ipedoria oni ailany itunga luka Asia kotoma arut itunga luka Asia. Ekot oni da, itunga luka Afrika araun itunga lu mam itelekaaro kotoma araun itunga luka Afrika.

Aso, ekot oni eiteteun Afrika, mere aitarau ne Omusugun. Keswamautu nu ketoswamaete eiswamae loka *Unhu-Ubuntu-Botho*, lo etoswamaete ipolok wok ikaru kede ikar kanu naarai kiminasi kesi oni.

Ko kaju kangun, iteyi akwap kere Afrika kwape aibois na elibuniatar awomisio nu kos nu

ikamunitos eitunganane. Kitelekaasi oni luce kotoma akwap kotoma aswam ibotro lu ejokukatar kesi kotoma konye irumitos apak na egeunatar kesi akotokin agangat wok kotoma oboro lu mam kesi epedoritos: eipone lo adukun ekal lo esipo, ateker na mam ejio, na mam itunga ke emasete ikiye kwape ejiaye, na epedorit aimorikikin aipuc, abar naka akerianut kede ailajaara kanu itunga kere.

Ejai Afrika aijaikin akwap ibore yen emamei ngin.

Kosodi ebuni na agear kede ka ijo.

Esuula 15

Kalosete toni Aiteteunio na abeit naka Afrika.

Kotoma osuula ka lo engetakin kotoma oitaabo lo 'Araut Itunganan Yen ko Afrika', alosi eong ailimokin ijoace kotoma awomisio ka nu ikamunitos adukun bobo Afrika. Anyarit eong na 'Akirot na Imorikikinit ka kere'. Mere ber eong ketetemik ijo:

Ateker naka Afrika, kwape atekeresinei ace da, erai ibore yen iswamaunitos iwaitin iuni lu apolok luka aijar: toman ateker, toma akerianut kede toma politiks. Ajeni eong ebe ipu akwap nako Afrika atyokusio kotoma owaitin lu kere. Nesi epepeuna eong 'Akirot na Imorikikinit ka kere' adaun apak na ewoj, naarai mam epatan kwana agwetun Aiteteunio na abeit komam kigeunit aitetem akirot na ikamunit kere arai aitam alimun kanu inyo abosia ateker naka Afrika kotoma oboro lu elalak.

Kanepekanen da, akoto eong aitam aijaikin ijo iponesio kede abongonokineta nu ikamunitos aitiji atyokusio wok kere aimoriarit tetere akwap wok epoloi. Nesi atemar ebe, kotoma awomoom ka, atyonor aitinang atyokusio nuka Afrika kere aimoriarit kwape akotore. Epedori ice atemar ebe, 'Mam ijo ijeni ebe ipu Afrika atyokusio !'

Nu abala eong kesi nuta ebe acepak ejaas Afrika kede atyonis *adiope*, na do enyanyara toni owaitin ice da ngull

Nes atemar ebe, kotoma awomoom ka arai kippedi oni asekun ibore ngin idioep yen etobos ateker naka Afrika adaun ikar akwatat kede adepar lu atuboros, ipedori oni asubun alosikineta kede iwaitin lu itepedori Aiteteun ajaikin.

Na nesi 'Akirot ka na Imorikikinit ka kere' kanu Aiteteun naka ateker na Afrika :

Kotoma oyistori, adukunitai ateker naka Afrika kotoma okal, okal lo elal, oidunyeta, opapero kede ateker na ocaalo. Ne nesi aibois na itemonokinere kede asubun itunga ikulepek akwap. Iboro kere lu ekamunitos araun itunganan ilope akwap yen ijokuna eswamauno kane. Emoriarit na ajaikin itunganan iponesio lu acamunitai kotoma oinono, akerianut kede politks arai eipugae.

Araas lu irotin iuni lu mam alemaros kotoma aswamisinei nuka ekal kede ateker kotoma adoketa kere. Einono kakere emoriarit angajep na inerasi itunga, asioman, ediini, angaleu na akuan kere aisiyal luce, akerianut emoriarit inyammat, ne peron arai itogoi, aisek iboro kede aswamisio kede iboro ice lu agwelanar. Politikis emoriarit eipugae kitoritete toma oiswamae loka 'dare', aidyek imusagon, aipur enguingui kede eigur, kere kolosikinete adumunia aipuc, adyekunio kede nu eirain.

Kotoma okaru lu atuboros akwatat kede ice kanu akiro nu ilongwau aipuga oni kede do eswamae loka Imusugun, apotu do irotin lu iuni lu itunga ajaut kede akapakina ido kede ajenanut na aitodolikin itunga kec aswamisinei kede ajokusio, kolototo do anyoun ka ne ejai ekal kede ateker toni ne ejai apugan na okau kede ngin na kokiding kede iriongeta luka ojokotau ice. Aso kanen, kojalakitete iriongeta luka Afrika lu kolo lu oinono etwakiarete kede atwanare na aronon.

Eyunit eong ebe aibos na adoloki Afrika erai kanu eismamae loka Imusugun apdedorit aijen atyokusio nuka itunga luka Afrika kede do eipone lo ayarere iriongeta lu oinono. Kongolik ber ijo apugasinei nuka kwana kotoma Afrika: emamei adiope ka kesi na epedorit aismamaun iroton lu iuni kanu ajokus naka ike itunga.

Kanu kangun kotoma ocaalo ijaas do iriongeta kede aswamisinei ne ebenen noi, kosodi do apugan nako kau da mam elosikinit toma aijanakin ateker, ate kerek erai aiboisio nu ocaalo nesi eyongitere eismamae lo einono. Kanu do kangun, iyatakini do ateker aibos kotoma oinono, kiyata ecanit da, ingungeta swi, kede do itunga aikarun eipone lo ipugatar bonik.

Ne kere etakanunete kotoma oiponesio lu ipu noi kotoma ajar naka itunga loko ocaalo ilolo, imoriarite na adisiar na aijamama kede atitingu, akurian kopol, kosodete do iboro lu einono airi lai ka ilongwau, imojumojun emoyo da, opolor etengei kede idwe aremit akoikes ingaren kanu enyame lo aronon, eismamae lo mam ajokus ke loka politks kede ipatei, eyarie kede ejie kopol kede itunga anyunyuranut noi.

Kotoma awomoomka, ejaasi iboro iarei lu ebeit aswam eroko oni kegwetakina Aiteteun naka Afrika na ebuni aiboi kosodi aikeun ateker naka Afrika. Eraas nu na sodit, oni ageun kede aitemun adukun atitingu kawate wok kotoma aitemun adukun einono kede aitikwarun iboro kere lu einono lu apotu kiyiloros lem kotoma oinono kede ateker. Imoriaritos nu ediini, angajep, aisisia, awoere kede aboliasio, kede iboro ice da.

Na iareit, ekot oni aitemun adumun ajokus kotoma oyistori lo epikakinitai toma acoa kede apirianut naka itunga luka Afrika. Epol da bobo

aibwaikin ajokus toma acoa na emoruno kede itunga luce ainyekikin na esiomuno kotoma oitaaboi bon, kacut ngul lu iwadiaktos Imusugun lu mam ejenete nu ikamunitos Afrika da. Iburai oni ainyakakin aswam na aisisianakin ateker wok ne ejaas ikalia kede ateker na ocaalo. Akuroki ilongwau aisisianaikin itunga wok mam edolit awosikinit kesi kede aswam na. Icorakinitai oni aitopolor eiswamae loka Afrika kede eipone lo aijen kede aisisia. Ejaas Afrika kede awaragasia ka atetemeta ni acoa nu ipu noi nu itoswamaere akituk kede akonye ido kisisianakinete itunga iboro lu oinono lu ipu. Itunga luka Afrika kes eminakinitos aisisia ibore kotoma aitoswam akanin, konye mere aisiom eitaabo. Kanu kangun, ekot aitopolorit aisisiaunibore kotoma aswam kede ajaut toma ogurupu ido koraas lu iboro luitopoloro kotoma osomeri lu kokuju kede uyunivasitin. Koipone ediope, aitatam awaragasia nesi ediope erot lo epol lo icorere itunga kotoma acoa naka Afrika kede apirianut da. Eraas awaragasia nu imorikikinitos iboro lu ipu toma kec kowai lo aisisianakin itunga. Iteyi ijo lolo 'aitatam awaragasia' nesi lolo araun ibore yen epol adumun kotoma ke kwape ebisines, bala kerai Imusugun kolo kisisianakinete oni aitatam awaragasia, kwape oni kolo sek kijeni nu noi eroko kes kepona? Kijeni oni ebe eminasi itunga noi aisisia na itoswamaere awoere, aikosi arai aibina kede aite aboliasinei kwape ejaar toma oinono wok.

Atyonus nesi na ebe kitapaar oni lu ipu noi ebe acoa nesi bon na esiomuno kotoma oitaabo kede apapulai nu iyemuto. Ayatakin amunyu ajimi, arai mam acoa ngin itorunit ne ejaas Imusugun, ido awomisio ngun komam itotoritere toma aingic naka sayans, akes apolou ebe acoa na epol naka itunga

luka Afrika araun do na imuwaritai awai kwape ebe bure, ebe erai nu ikwamin nu mam adumunet kec.

Aso, ebalala 'Akilot ka na imorikikinit kakere' ebeadukun bobo ateker naka Afrika kede itunga luka Afrika adokar adoketai na idelelel ekot aitup nuta:

Na sodit ageutu aiduk Afrika bobo kageunitos komisingi alosete toni atunyuru. Kotoma apaarasia nu kijai oni kede itunga idiopediopen lu edit agogong, ikalia kede ikalia lu alalak da lu igougouna kede do atekerin nu ocaalo nu ebonot noi. Etapit kwana itunga ejautene lo adukun ateker na akwap kogeunitete kede itunga luko ocaalo. Kotoma awomom ka arai kiyatak oni koipone kalo, ibuni oni amudiar ateker kotoma adoketai nako kwap, keyatakinitos adukun ateker na eputorit ngin naka Imusugun, kayararete nu imisikaunit oni nu einono, kede eiswamae lo kolo lo asipo keng. Idumuni molo oni do akwap na egogong apugan nako kiding kede ngi nako kau, ojokuna akerianut kec kede iriongeta luka ateker , konye korai na etwakiaritos ikalia kede icaaloi.

Na iareit, ekot oni ageun erot lo awojan lo ajenun ebe ingai eong ka kwape itunganan idiopediopen kede da ateker aimoriarit ketorite toma oinono, odiini kede iwatini ice da.

Na iuniet, icorakinitai oni awoun kasodete atupakin irotin itomon luka *Unhu-Ubuntu-Botho* kotoma adoketa kere nuka aijar nak itunga luka Afrika ageun itunganan idiope bon, ekal, ekal lo elal, ateker na ocaalo, apugan nako kau, ateker na akwap na reya, ebisines kede apugan.

Kawanyutu ber oni eipone lo iswamaunotor nu kotoma owaitin iuni lu apolok luka ateker na Afrika:

1. Einono

Apaarasia nu alolo, iteete apugasinei nuka Afrika einono kwape ebokiatar Imusugun akojo kede amor kanu aisisiaun nu ajaas nen sek kasonya, akes apolou ebe aite einon kec bala aipejokin ibore yen itanyami akonye kede aki komam nu ilosikinit da.

Mam na epedori ainyakun arai agwetakin Aiteteunet naka Afrika. Acepak edek einono loka Afrika kwape eridakitere (eneikinitai), konye eroko ejari kosodi eroko ijainikin itunga iponesio lu aijar kangin paarit kanu itunga lu ipu luka Afrika. Mam aiteteunio naka einono erai ibore yen irujauna, konye erai eipone lo iteteunet kede aisinapikin aijar na itunga naka ngin paarit. Kosodi bobo, ne gearet nesi ekal kede ecaalo. Apugasinei nu ipu nuka Afrika eremoritos einono okoona korai do lo ekutunio kanu aite aboliasio kede aswamisinei nu itunga anapit igoen lu kolo lu einono. Erai na ibore yen aitururu. Ekot apugasinei ayangar aijen naka einono aimoriarit iboro ice kwape angajep, ediini loka itunga luka Afrika, aisisia ageun eiditeu toni osomerio lu adoketa nu kokuju, esayans loka Afrika lo ipolok, aputosia, awoere, aite aboliasio kotoma oisawe kede iboro kere lu iswmaunitos itunga luka Afrika kotoma okisila lu einono kede eipone lo ayayit luce, kede ice da.

Kidolu oni ne ejaas iboro lu inomuni akou, ekoso, awoere itelekaarit Afrika kede itunga kec luce luka akwapin ace kere. Ti do lo erai epir ekingigi lo isipokini oni lo egogong kanu adukunio

Aiteteunet naka Afrika. Kotoma akwap kere, eraas awoere kede aboliasio nu ipepeni akou

iboro lu eminas itunga noi aitoswam kanu aitolosio awomisiot kec kede ajenandar. Ajeni eong ebe kotoma okaru lu kwana ijai oni ekotosi itunga lu ipu adumun ailajaara kede aitodolikino naka emoyo. Ainom aputosio, awoere kede aikosi kesi ejaas kede apedori na aimorikikin akwap kere. Kosodi ti Afrika, na epol apirianut kotoma akiro nu, aingarenikin nuce kwapin.

Kejaas ngun da, karaida eraas itunga luka Afrika lu eperiaka noi kotoma akiro nu aboliasinei, mam kesi eyuwara kotoma obakor. Ekot iboro lu kere aijulakin toni oipone lo epedoriatar ayangaun adumunet kama kec kowai lo awoere, aikosi, abolisia kede ice da. Ebuni ti na aingarakin oni aikeun akwes wok kuju mere bobo asalakinit iluri kapogas kwape itunga luka Afrika. Ejautene lo abar wok na erai nu irumuni oni kama ejaas ipolok wok.

2. Angajep kede Aisisia

Erai angajep idiope ibore yen epol noi kanu aimorikikinitunga kede aimorakiro nu einono toni aikwarun. Naarai erai einono eipone lo ajar na kangin paarit naka ateker, nu iyunit oni, nu iyengarit oni kwape nu epolok noi, iwatini lu icamunit oni lu iswamaere iboro, akes apolou ebe ekot aisisia da korai na idulokina toma oinono. Nu ican, kotoma Afrika lolo, apugasinei nu ipu kesi etyakaritos aisisia kane ejai einono. Nu do atakaanutu kesi nuta: anyanyar do itunga aisac einono kec ne iyatar aisiom kec nako osomeri.

Kanu Aiteteun naka Afrika atakanun adumun alias, ekot oni ageun aibwaikin agogong wok kere toma akopiya kotoma acoa

etekinoloji kede acobeu kane ejaas itunga luko Okide kede Too. Iburai acoa kere, na wok na wuruenet kede na ilongwau, kere aijulakin toma angajepesinei nu inerasi itunga wok kanu aisisianakina.

Asesenu eong kede amun na epol noi awanyun ebe kegeu noi mot konye alosikinitos aijulakin acoa kere toma angajepesinei wok kotoma Afrika. Epol noi kanu oni itunga luka Afrika, kwape kolo itunga luka Asia eroko oni kerenguna, nepepe kede atekerin ace nuka Obulaya, ebe ekot idwe wok aisia iboro kere kotoma angajepesinei wok, kwape nat aimar, e *physics*, e *biology*, kede ice da kotoma angajep na wurunet. Ejaikin oni bobo aisia Amusugun, Apalasan, Mandarin kede angajepesinei ace nu longwau kanu apedor aisec awomisio kede ka luce kotoma akwap nepepe agwelanara ebisines kede aijen nuka einono nu ipedori oni aikopiya. Konye ekot oni aitoswam angajepesinei wok nu ore kanu aisisianakina idwe wok!

Karai da etemari ice ebe aijulakin acoa na ejai kwana kere kotoma angajepesinei wok nu Afrika nesi erai aswam na epol noi, konye ajenu eong ebe, kowanyu ijo lolo iboro luka tekinoloji luka ijaar oni, mam na eraun ibore yen ti eyangaki apak naepol da. Eyunit eong ebe kotoma okaru ikany toni itomon luko oingaren idumuni oni eipone loka okompyuta loka *Internet*, lo epedori aijulakin akiro toma angajepesinei nu ipu nuka Afrika.

3. Ejautene loka Emoyo

Eraas itunga luka Afrika lu idulokina emoyo toma kec ido kidiinioko noi. Ekot oni aireroor eipone lo kewutakinotor ediini loka ipolok wok

kede ngol lo ilongwau. Alosi eong ingaren, akot eong aisitikin ijo ebe kwape etunganan lo itetet loka Afrika, ekot oni dun aisitinikin bonik ebe mam Lokasuban kabu kijaik oni arereng na ajaut toma akwap na ajar kosodete oni aicanican apka ke, ebe aitam aijulakin eiswamae ke lo alaunan.

Akotos ipolok wok kede Edeke oni ajar lolo tetere ipedori asubun eyistori loka itunga wok lo itetet. Aso kotoma odiini eraas akiro nuka ebe apuponoro kede atitingikit ido aimorikikit luce mere aise ikur kobaale. Na sodit, ekot ijo kwape itunganan yen ko Afrika ageun ayongit ediino kon lo kijaiknete ijo ipolok. Akirot ace na epol bobo nesi na ebe ekot ijo ayongit idiinin ka luce itunga. Atemas ebe, mam ijo iburai aijulakin ice tunga toma odiini kon loka ipolok. Arai keseu itunganan yen ko Afrika atupakin ediini ece, siri ijo kimamunos kede atitingor, erai aseunet ke. Ekot itunga kere kede atekerin aitup nu iyunitos kesi. Oni kere kiwuta alosit arai arucokina ne ejai Edeke.

Aso eong kanuka, mam eong apodo, arai irai ijo Ikristayot, arai Isiriamut, arai Iyudayat, arai itunganan yen mam iyunit ebe ejai Edeke. Ibore yen bon epol nesi acamunit ebe iriaka oni kere k' akonye ka Lokasuban kasodete oni kere adumun iwaitin lu eirian lu dolkinet Edeke ketoritos toma ayun wok.

Karai da eponitos kolo imusugun lu Kristayon kosodete alimokin oni ebe ediini wok lo inerar oni kede ipolok erai lo 'ikapirin' lo mam Edeke ekot, ebe ejai erot ediope bon lo kirucokini oni mama Edeke, mam ibore yen ti keyangau aretokin naka imoyoi kotoma Afrika na itetet. Konye do ti ijoi

ajaut kede apedor na acamakinit ngin tunganan kiyunite eipone lo epupio nesi kasodete kere aijar nepepe karai da egelegela idiinin, kojena da kotoma okisila, kotoma oinono, aisia kede akiro nuka politiks.

Kanu Aiteteun naka Afrika, ejaas ajokusio nu ipu nu idumuni oni kisikwaru oni ediini loka ipolok wok. Ipu ajokusio nu kitwakia oni kanu aisac ediini loka ipolok wok kalosete ne longwau. Idiope ka kesi nesi ne kwana adisiaror agogong kotoma okalia kwape aibois na epoga itunganan araut emeeba ke. Adisiar amina itunga luko okale kede ipajan kitopoloritete amina itunga lu mam kijenas kede ka ijo. Apoloor do kwana 'aitimit luce' luko kinga adepar 'amina' lu kon itunga. Nu nesi kijaar oni kede ikokiok lu ipu noi lu emamikinit ejautene lo aijar ejok. Ikolo amamei ijo aseun amina itunga luka okale kon lu 'aokot kus'. Kicorakinitai ijo arai ikito arai mam. Ilolo erai do na aswam naka luko "ojokotau" lu etacio kanu kesi aitoduun ebe "itimitos" kesi yen ejai eipud kwape idwe lu ican.

Kotoma kanu ewuriaka, aisikwarunio naka emoyo, arai aisinepunio naka amina na elosi edungiori naka itunga kacut kanu itunga luka okale kon kede ipajan, araut ipei kede isuban luka Edeke, kasodete ainyakun bobo agaius naka aijar kotoma obisines, opolitiks, kede oipugae kesi icorakinitai ajaun kanu aitopolo aipuc, abar naka akerianut kede ailajaara. Kotoma ainyakakin agaius toma aijar ko oriongeta luka ateker, epote itunga ikulepek bon araun lu idarete eipone lo ejanakinotor kesi kede ka luce, kede isuban luka Edeke nepepe ka iboro luka luce. Erai lo eipone lo edolit lo edit ebeyi ke kanu aingarakinia itunga wok adepar ebe adukun ajore na epol na ipolisin kede

ikeyarin kede atubok imusagon kokootin kanu aidar ikisila.

4. Politks kede eipugae

Epurujaun Afrika ilolo adepar kolo sek da koipone lo ajenun ebe inyo apugan arai aingarenikin na abeit kotoma adoketa kere nuka ateker. Mam iteyi iwuta do oni ebe motoko adukutu akwapin nu elalak ido kimorikikina!

Kwana epate loka politks nesi erai erionget lo egogong kotoma okisila lu iswamaunet akwap na esipo. Konye akiro nuka ipatei luka politks eraas iboro lu ikopiya kama ilongwau. Ekot oni itunga luka Afrika kede apugasinei wok ajenun ebe eiswamae loka ipatei luka politks kede lo adukun atekerin nu imorikikina ma eraio esiwamae wok nesi agirio aswam kacut itam ijo airere eipone lo itunga wok k' ocaalo kede ateker. Kotoma abeit, erai eiswamae loka ipatei lo ewutai aisac k' aiboisio ace nuka Imusugun naarai agir aswam ejok ayangaun edemokrasi.

Adumunet naka eiswamae loka politks lo ejokuna nesi itunga ikulepek adumun apedor aipugaikin bonik kotoma adoketa nu ipu kotoma ateker kec. Kwape alimunitor eong sek, ekot nu ageun kotoma okale, okale lo elal kede ateker. Akes apolou ebe Aiteteun naka Afrika ekot oni aireroor eipone lo isikwarunet eiswamae lo apugan ageun kotoma atker na adoketaik nako ocaaloi. Aso kwana kotoma ocaaloi da, idumuni ijo itunga lu imorimoria lu egelegela inonoi kec, ekot do ageun aingic ebe eipone bo ali eyengarere kesi kere keirian, karaida egelegela kasodete adukun ateker na esipo kotoma oinono kede eipugae kwape kolo sek.

Arai mam itunga luko okale arai ocaalo epedoritos aipugaikin bonik kosodete nepepe aitopol abar na ejai mama kec kotoma asubuneta nuka Edeke, kosodi arai mam kesi kepedoritos aisinapinikin ilongilongia kama kec kede atyokusio nu esurokinete kesi ateker kec, kitoswamaete iboro kede acoa na ejatatar kesi, akes apolou ebe eroko apak ido mam oni ipedori adukun akwap na epol na elal ido kimorikikina kwape apei arai da apugan kotoma doketai nako kaju.

Ibore yen ibusakinit engarenon loka apugan kotoma Afrika kede apugan ke aswam nesi amisikin teni

Nu inyoika iswamas kotoma akwap ke kotoma okalia kede ateker kowai loka politks kede eipugae. Nu kesi ebeit aswam eroko Aiteteun naka Afrika etakanuna. Atyonus bobo ace na naka Afrika ebe ejai aretonokin noi kiding apugan nako kiding kede iriongeta luka ateker luka einono lu etamitos aikeunun akwes kaju. Ekot ejie lo aitanang katipet noi.

Atyonus na kos nesi na ipatei ko Afrika. Ne nesi ekotor kojaun aijulakinet na epol noi, arai ipedori oni aiswamaun ipatei kede apugasinei nu epote acamun aingarakin Aiteteunio naka Afrika ajaikin.

Akiro nuka ipatei lu Ipugaete kede ngul lu Itepegete kesi eraas nu longwau kane, mam ber eraas nuka Imusugun arai Afrika da. Ikopiyao akiro nu arokok bon kotoma oipugae loka akwapin ace. Kotoma akonye itunga luko Bulaya, ipatei luka Afrika kesi iswamete ebe 'lo eteleka nesi enyami einer kere kosalakinitos luce ikanyete etengei'. Nesi iwanyuna ijo itunga inyinyiritos kanu aswam nu epedorete kere

aitelekaar ase o kosodete do aitoswam atikit ngin kanu aimakakinor oicolong mam nyounet kipugai luce kede aburacu!

Esisiautu engarenok luka Afrika abanganut ebe mam ekotoi aingitunun arai ainerinun kede ka luce ido yen ikewuni akou nesi ekotoi kobaarai eroko kikewuna kuju. Mam ekotoi kingitai kesi nu iswamaete kesi kacut ijo ngin irai itunganen yen kadoketait nako ocaalo.

Abala eong ebe ewutasi ipatei luka Afrika aikopiya eiswamae lo mam iswamanara kede akwap wok naarai ewomomoe loka Imusugun egelekina kane ejai loka itunga luka Afrika. Aiteteinet naka akiro nuka ipatei kotoma Afrika nesi ekoto oni aikopiya akiro ngun bon nu ejokuka kotoma opatei ice kotoma Afrika kede akwapin ace, kosodi kiswamanar kede ejautene wok. Kenyekikisi angopit kotoma oiswamae lo mam oni da ikulepek kimisikinit ebe *nationalism*, ne iajikinit ice angopikit itunga kec abilakinit abotet koiponesio luka akerianut.

Kwape nat awanyunet, mam epate loka Afrika ti lo ecamunitai ebe erai lo abeit arai mam etupakinit eiswamae loka *Unhu-Ubuntu-Botho* kotoma oipugae kede aingarenikit itunga. Ekot ti ipatei kiswamaete kanu itunga ageun kadoketait naka okale kolosi ijo kuju ateker ne ejjar ngin tunganen kede eporoto aswam na ayinakina.

Kotoma abeit, eyangauni nu aingiset ebe ikoto oni cut ipatei luka politks kotoma okaru lu luka ilukumin 2 kede akwatat 1? Kirereo oni ase na pacu na ajaikina toma United States of America kede Germany, kanu amamus kede eiswamae loka ipetei lo ecayi, aponi do itaraunai akiro nu ase nu ilosere igoen luko toma luka

engarenok kotunga. Akiro nu ileic, ebe tetere aseak engerete aseun lo asurup kon! Kotoma oipone bo ani eraunor eiswamae kwape kangol lo odemokrasi ebe 'kanu itunga, ido koraas itunga ikulepek' – ne enyilatar engarenok imorosinga kaluce eipone ngol? Cut, ekot ti itunga airwanar ebe eipone ali epedoriatar kesi aipuga akwap kec kinerasi akiro nu ileic kocayi akolong?

Kageunete kane, akot do epate kere loka politks, kotoma adoketa kere, aiswamanar kede eiswamae loka *dare* koiponesio lu aimorikikit itunga kere kotoma adoketa ageun nu didk nuko kwap nu ateker tetere ngin tunganan ejeni ebe iburai nesi aswam kwape itunganan kanu adukun akwap na ecamakinit itunga kere araut ikulepek ipatei kede apugan kec, kioponesio lu ijaikitere kesi da apedorosio nu aitolot apugan kec.

Kiyatakini, ekot eipone lo aipugaikin bon kotoma opatei kotupite esiwamae loka *Unhu-Ubuntu-Botho*. Imorikikit na einer kede ka luce etenak, atitingu kede apuponor nepepe kede aswam nepepe kede ka luce – kesi akiro nu ejokuka oni aidulokin toma oiswamae loka ipatei wok kotoma akirot kec naka politks. Egitar na noi kede nu eteyi eong apaarasia nu ne elosikinototor engarenok 'alimonokin luko kwap' akiro kec isawan kere.

Ekot ti alosikineta nu kotupakinitete kotoma oipugae kotoma akwap kere, ageun kotoma apugan nako kau, airabet kede apugan nako kiding.

Ebuni aiyatakin araun ejie lo ti aitopolor nuka adukun akwap naka Afrika na imorikikina, kojaas iwaitin kere eyunakina nu

aiswamaun Afriak na diope. Kanu adumun nu ekot ipatei kede iriongeta luka politks kere ailajar kosodete acamun apuponor kanu aiswamaun nuta:

1. Ayayite naka ateker kotoma ocaaloi na erai tunga ikulepek akwap ejaas toma politks.
2. Aitililiar eiswamae lo aronon lo apotu ikorion lu egirete ilongwau kanu aipuga oni kasodete do oni da airum emudukio. Mam lu keraas ikorio lu egirunete ipolok wok nepe cep arai bo nat Edeke. Be. Erai swam naka itunga na emamei akou kede akeje toma kec, lo elosikinit atyakatyak itunga luka Afrika, aibois na aimorikikin, nesi iwanyuna ijo ebe iriongeta kere lu itami oni adukun kwape nat Afrikan Union, SADC, East Afrika Community, ECOWAS, kede awomisio nu ti ejokuka kwape nat NEPAD, kere etyonikinit adumun akwap na epedorotor kesi aswam kwape ti elosikinitere, kanu aiswamaun ecaalo ediope kotoma Afrika. Ne ito epedoriatar iriongeta lu adukun esusut kotma adoketa nuko kwap nuka ateker kotoma Afrika, ebuni Pan-Afrika araun ibore yen itilori aibois na aingarenikin Aiteteunio naka Afrika.
3. Ejai eong akirot adiope bon na akoto eong aiyatakin alimokin ijo kanu ikamunitos politks kede eipugae ebe iponesio lukolo luka ingarenok lu kijaa kede ka oni kotoma Afrika kesi eraas lu edolit ido kiswamaete kwape ice kere kotoma kanukec. Enera eong nu naarai apolor ecelet noi kotoma Afrika kanu ajenun ebe ingai erai engarenon lo abeit ido aingarenikin bo ani etubit.

Kakere, iwanyuni ijio ebe ewutasi ipatei lu ipu kotoma oiswamae kec ebe lo aseu kotoma Afrika aidotor asesen naka itunga awai kama ejaas lu ebeit aingarenikin, ainyakar toni ne ejaas akiro nuka adukun adiope akwap ebe *nation state*. Epolo lolo ajenanut ebe emonyete itunga noi karaida eseununutu kesi ebe apugasinei nu ekotosi kesi kotoma odemokrasi. Bobo, erai na kwape itunganan yen eduki etogo ageun kede aikaj atunyuru koroko arwatat edukio ejok. Epedori edemokrasi kotoma Afrika adumun karai kitoswamai eiswamae lo ageun ko kwap kalosete kuju, kotoma aiswamanar kede itunga luko ocaalo ber.

Epolo noi na itunga luka Afrika ajenun ebe iboro lu ejautene lo egelegela kesi ekotoi aswam kotoma aingarenikin na iponesio lu egelegela kosodi da ebe mam aseu bon erai eipone lo ibecokina kanu adumun engarenon. Kwape nat, ingarenon yen *esekunio asekun* da erai na ibecokina kotoma ojautene lo itoswama yen esekunitai apirianut ke kwape elimokinitere nesi yen ari lu asekunete nesi. Ejai ne *eseunere* ingarenon aseun kane ejaas lu ipu kanu acoa ke kede ikaru lu adau nesi ejeni ibore yen iswama kanu itunga ke. Koipone kalo, esunio kama ejaas lu ipu tetere adumun lo itelekaarit kakere kanu ateker kangin. Ejai bobo eingarenikine lo *irumuna* kotoma oinono ne ejaar ateker ngin aiyunit na epol toma oiswamae loka einono kec kotupitete nu akotosi ipolok kanu arucokinit nu kolo, nu kalolo kede ka nu kamoi. Ejai bobo eingarenikine lo *abeyanakin*, eipone lo ipolok wok, lo itoswamo kotoma atekeresinei nu kokalia nu ejenas, kojaas kede apedorosio nu abeyanakin aingarenikin kotoma ateker kec.

Eingarenikine araut ibore yen ibecokina kotoma atutubet ngin erai eipone loecamunitere eiswamae ngol kotoma atutubet ngin arai koinono ngol, konye mere ebe aseeta kede avootin kotoma ase. Epolok nu noi apugasinei nuka Afrika aiyitunit igeari oni aremor ingaren kede Aiteteun, naarai iponesio lu eingarenikine lu imara oni ko kuju, kimorikikite lu kolo, ekot aigang, aitogogongoor kede aiteteun koraunos luka kwana, tetere epedorete aibecokin toma akwap wok kotoma oiponesio luka eingarenikine.

Apugasinei nu ipu ejaas kede ekonstitusion kede ikisila kede eiswamae ece lo duc itumudaki itunga kanu ikamunitos nuka eingarenikine kwape kolo akototor ipolok wok. Aiyat amunyu toma anyimi, apugasinei nu ipu eminakinit do ne, kogearete airid iriongeta luka einono, kanu kes alomar toma oicolongo ngul. Ka kere, mam apugasinei nuka Afrika epodokinitos noi iriongeta luka einono, kwape ibosin kec lo kolo ipugatos oni lu ajaas kede ajenda kec, ekotosi kesi aitoswam Ijaka kede Apolok Atekerin kanu aiyasia ajenda naka politks kec, kijaikinitos iriongeta ngul agangat adio arai ca nat erereng kesi adumun ngin da itiya aitopo iriongeta ngul kotoma oingarenikine lo kolo. Iwanyuni ijo akwapin ace itaraunitai ijaka ngul eswamak luka apugan arai bo nat aijaikinit kesi da ajaut toma Airabet konye kimikitete einer. Kijainikinio kes eropit da tetere ewenete ingokwo kec kanu ikamunitos itunga lu ingarenikinitos kesi. Idumuni do ijo kesi elosete kede ibelai mere lu einono konye lu epugak luka apugan na itetet. Kijaikini do na aibois naka politks ngin adepar na ti einono. Ekot oni aijen ebe mam Aiteteunio naka Afrika egeun nepe cep da karai itani Ijaka bon

kinyekinitete itunga lu ko kwap lu ebeit amoruna kede ka kesi awomisiot na amorun eingarenikine.

Ilolo kotoma Afrika idumuni ijio atekerin nuka kwana nu elemara kotoma oiswamae loka einono arai bo nat ngun nu mam iswamaete kotoma eingarenikine loka einono. Imoriarit ne, kwape aitetemet, aiboisio nuko otaun kede idunyeta kec nepepe kede ikaabin luka akerak. Idumuni do ijo kane eingarenikine erai lo ase o arai ase kunio. Ekot kerek engarenok ngul aitoswam apedorosio kec kitoritos toma aiswamanar kede ka luce kwape ekotor einono wok.

5. Akerianut kede Ebisines

Ebala 'Awomisiot naka Kakere' ebe ekotokin do aijulakineta nu etupakinitos kotoma akerianut kede ebisines kanu adukun akerianut na ejokun ido kingarakinite Aiteteunio naka Afrika:

Akirot na sodit na epol nesi na ebe ebisines loko okale kede loka ateker kwape nat ifaamun luka ateker mutan imorikikina kesi bon epedorete adukun akerianut na egogong kojautene wok kotoma Afrika.

Ekot do akirot naka alosikinet naka apugan arai epolisi lo akerianut, korai lo ebongokini kede ayinakin apolus toma oriongeta ngul lu ipudai kanu aigangai itunga kacut aigang ebisines loko ocaaloi luka ikalia.

Na iareit, ekot oni adukun akerianut na esipo naka ocaaloi kere eroko oni kegeuna adukun akerianut naka akwap kere aimoriarit. Eraas nu naarai kotoma Afrika ipu itunga lu iboyete kocaaloi. Kosodi bobo da, ocaaloi nesi epurio ecanit kede ibakor, nesi ekotor oni aitiji akirot na kotoma osusut ke kangina, itiya ne imunor ino airuja ebe

epedorete itaunin aiswamaun aswamisinei nu itolomarete itunga lu ipu kocaaloi.

Kanu aiyatakin esipidi lo apolou naka akerianut na itetet kotoma adumunun acuuman nu etataikotoma otaunin, ekot oni da aitepedor itunga luko ocaaloi akor kede aitolomunun inyammat lu ipu kotoma obeyi lo edit, kraai do na alosikinet na aijaikin itunga lu ocaalo aswamisinei nu edumuniatar isirigin, tetere do eswamak luko otaunin esipos kesi da kede ainyam na epedoro. Nesi atemar ebe, ekotosi itunga lu iswamaete kotoma otaunin inyammat lu ipu li edit ebeyi tetere kesi iswamaete kede agogong kotoma ocuman luka etatai tetere aitopol akerianut wok. Inyammat ngul ekot korai itunga luka omisiirin lu didik luka ikalia kotoma ocaaloi kesi itolomununete.

Nu aiturur, ileleba lolo itunga otaunin lu abwotunak kotoma ocaaloi kanu aimo aswam, ebe ewutasi akerit kotoma ocanit loko ocaalo, kopote do otaunin ne mam akiro epatakatar arai bo nat kesi adumunia ne perot da komamete ber aswamisinei kanu kakesi kere.

Kiyatakini bobo oni, ekotoni aisisiaun kane ejaas ipapero wok itunga luka Asia, lu apedosi ejok noi aitopol itunga kec luko ocaaloi kede atekerin da, kotoma oiponesio lu aitojiokar aisisia, angaleu kec kede aijanakin kesi iboro lu itepedorete akerianut apolou kwape nat iguudoi, iroton lu edolete ngin bois kotoma ocaalo, akipi ni idilas, akim na eipiyei kede kice da. Nu kanu kec da itopolorete akerianut naka ocaalo kosodi aitepedor itunga adumun acoasinei nu ipu nu aswam ebisines, erok kesi kewomomouna nu aibwot toni otaunin.

Akirot ace na epol nooi nesi na aisikwarun akerianut naka aibpoisio nuko ocaaloi kotoma

oipone lo aingarakin kesi aiyatakin adumunet toma oboro lu itolomununete kesi kotoma adoketa kere. Kotoma oiswamae loka *Unhu-Ubuntu-Botho*, erai ebisines lo ejari lo ikamuntos nu ajenamar. Aiduk abar erai ijo ageun aiyatakin adumunet toma oboro kon lu iswamaununei ijo kore kede aimorikikina nepepe ka aisek iboro kede aswamisinei kede ipajan, idunyeta nepepe ka ipapero. Lo nesi eipone lo aiyatakin adumunet toma oboro kon kotoma ocaalo, mere kwape iteyo oni itunga luka otaunin egwelete iboro kotoma obeyin loko kuju komam epedoritos aiyatakin toma kec adumunet. Ka kere, aijuk kede aitolo iboro lu iswamao kotoma ocaalo amairon akwap akwpa toni ocaalo nesi eyataki ecanit wok noi tape do itunga lu ipu iremokinis anear aiboisio nu mam kesi ajenete otaunin korai do ecaaloit loka ican ijulakin araun etauninot lo ibakor.

Ebala akirot na eiswamae loka akerianut ebe kanu aiyatakin adumunet kede aisiriamikin abar kon toma okale kede ateker ber eroko ijo kijukakina nesi ne ejaas itunga ice luka otaunin...

Kosodi do ingetakini, ejai akiro na enyaritai *Machobane principle*, na akoto eong ailipun kane ejai lo ajion loka Afrika kotoma akwap naka Lesotho, Ejakait Machobane. Ebala ekisil loka Machobane ebe ekot ekot itunga luka Afrika aitam ber aswam kanukec, itiya adumun aswam bala enyamuret kanenice. Akerianut na epoloi nesi ekoto kojaas itunga lu egeununete ikulepek ebisines kanukec kotoma adoketa kere. Na nesi epol noi kanu adukunio akerianut na esipo kotoma ocaalo.

Eroko eong kina nu ipu nu ikamunitos akiro naka Ejkt. Machobane, mere ber eong ketetemik ijo nu ikamunitos ican kede ibakor lu idilas kotoma

Afrika. Ican lu ipu eraas ican kanu amamus kede iboro lu itoswama. Ibore yen eyangaunit nu nesi itunga luka Afrika aitolomunun iboro lu mam kesi itoswamaete kosodete aitoswam iboro lu mam kesi itolomununete. Kotoma oipone kalo, imudia do oni abar wok kotoma okito kede icorin.

Nu kere eyangaunit ecanit lo amamus kede acoa arai apirianut, kwape kineritor oni kokuju ebe mamitunga luka Afrika epodokinitos acoa kec mam itoswamete nepe cep.

Aso iboro lu itopoloete abar kotoma adoketa nuka ateker kesi imorikikinitos, na sodit, alosikinet na aitopol ateker koipone lo adukun abar adepar kwape kolo da. Ekot itunga luka ocaaloi abokun atanin kec nu akipi, adukun atutai nu didik, iguudoi kede irotin luko ocaaloi kwape ageunet na adumun abar. Kanen da bobo, ekot oni aibwaikin agogong na epol toma aiteteun amagoron kede aira ikito nepepe ikutiyo kanu adumununa ikee lu atagoro kasodete do aiyatakin aitojokiar isuban luka Edeke.

Adau eong atemar ebe ekot aiyatakin adumunet toma obore yen itolomuni ijo kotoma aisirimikin iboro lu kotoma ateker, kotoma oipone lo mere atukun abar kanu kon, konye aijaikin abar ngin ingarakini itunga lu obukus.

Alosikinet na iuniet nesi ne ebunio akirot naka Machobane. Epatana alosikinet na: *kogir araun ekingok*. Ebalala Machobane ebe, ne ijaikinia ijo itunganan ice aswam, iraun ijo ekingok ke. Kanu inyo? Naarai ajar kede ejautene kon kere ejai akanin ka ebos kanu inyamat kede ajar kere. Karai epet ebos ekingok, elosi ekingok ngol emonyi okuti adaun apak na edit tai kobonguni bob nepenen, naarai ejeni ebe ejare ke kere ejai akanin ka emasita. Erai aicoret ebe: kogeu ijo ilope bon awam

kon arai ebisines arai bo nat ipurojektan. Siri kiswama kanu ice itunganan kacut idol ijo ikar lu iyatakina.

Akirot na iongonet nesi na ebe, kowanyu ebe ejai ibore yen inyekikina ijo idwe kon akcut apirianut naka akwap kede acoa na ejare kwape kijaria ijo. Ekot aswamisinei nu imoriaritoa amisikin eipone lo adumun inyamat lu edolitos kede eidare kec, aiyatakin aitemokin ere, kede ayayit ekal kede ipurojektan ke kere ejok nepepe ka eipone lo dumununet apiyai kede eitoswamae lo ajokan kede iboro ice lu abar.

Na ikanyet, ekot oni aisisiaun eipone lo itoswamaet apkio nuka ican kanu aingarakinor. Aibois na atola akio kotoma atyonus arai akangas ebeit ijo awomomoun ibore yen ipodori ijo aiswamaun arai aijaikin luce kanuka ajokus kon.

Ipedori bobo oni aitolomun kotoma oinono wok adumunet na iyatakina kotoma oiponesio lu aswam iboro luka akan lu einono, aitubusiar iboro lu iswamauno kore ido kojaas toma aswamisinei nu einono wok. Itarauni ijo iboro lu iswamau ijokere lu ebisines kanu adumunia apiyai nu igangakinor ijo.

Kingetakini, abar na idul jokan naka Afrika nesi eroko ejai toma osuban luka Edeke kwape nat akipi, ikito kede iraan ice. Atyonus bon nes na ebe mam abar na itoswamao kanu aingarakina itunganan yen ican yen ko kau. Mam bobo iboro lu eroko ejaas akanin nuka ikulepek ikalia lu ore, konye arebia do apugan ayayit kec kokiror loka aitopolo akwap toni ne kwana ejatatar itunga lu ocaaloi alupok nu ekoriete kesi konye korai ebe nu apugan. Eraas do kesi amecak kotoma abar na erumunete kesi kama luka papaa kec.

Ne eswama eong toma Okomision loka Alupok ko Zimbabwe lo engarenikinit eong lo abu eong

kalimokite ijo nuke pacu, abu eong kawumok noi eipone lo kedemarere itunga luka Afrika abar nakec na ejaikiniete kesi ipolok kec. Ate erai abr na ekapitol lo 'idanyanyai' lo ebeit ti aitarau ebisines lo epol agogong ke noi kanu akerianut naka ateker apolou. Awomit eong ebe ne ber kigeara oni kotoma Ateteunio naka Afrika na abeit nesi alomakin aitemokin akiro nuka itunga ajaut kede alupok kec kwape kolo kejaar tetere ngul tunga epedorete aitoswam iboro luka abar lu ejaas akanin kec kanu akerianut kec aikwarun.

Alupok ngun nu lem ajaas oipone loka ipolok wok kotoma eijanakine kec kesi ebeit ti asalakinit toma oipone ngopengol naarai kepotu kolo ipolok kocowunitos noi koijanakine kec ebe amamei yen amamete alupok kedol nesi apak akote aitoswam kes. Etwaniarit lolo nen, nesi ibusakinitor abongokin oipone lokolo lo ipolok, lo eingarenikine lo akorere itunga iboro ateker kotoma oipone lo ngin tungan ilope aitolomun ajokus naka ebisines arai akerianut kotoma ke.

Ebukit loka apedorosio aongon nuka eitunganane kanu ajawut kede alupok kwape kolo kejaar kotoma okisila luka oinono nesi ebeit oni apukun nuke. Emoriaritos apedorosio nu, apedor na aitoswam alupok, apedor na aikor alupok ne ejaas ice lu iseunit ijo, apedor na aise ikur kobaale ikori ijo alupok ebe ice kijaikini ece mam, kwape nat idwe kon lu iwurit ijo kogeuni aikor koipone lo iteyo ijo akukuranut arai akalanyanut ke, kede, ingetakini, apedor na ajaut kede ayuwara kotoma apedorosio kangun tetere mam kes.emoromoro kojai toma aswam naka ikisila lu itolomunitai kotoma ateker. Kotoma oni ainyakakin apedor na ekore lo kolo toma oriongeta luka einono kwape kolo sek, epedori do ekale kede e *Dare* loko ocaalo,

aikor alupok kotoma eirian karai da ekotokinos do kesi aitoswam iboro lu eyangaunitos akiro nuka apakio kanu nuka *land leases* kede *land titles* iboro lu Imusugun lu kwana itoswamao kanu akerianut. Ekot oni ayitunit ebe ekore loka alupok naka ipolok kolo nesi ejaikinere alupok ne ejai ekale konye mere idiope tunganan bon kobit ke. Kejaas nu da, mam kesi itikokinete akorio naka alupok kacut kimoriarite ekore ngol ainerunet naka itunga luk o kal kangol kede ateker da.

Akes apolou ebe, epolok nuka ekore loka alupok adepar akerianut bon kede akote abar. Erai ekore loka alupok kotoma ocaalo lo itodunit eipugae loka itunga luk o caalo lo esipokina jokan. Akes apolou ebe ne ejaunotor ingungeta kanu alupok itoswamao eiswamae loka *Unhu-Ubuntu-Botho* lo erai edemokrasi lo ejatatar itunga kere toma.

Angetakinet

Ajeni eong ebe akiro nu inera eitaabo lo eraas nu ebalasi itunga lu ipu ebe, ido da korai ebe ebeit kodolite, araas nu ekot ngin tunganan yen ko Afrika kojoni. Eebo. Eyalama eong ebe kityaka ijo apak kosodi aisiom eitaabo lo toni angetakinet, akes apolou ebe awuta eong aiduma ejiiri ne ejai yen iyunit sek. Itunga luka Afrika ejenete akiro nu kotoma aokot kec. Erai atyonus mere ne dumakina itunga lu isimonikina nu, konye ejai ajokot okeper kon kwape idiope tunganan: inyo ilosi ijo aswam kanu iboro lu iner oni?

Kirero oni ican kede atyokusio nu kos nu kijaar oni kotoma akwap wok na Afrika, epatana apalar ebe ingai bo nat eong yen. Nu inyoika apedori eong aiswamaun? Ebalala eitaabo lo ebe ipu iboro lu ipedori ijo kwape idiope tunganan aswam!

Kogeu ber ijo erot kon lo ajenun bobo ebe ingai ijo kotoma akwap kana kokwap akolong. Kotoma abeitok ebuni eitaabo lo aisub bala ibore yen ijaikini ijo eibel kanu nu iswamauna. Kolot ingaren kosodi ainomar iboro lu ekot eiswamae loka

Unhu-Ubuntu-Botho ijo aswam kotoma ijo amisiikin ne ijai ijo kangin paaran.

Aso, ewuta eitaabo lo aingarakin ijo araun itunganan yen eyangauni aijulakineta kwape kijatatar ijo kede apedor ngin!

Kosodi kiyitu ebe: Arai eong, naarai kirai oni ipei.

Nu ikamunitos Eiwadikan

Mandivamba Rukuni



Eroko nesi kelomara toma W. K. Kellogg Foundation, arai Rukuni Ekoc lo Aisisia na Akor kede Akerianut na Agrikaca ko Oyunivasiti loka Zimbabwe. Aponi nesi koseunai kwape Apolokiniton Eicolong loka Zimbabwe Land Commission e Puresident Robert Mugabe kanu arereor eipone lo ekore kede ajaut ka alupok kotoma Zimbabwe. Iswamat nesi da aswamisinei nu egelegela kotoma oriongeta luka akwapisinei nuipu, kimoriarite United Nations Food and Agriculture Organization, e World Bank, e U. S. Agency kanu International Development, kede iriongeta luka ojokotau lu eminas eitunganane kwape loka Rockefeller Foundation. Abu nesi kodum e Diploma kotoma agrikaca ko Chibero Agriculture College ko Zimbabwe, nepepe kede edigiri loka Bachelor ko agrikaca ko Oyunivasiti loka Zimbabwe. Abu do nesi kosiom adigiri ke loka Masters ko aitemonokino naka agrikaca na ijai ariino nuka tropics ko Oyunivasiti loka Reading, ko Bulaya, kolosi do nesi adumun egigiri ke loka Doctorate ko Agricultural Economics ko Oyunivasiti loka Zimbabwe.

Kinerakinos kede eiwadikan kitoswamai
being.afrikan@gmail.com

Itaboi Lu Itolomunit CASAS


*Kanu ikorora lu ileleba luka iitaboi lu itolomunitai,
kipejok e ko www.casas.co.za*

1. Between Distinction and Extinction: The Harmonization and Standardization of African Languages *Edited by Kwesi Kwaa Prabh*
2. Knowledge in Black and White: The Impact of Apartheid on the Production and Reproduction of Knowledge: *Edited by Kwesi Kwaa Prabh*
3. Ibibio Phonetics & Phonology *Eno-Abasi Esien Urna*
4. Rethinking African Arts and Culture *Edited by Dele Layiwola*
5. Language and Institutions in Africa *Edited by Sinfree Makoni and Nkonko Kamwangamalu*
6. The New Orthography; Based on the Gbe Uniform Standard Orthography (GUSO) *Hounkpati B.C Capo*
7. African Languages for the Mass Education of Africans *Kwesi Kwaa Prabh*
8. Mother Tongue for Scientific and Technological Development in Africa *Kwesi Kwaa Prabh*
9. Nyansapɔw *James Gyekye-Aboagye*
10. Education, Literacy and Development in Africa *Sassongo J. Silue*
11. Isefe Ninu Awon Ere-onitan Yorùba *Arinpe Gbemelolu Adejumo*
12. Language Across Borders: The Harmonization and Standardization of Orthographic Conventions of Bantu Languages within and Across the Borders of Malawi and Zambia *Edited by Felix Banda*
13. Ifá and Related Genres *Lawrence Olufemi Adéwolé*
14. Globalising Africans *Edited by Bankie Forster Bankie*
15. Akan Nsemfuasekyere *J. Gyekye-Aboagye, S.A. Gyima, L.A. Okraku, R.M. Opong, S.K. Coleman, A.O. Boakye*
16. A Linguistic Analysis of ciNsenga: A Bantu Language Spoken in Zambia and Malawi *Lazarus Miti*

17. KiSwahili Katika Karne ya Ishirini na Moja (kiSwahili in the 21st Century *Edited by Kimani Njogu, Kitula King'ei, Clara Momanyi and Paul Musau*
18. Rehabilitating African Languages: Language Use, Language Policy and Literacy in Africa *Edited by Kwesi Kwaa Prah*
19. Harmonization and Standardization of Nigerian Languages *Edited by F.O.Egbokhare and S.O Oyetade*
20. New Perspectives in Edoid Studies: Essays in Honour of Ronald Peter Schaefer *Edited by Obioma I. Pogosan and Francis O. Egbokhare*
21. Speaking African: African Languages for Education and Development *Edited by Francis R. Owino*
22. Speaking Unison: The Harmonization and Standardization of Southern African Languages *Edited by Kwesi Kwaa Prah*
23. Racism and the Global African Experience CASAS and NGO Platform: World Conference Against Racism, Racial Discrimination, Xenophobia and Related Intolerance *Edited by Kwesi Kwaa Prah*
24. Discourses on Difference, Discourses on Oppression *Edited by Norman Duncan, Pumla Dineo Gqola, Murray Hofmeyr, Tamara Shefer, Felix Malunga and Mashudu Mashige*
25. Writing African: The Harmonization of Orthographic Conventions in African Languages *Edited by Kwesi Kwaa Prah*
26. Aspects of ciNsenga Tonology *Lazarus M. Miti*
27. Íkálè Masquerade Traditions and Artifacts *Ebenezer Aiku Sheba*
28. Akan Kasakoa Horow Bi J. *Gyekye-Aboagye*
29. Les Langues Africaines Pour L'éducation des Masses en Afrique *Kwesi Kwaa Prah*
30. Isènbáyé Àti ilò Èdè Yorùbá *Olasope O. Oyelaran & Lawrence O. Adewole*
31. Fɔɔ Maninkaw *Boniface Keita*
32. Unifying Southern African Languages: Harmonization and Standardization *Edited by Andy Chebanne, Mbulele Jokweni, Makali Isabella Mokitimi and Sibaukele Ngubane*
33. Chasing Futures: Africa in the 21st Century-Problems and Prospects *Edited by Kwesi Kwaa Prah*

34. Silenced Voices: Studies of Minority Languages of Southern Africa *Edited by Kwesi Kwaa Prab*
35. Reflections of Arab-led Slavery on Africans *Edited by Kwesi Kwaa Prab*
36. The Yorùbá Auxiliary Verb *Lawrence Adewole*
37. A General Introduction to Ndebele Grammar *Langa Khumalo*
38. Pourquoi le Gabon doit investir sur ses langues vernaculaires *Daniel Franck Idiata*
39. Languages of Instruction for African Emancipation *Edited by Birgit Brock-Utne and Rodney Kofi Hopson*
40. Comparative Bantu Phonology and Morphology: A Study of the Sound Systems and Word Structure of the Indigenous Languages of Southern Africa *Lazarus M. Miti*
41. Education, Culture and Development *James D. Emejulu and Micheal C. Mbabuike*
42. The Challenge of Using African Languages at School *Daniel Franck Idiata*
43. Mbofra Akan Kasa Nsemfuasekyere *J. Gyekye-Aboagye and S.A. Gyima*
44. The African Nation: The State of the Nation *Kwesi Kwaa Prab*
45. Afro-Chinese Relations: Past, Present and Future *Edited by Kwesi Kwaa Prab*
46. Metaphors of Our Times: The Oral Interrogations of Sociocultural Continuities and Raptures *Alec J.C. Pongweni and Emmanuel M. Chiwome*
47. (forthcoming) Shekgalagari Grammar: A Descriptive Analysis of the Language and its Vocabulary *Stephen T.M. Lukusa and Kemmonye C. Monaka*
48. Edikisyonari lo Ateso *Simon Peter Ongodia*
49. (forthcoming) Dictionnaire Etimologique des emprunts linguistiques en fon *Flavien Gbeto*
50. (forthcoming) Kudzidzisa ChiShona Kupuraimari: Mudonzvo weMudzidzisi *Timothy Gondo*
51. The Magic of Perseverance: The Autobiography of David Magang *David Magang*
52. Bedo Jarafrica *Mandivamba Rukuni (translated by Philip Oketcho)*
53. Kuwa Mwafrika *Mandivamba Rukuni (translated by Martha Qorro)*

54. Arait Itunganan Yen Ko Afrika *Mandivamba Rukuni*
(translated by Simon Peter Ongodia)
55. Bedo Dano me Apirika *Mandivamba Rukuni* (translated by
Okonye Godman)



ISBN 978-1-920294-53-3



The Centre for Advanced Studies
of African Society (CASAS)